

WANTOK

NIUSPEPA BILONG YUMI OL PAPUA NIUGINI STRET! 30 YIA NAU

32 pes

Namba 1,376

Wik i stat long Fonde Novemba 9, 2000

70t

Prais bilong fiul na wel i go antap

Ol minista i raus

Wenge abrusim vot nogat bilip

Stori bilong pamuk bisnis long siti



• Praim Minista Sir Mekere Morauta - Treseri



• Deputi Praim Minista Michael Ogio - Forestri, Kalsa na Turism



• Sir Michael Somare - Foren Afeas na Bogenvil Afeas



• Gabia Gagarimabu - Plis Minista



• John Kamb - Woks na Implimentesen



• John Kaputin - Komyunikesen na Hai Teknoloji



• Iairo Lasaro - Provinsal na Lokol Gavman Afeas



• Michael Laimo - Maining



• Ludger Mond - Helt

Ol kabinet Minista long Mekere Gavman



• Vincent Auali - Praivetaisesen



• Andrew Baing - Jastis Minista



• John Walko - Edukesen



• Kilroy Genia - Difens Minista



• Philemon Embel - Pablik Sevis



• John Tekwie - Tred na Industri



• Chris Haiveta - Hausing



• John Pundari - Lens



• William Ebenosi - Hom Afeas



• Muki Taranupi - Agrikalsa



• Bart Philemon - Trenspot na Sivel Eviesen



• Herowa Agiwa - Envaromen na Konsevesen



• Moi Avel - Plening na Implimentesen



• Tommy Tomscoll - Petrolium na Eneji



• Charlie Benjamin - Leba na Emploimen



• Henry Smith - CIS Minista



• Andrew Kumbakor - Rurel Developmen

Nestlé MILO IKEN WOKIM GUTPELA SAMTING LONG YU

PLIS RIPOt

Hagen:

Hagen plis i mekim ol wok painimaut long tripela moa saspek husat i bin stap insait long grup we i bagarapim tripela meri nes long Hagen las mun. Provinsel Plis Komanda bilong Westen Hailans Alan Kundi i tok ol lida bilong plis i bin wok wantaim plis long kisim ol dispela saspek. Mista Kundi i tok ol i holim pinis sevenpela man pinis husat i bin wokim pasin nogut long tripela nes. Em i tok tripela moa man long dispela trabel i ronawe hait yet. Em i amamas long komyniti sapat we i bin helpim plis long holim ol dispela tripela saspek.

Wau, Morobe:

Sampela stilman i bin hajjekim wanpela liklik balus na stilim gol we mani ol i ken kisim taim ol i salim inap long K500,000, plis ripot i tok. Ripot i tok stilpasin i bin kamap long las wik namel long Wau na Garaina insait long Morobe provins. Liklik balus i sapos long kisim gol bilong tripela kampani long Wau na Bulolo i kam long Mosbi. Bos bilong ol plis long Noten boda koman Alfred Reu i tok liklik balus bilong Not Kos Aviesen i wok long karim gol long Wau i kam long Mosbi taim ol stilman i hajjekim balus na stil pasin ya i kamap. Em i tok tupela pasindia i bin kalap long balus long Nazdab i go long Wau. Balus i bin kisim tupela moa pasindia long Wau na ol i karim gol i kam long Mosbi taim tupela man i putim gan long pailot klostu taim i laik pundaun long Garaina ples balus. Mista Reu i tok taim balus i pundaun long Garaina, foapela man husat i bin wet long ples balus i stilim ol gol na ronawe i go olsem long nambis bilong Morobe. Ol i toksave pinis long ol plis long Mosbi na ol i toktok wantaim pailot long dispela samting. Ol i salim moa plis i go long Garaina long helpim ol plis long hap na painim ol stilman ya. Mista Reu i tok ol bai askim ol kampani long helpim wantaim helikopta na blokim rot bilong ol stilman bipo ol i kisim sip o wanem rot moa na ronawe.

lalibu, Sauten Hailans:

Ol bin stilim K22,000 bilong PNGBanking Koporesen brans long lalibu insait long Sauten Hailans long dispela wik. Stilpasin i bin kamap long Mande Novemba 6. PLis ripot i tok faivpela man i holim gan i bin yusim wanpela Toyota Lenkrusa ol i stilim i go long taun na wokim stil pasin ya. Ol plis long lalibu i tok ol stilman i bilong Hagen eria na ol i karimaut dispela stilpasin bikos nogat plis i wok tumas long eria. Dispela em bikos ol helt atortiti i bin tok ol plis sel i no gutpela long ol trabel meka na ol kalabus lain long stap long en. Em i luksavd long gutpela komyniti sapat long dispela eria husat i bin blokim lalibu na Hagen rot long ol stilman ya. Mekim na ol stilman i bin bamim ka Wara Andowe na ronawe i go long bikbus long lek i go olseme long Maunt lalibu. Komyniti i bin holim wanpela saspek long plesTopopulu taim em bin go baim biskit long tred stoa long moning. Ol ples lain i bin givim saspek i go long lalibu plis.

Gavman kisim bek Pangu na Yunaitet Pati

YAKAM KELO i raitim

PANGU na Yunaitet Pati i kisim bek luksave na nem bilong tupela wantaim Gavman bilong Sir Mekere Morauta taim em i givim wok ministri long tupela pati ya long Fraide las wik.

Lida bilong Yunaitet Pati Gabia Gagarimabu i kisim Plis Minista na Pangu lida Chris Haiveta i kisim Hausing-Minista. Tommy Tomscoll bilong Yunaitet Pati tu i kisim ministri bilong Petroleum na Enej we Dokta Fabian Pok i bin holim bipo.

Tasol long las wik Tunde Yunaitet Pati wantaim Pangu Pati i bin vot wantaim PPP long surukim palamen bung i go long neks ya 2001. Dispela i bin egensim tingting na laik bilong Gavman bilong Sir Mekere Morauta.

Long Tunde las wik, Pangu lida Chris Haiveta wantaim PPP lida Michael Nali i bin bung wantaim Oposisen Bill Skate na ol lain bilong em long tokaut egensim dispela lo bilong Intagrity Bil long Politikel

Pati na ol Kendidet.

Tasol long Fraide, bikpela senis i kamap gen we Yunaitet Pati na Pangu i go bek gen long Gavman.

Praim Minista Sir Mekere Morauta i bin tokaut long Trinde las wik olsem ol dispela pati i pinis long Gavman. Na em i no inap raitim pas long tokim ol, em bai tokim ol long maus tasol olsem ol i pinis long Gavman sait."

Michael Nali, lida bilong PPP i bin kamapim wanpela mosen we i askim palamen long surukim bung i go long neks ya Jenuari 23, 2001. Dispela bai stapim nesenel baset bilong neks ya long kamaut long Novemba bung. Na tu bai surukim moa taim bilong kamapim lo long Intagrity Bil bilong Politikel Pati na Kendidet.

Gavman i laik kamapim dispela lo long las wik Tunde tasol ol i kirap nogut long Michael Nali i kamapim dispela mosen bilong surukim palamen. Na planti lain memba i bin sapatim Michael Nali na mekim Gavman sait i paul olgeta.

Praim Minista Sir Mekere Morauta i tok em i kirap nogut na kros tu wantaim long dispela samting. Tasol em i amamas olsem dispela lo i stap yet.

Michael Nali i bin gat bikpela sapat i kam long Chris Haiveta na ol Pangu lain bilong, Yunaitet Pati na ol wanwan memba wantaim Oposisen. Tasol ol dispela lain i kirap gen na go bek long Gavman bihain long foapela de.

Praim Minista i sutim tok olsem sampela memba bilong em yet long pati (PDM) i bin as bilong kamapim dispela salens long em. Olsem na em i rausim namba tu Praim Minista bilong em, Mao Zeming, Alfred Pogo, Dokta Fabian Pok, Mathias Karani na Peter Waieng. Sir Mekere i tok em i mas rausim sik hariap nogut sik bai i go bikpela long olgeta hap bilong bodi.

Praim Minista i rausim pinis memba bilong Henganofi Viviso Seravo. Mista Seravo em memba bilong PDM pati na em i wanpis PDM man long Isten Hailans provins.



Sentrel haiwe kisim patrol ka

• Bihainim bikpela tok kros na petisen bilong ol Sentrel pipel i go long NCDC na plis fos long hevi bilong lo na oda insait long Sentrel provins long haiwe, ol plis fos long dispela wik i kisim tupela lenkrusa patrol ka bilong mekim wok patrol long haiwe. Gavana bilong Sentrel Provins i bin givim wanpela petisen makim ol pipel bilong Sentrel i go long NCDC long dai bilong wanpela liklik meri we ol raskol i sut long sotgan na kilim em na tu ol arapela bikpela trabel ol raskol i save mekim long Magi haiwe na tu long Hiritano haiwe long Sentrel provins. Long piksa em Ekting Plis Komisina Joseph Kupo i givim ki bilong tupela ka i go long Metropliten Plis Komanda John Marru. Foto: DAVID TERRY.

Skate banisim K50 milien disisen bilong em

LIDA bilong Oposisen Bill Skate i tok Gavman bilong em long bipo i bin traim long stretim fainens bilong Air Niugini balus kampani i stap stret na i redim 2 yia komensel menesmen kontrak pastaim long ol i ken salim Air Niugini long praivet bisnis (praivetaisesen).

Mista Skate i mekim dispela toktok long banisim disisen bilong Gavman bilong em long pastaim we ol i bin kisim K50 milien long Motor Vehicies Insurance Trust aset long baim ol kos bilong Air Niugini wantaim Papua Niugini Benking Kopresen (PNGBC).

Olpele Praim Minista i tok dispela dinau bilong Air Niugini long taim bilong olpela Gavman: i bin suruk i kam long 1996 na 1997 na Air Niugini i go inap moa long stretim ol dinau bilong em long PNGBC.

Olsem Gavman bilong mekim wok, mipela i laik lukim olsem Air Niugini i stretim ol hevi bilong mani em i gat long dispela taim na tu em i ken go het long givim gutpela sevis long ol manmeri long gutpela prais, Mista Skate i tok.

Em i tok dipatmen bilong Treseri long dispela taim aninit long Minista lairo Lasaro husat tu em siaman bilong Air Niugini i kamapim wanpela menesmen odit long kampani long luksave long ol as bilong hevi stret wantaim mani na ol ron balus we i no save mekim mani.

Em i tok dipatmen tu i was tu long lukim olsem Gavman i bin kisim gutpela maket veliu bilong ol bisnis aset bilong MVIT long Pacific Finance we i kos olsem K100 milien. Na K50 milien i go bilong stretim dinau bilong Air Niugini wantaim PNGBC. Narapela K50 milien em Gavman i salim i go long bekim dinau bilong em wantaim Benk ov Papua Niugini bikos dispela i bihainim wanbel namel long Dipatmen bilong Treseri na Intanesenel Monitari Fan (IMF).

Mi laik tok welkam long toktok bilong Sir Mekere Morauta long i laik sekim ol rekot na wok na mani insait long MVIT. Mi nogat wanpela samting haitim na mi save gut tru olsem disisen bilong Gavman bilong mi long dispela taim i bin klia na

stret long interes bilong ol pipel bilong Papua Niugini, Mista Skate i tokaut.

"Praim Minista i ken go het na sekim ol dispela rekot inap olgeta kau i kam long banis. Nogut em i laik karamapim ol hevi bilong PDM long bipo i kam we olgeta pipel i save long en.

"Samting i bin stat wantaim PDM taim em i go pas long Gavman long 1992 inap 1994 wantaim Sir Mekere Morauta olsem Gavana bilong Sentrel Beng, givim mani long ol bikpela wok bilong Gavman long mak olsem K900 milien o klostu 1 bilien dola (US) long domestik kredik wankain olsem Raggina akaun long Cayman Ailan. "Em i bin kisim Dinau olsem US\$132. milien long Wol Beng insait long wanpela krismas tasol moa long ol dinau mani PNG i bin kisim long 8-pela krismas pastaim.

"Mi laikim PDM i mas stap long stretim ol dispela dinau taim mak bilong bekim olgeta dinau ya bai kamap long 5-pela krismas bihain." Mista Skate i tok.

WANTOK

All departments. Phone: 325 2500 - Fax: 325 2579
P. O. Box 1982, Boroko, NCD, Papua New Guinea

Publishing Weekly, Thursday, for
Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

Acting General Manager and Group Editor in Chief:
Anna Solomon.
Acting Advertising Manager:
Jucko Oberleutner
Editor of Wantok:
Yakam Kelo

Papers distributed by air throughout PNC. Available by air mail subscription within Papua New Guinea and overseas.
Email address:
word@global.net.pg

Advertising deadlines. Display bookings: Tuesday midday. Camera ready copy: Wednesday midday. Classified Advertising: Wednesday 5pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official display Advertising Bookings form.

Sir Mekere i rausim na makim ol nupela Minista

YAKAM KELO i raitim

PRAIM Minista Sir Mekere Morauta i mekim senis long ol Gavman Minista na memba bilong em long las wik Fraide.

Ol nupela Minista em; John Tekwie, Tred na Industri - APP

Henry Smith, CIS - APP
Michael Laimo, Maining - Nesenel Alaiens

Tommy Tomscoll, Petroleum na Eneji - Yunaitet Pati

Gabia Gagarimabu, Plis Minista - Yunaitet Pati

Chris Haiveta, Housing - Pangu Pati

Ol sampela Minista i lusim wok bilong em;

Mao Zeming, Alfred Pogo, Dokta Fabian Pok, Mathias Karani na Peter Waieng.

Ol Minista husat kisim nupela wok em; Sir Michael Somare, Foren Afeas na Bogenvil Afeas - Nesenel Alaiens

Andrew Baing, Jastis - PPP

Sir John Kaputin, Komyunikesen na Hai Teknoloji - PDM

Andrew Kumbakor, Rurel Developmen - PDM

William Ebenosi, Hom Afeas - PDM

Kilroy Genia, Difens - PDM

Muki Taranupi, Agrikalsa - PDM

John Kamb, Woks na Implimentesen - PDM

Michael Ogia, Deputi Praim Minista, Forestri, Kalsa na Turism - PDM

Praim Minista Sir Mekere Morauta i tok em ino laikim tru long mekim kain senis olsem long ol Minista. Tasol mi bin tokaut pinis long mekim ol samting we i gupela long kantri i mas ron gut em long politiks na ekonomi bilong kantri i ron gut. Olsem na mi gat dispela wok bilong kamapim ol

senis, Sir Mekere Morauta i tok.

Sir Mekere i tok em i bilip ol lain memba na Minista husat i bin kamapim wanpela vot long las wik Tunde long surukim palamen i go long neks yia (2001) i bin kisim sapot bilong sampela lain PDM memba we em i rausim ol long Ministri wok bilong ol. Nau mi rausim dispela as bilong ol kain salens, mi bilip bai ol wok bai ron gut, Praim Minista i tok.

Mi mekim ol dispela senis bikos mi laikim gupela sevis i mas go long stretim sindaun bilong ol pipel olsem na mipela i mas gat gupela na strongpela sistem bilong gavman, Sir Mekere i tok.

Em i tok ol senis em i mekim i gat wanpela poin tasol long en na dispela em long kamapim gupela gavman. Mi bin muv long stretim ol guria i bin kamap long politiks long bipo na mi bai mekim gen sapos dispela gupela sanap i guria gen.

Las wik Tunde i bin sore taim bilong politiks insait long kantri. Tasol mi

mas go het long rausim as bilong sik, nogut sik i go bikpela long olgeta hap bilong bodi, em i tok.

Praim Minista i tok olgeta toktok em i kisim i soim olsem sampela lain memba bilong em yet long PDM pati i kamapim dispela samting. Sore olsem Deputi Praim Minista na namba tu lida bilong pati PDM, Mao Zeming i stap insait long dispela. Em wantaim ol memba olsem Pok, Pogo, Karani na Waieng i lusim wok Minista na posisien bilong ol long Gavman.

Michael Nali husat i go pas long muvim dispela mosen i lusim tu wok Minista bilong em. Michael Nali em lida bilong Pipels Progres Pati (PPP).

Sapos konvensen o bung bilong PDM i makim Mista Zeming long holim wok bilong deputi lida bilong pati, em i ken kisim gen luksave long ministri long bihain. Morobe em bikpela provins long kantri na tu long PDM olsem na ol dispela samting em mipela i mas skelim long konvensen bung, Praim Minista i tok.

Nesenel Alaiens sapatim Mekere Gavman

NESENEL Alaiens pati i tokaut olsem ol bai sanap strong wantaim na sapatim Gavman bilong Sir Mekere Morauta inap 2002.

Lida bilong pati Sir Michael Somare i tokaut long las wik Sarere olsem Nesenel Alaiens i bin kam bung wantaim long Me 2, 2000 long fomim wanpela bikpela na strongpela grup bilong wok bung wantaim long karim laik na interes bilong kantri. Olsem na ol wanwan liklik pati olsem Melanesian Alaiens, Muvmen for Greater Autonomy na National Alliance i bin kam bung wantaim na sanap olsem wanpela bikpela pati.

Sir Michael Somare i tok insait long dispela sanap wantaim bilong olgeta memba ya, ol i lukim olsem long gupela wok na pasin long i mas kamap, eksen bilong wanwan lida i mas kamap gut pastaim.

Sir Michael Somare i tok bai Nesenel Alaiens i wok strong wantaim long kamapim ol gupela samting bikos dispela em laikim bilong ol pipel.

Em i tok long 2002 bai Nesenel Alaiens i wok strong tu long painim ol gupela kendidet bilong sanap long nesenel ileksen

Em i tok tu olsem pati i lukim olsem dispela lo bilong kamapim insait long wok bilong ol politikel pati na ol kendidet em gupela lo na em bai gupela lo tru long pati bilong ol. Na dispela inap pulim ol gupela bisnis invesmen tu i kam long kantri long kirapim moa wok na bringim developmen na wok long kantri.

Memba bilong Mosbi Saut Ledi Carol Kidu i tok em i bin winim ileksen na kam olsem independen kendidet. Tasol em i laikim tru grup bilong Nesenel Alaiens bikos ol i gat ol saveman bilong wok, ol lida husat i gat planti bikpela eksperiens long ol bikpela wok na i save long lukautim ol pipel bilong ol.

Nesenel Alaiens pati i gat ol lida olsem Steven Pokawin, Ephraem Apelis, Paul Tohian, Peterson Lowa, Michael Laimo, John Mornis, Ledi Carol Kidu, Moi Avei, Bart Philemon, Sir Michael Somare, Bernard Narokobi, Arthur Somare, Alfred Kaiabe na Masket langailo.

Nesenel Alaiens em namba tu bikpela pati insait long Gavman bilong Praim Minista Sir Mekere Morauta husat i lida bilong Pipels Demokretik Muvmen (PDM).

Ol memba bai abrus long kisim Rurel Action Progrem mani

JOE KANEKANE i raitim

PLANTI memba bilong palamen inap lusim Rurel Developmen Fan (RDF) mani bilong ol i go bek long Gavman bikos Wol Beng i strong long lukim olsem stretpela na klia rot na ol wok i stap ples klia pastaim long dispela mani i go long ol memba.

Maski planti memba na distrik bilong ol i singaut long Wol Beng i slekim sampela rot bilong kisim dispela mani, tasol Beng i sanap strong yet long olgeta rot na ol samting bilong mekim i mas klia gut long ol memba i kisim dispela RDF mani.

Vais Presiden bilong Wol Beng long Is Esia na Pasifik Rijen, Jemal-ud-din Kassum i tok ol i klia long ol singaut bilong ol memba tasol wanem rot ol i taitim pinis bai i stap olsem.

Mipela i save olsem mak bilong givim aut dispela mani i daun tumas, Mista Kassum i tok. Tasol i gat ol toktok i stap long stretim dispela.

Tasol Mista Kassum i tokaut olsem ol toktok wantaim Gavman i stap olsem ol mani we nogat man i yusim bai ol i putim i go long sait inap dispela memba i stretim gut olgeta pepa na ol wok bilong em gut na kam bek gen long kisim dispela mani.

Mista Kassum i no tok klia: tru long dispela bai ol i mekim

olsem wanem, tasol i gat luksave olsem bai Opis bilong Rurel Developmen i opim wanpela pasbuk o tras akaun na putim ol dispela mani i go stap long en.

I gat ol toktok i kamap tu long kamapim wanpela rot bilong lukautim o nogat baim kompensesen igo long mak bilong mani we ol i no yusim. Tasol Mista Kassum i tok bikpela samting em sapos dispela mani i go aut long sampela taim bihain, ol i mas bekim bek.

I gat bilip olsem dispela mani bai i go insait long spesel fan bai ol memba i ken kisim mani long en long narapela krismas tasol ol rul bilong bihainim long dispela i no kamap klia yet.

Memba bilong Hagen Paul Pora i bin askim Praim Minista Sir Mekere Morauta long wanem as tru na em (Mekere) i gat signesa long sainim na givim aut dispela mani.

Mista Pora i tok dispela em bikpela wok tumas long Praim Minista long mekim olsem na em (Mekere) i mas givim dispela wok i go long narapela man long mekim na sevim ol wanwan memba bikos Praim Minista bai i gat planti wok tumas long mekim.

Memba bilong Menyamy Thomas Pelika i askim Praim Minista long luksave long kain iilektoret olsem bilong em we i bik bus na longwe tumas na ol i save kisim strong long dispela helpim bilong RDF long ol pro-

jek bilong ol.

Mista Pelika i tok ol pepa wok bilong raitim i save hat tumas na ol memba i save westim planti taim tru long raitim dispela pepa long kisim mani bilong ol. Na sampela taim ol i no save kisim mani bilong ol long distrik bilong ol.

Memba bilong Bulolo na Deputi Oposisen lida Peter Peipul i salensim Praim Minista tu long tokaut long ol pipel bilong Papua Niugini sapos dispela RDF mani i stap bilong givim aut.

Sir Mekere Morauta i bekim tok bilong ol memba olsem rot tasol bilong bihainim long givim aut dispela mani em sapos i gat klia na stretpela rot bilong mani i kam na go long en.

Em i tok strongpela gaidlain o rul i kamap long dispela mani em long lukim olsem ol ples na distrik i kisim trupela wok na developmen ol pipel i laikim long en.

Em i salensim ol memba long stretim gut ol pepa bilong ol na mekim stret bikos em i no bin lukim ol memba long opis bilong em olsem na em i no bin sainim ol sek.

Olpele Minista bilong Rurel Developmen, William Ebenosi i strongim tok tu olsem olgeta memba i mas bihainim ol gaidlain long kisim dispela RDF bilong ol bikos dipatmen i sanap long strongim gaidlain bilong Wol Beng.

FARMSET LIMITED



&



Day-old Chicks

+



Bikpela Hariap

=

PLANTI KINA

PROFIT OLGETA

ORORI

MELBON CUP HOS RES NA TORO KONIM OL WOKMAN BILONG EM LONG BETIM HOS NAMBA-FOA (4)...



OLGETA I BILIP LONG TORO NA PUTIM OLGETA MONI BILONG OL LONG HOS NAMBA-4...




TORO KISIM MONI BILONG OL NA GO BETIM NA WETIM RES I STAT LONG HAP...




TAIM RES I STAT, HOS NAMBA-4 INO WIN... OLGETA WOKMAN I KAI-KAI TIT NA WETIM LONG KAMBEK...





NIUGINI AILAN NIUS



Lusfrut program i kamapim gutpela sindaun long Wes Niu Briten

ROSALYN ALBANIEL i raitim

"LUS frut mamas" i wanpela program we i wok long helpim planti grasruts insait long Wes Niu Briten provins.

Oi lain husat i go pas long kamapim dispela program em ol lain long Oil Palm Industry Corporation (OPIC).

As tingting long kamapim dispela program em long sotim namba bilong ol frut bilong welpam we i save lus na pundaun na sting nating long graun taim ol papa bilong ol gaden i save katim ol frut ya taim ol i redi.

Narapela as we ol lain bilong OPIC i bin kamapim dispela program em long traim long kamapim sampela rot we i ken helpim ol meri yet long traim long painim sampela toea long helpim ol yet long sindaun bilong ol.

Taim ol lain long OPIC i bin kamapim dispela program, ol i tok

olsem i bin i gat nain-pela meri tasol husat i bin tek pat long dispela program.

Nau yet ol i tok olsem i gat moa long 3000 meri husat i wok long tuhat long bungim o kolektim ol dispela lusfrut bilong welpam long helpim ol yet long painim mani.

Oi lain OPIC i tokim ol lain husat i bin kamap long wanpela miting bilong ol olsem prais bilong dispela frut i wok long go daun tasol dispela i no stapim ol dispela ol mama long wok i go yet.

Oi OPIC i tok moa olsem dispela program i bringim planti gutpela senis i go long ol dispela lain. Sampela we ol i tok aut long en, em olsem nau i no gat planti frut i slip nating na sting aninit long ol welpam diwai, bilong wanem taim ol i save pundaun kwik taim tru ol mama i save bungim ol. Ol i save olsem i gat mani i stap long ol dispela samting.

Bikos ol meri i wok long helpim ol yet na femeli bilong ol, planti bilong ol dispela lain nau i gat inap

mani long wokim ol gutpela haus, baim gutpela kaikai na klos samting.

Nambawan samting em planti ol femeli ino wok long kros pait moa.

Man husat i bin kamapim dispela program em, wanpela bikbos yet wantaim ol lain OPIC na nem blong em, em, Frank Lewis.

Mista Lewis i tok aut olsem taim ol i bin statim dispela program ol asples lain i no bin wanbel tumas.

"Mipela i bin save pinis olsem i bai gat sampela kros liklik, tasol mipela i no giv ap. Mipela i pasim tingting tasol na surukim dispela wok i go moa blong wanem nambawan as na tingting i stap olsem OPIC i mas traim long helpim ol pipel long hap ya," Mista Lewis i tok.

Mista Lewis i tok olsem i gat moa wok i stap yet long ol OPIC long wokim long developim dispela program na wokim i kamap top moa tasol em i autim tok amamas long kaikai we hatwok bilong ol na program yet i kamapim pinis.

Gavana Nakmai sanapim komiti long glasim Talasea hevi

GAVANA Clement Nakmai bilong Wes Nu Briten insait long wanpela lo na oda forum long Kimba las wik i bin tok PNG i wok long bagarap bikos ol gutpela pasin insait long komyunita na sosaiti i wok long lus.

Gavana Nakmai i bin kamapim dispela forum long etdresim ol sosesol na lo na oda hevi we i wok long kamap bikpela long Talasea eria.

Em bin tok ol plis i no inap long daunim ol hevi bikos planti taim as long ol hevi i narakain na i no stap long eria bilong plis.

Em bin tok namba wan hap long stretim ol hevi em long komyunita level bikos ol lain long dispela level yet i save gut long as bilong ol hevi na ol i ken stretim ol gut.

Provinsel Siaman bilong Sosesol Sevis Alphonse Mape, Presiden bilong Talasea Lokol Level Gavman Lucas Waka na ol wot kaunsila bilong en, Ol Non Gavna Ogenaisesen na ol ara-

pela lain moa i bin stap insait long forum.

Tupela grup i stap insait long trabel long lo na oda hevi long Talasea eria.

Pait namel long tupela i kamapim pinis dai bilong tupela man na planti bagarap long ol ples, planti ples lain i lusim ol vilis na ronawe, rot bilong go hetim ol Agro-Ikonomik wok i pas, rot bilong skruim ol sevis gut i no orait na planti pipel i stap insait long pait i kisim bagarap long en.

Plis i holim pasim sampela saspek long hevi na sindaun i no gutpela long Talasea eria.

Insait long dispela forum, ol i bin kirapim wanpela komiti long painim gutpela sindaun long lukluk long ol hevi i kamap nau long Talasea.

Gavana Nakmai yet i oraitim na em i makim tupela sinia gavman opisa long long helpim na givim tok stia i go long komiti na givim ripot i go long gavana tu.

WANTOK

NIUSPEPA BILONG YUMI OL PAPUA NIUGINI STRET

P. O. Box 1982, Boroko
Telepon namba: 325 2500
Feks namba: 325 2579
email: word@global.net.pg

PE BILONG WANPELA
YIA 52 NIUSPEPA

PLES	AIR
PNG	K 68.00
Ostrelia na Nu Silan	US\$46.00
Esia Pasifik na Japan	US\$55.00
Amerika na Yurop	US\$95.00



• Ledi Rosalyn Morauta long opening bilong Asosiesen bilong ol meri long Manus em Manus PIHI Asosiesen.

Oi Is Nu Briten pablik sevan kisim tok lukaut

OL PABLIK sevan insait long Is Nu Briten i kisim tok lukaut long noken go insait long ol politikel kempein we i wok long go het long provins.

Provinsel Etmnistreta Hosea Turbarat i bin givim aut wanpela sekula o toksave pas we em i bin mekim tok lukaut i go long ol pablik sevan long provins bilong noken go insait o poroman wantaim ol kendidet i sanap resis long Pomio Open na Is Nu Briten rijinel sia.

Em bin tok ol lain husat i go insait long politiks bilong tupela sia bai i kisim bikpela mekim save long en.

Mista Turbarat i tok opis bilong en i kisim pinis ripot long sampela pablik sevis long provins i go insait long wok kempein bilong ol kendidet na em i no amamas long en.

Olsem na em i askim olgeta lain husat i go insait long dispela wok bilong noken wokim moa bikos ol bai stap long hevi.

Mista Turbarat i etvaisim ol distrik etministreta na ol divisenenol etvaisa long was gut long ol opisa na putim ripot i go long en sapos ol i lukim ol i brukim tok we Mista Turbarat i givim aut long sekula toksave.

Oi vota bilong Is Nu Briten bai i holim ileksen long tupela sia we Gavana Koimanrea i bin lusim i stap taim em i risain na leit brata bilong em Alois Koki i lusim taim em i dai long dispela yia. Taim bilong vot bai stat long neks Sarere Novemba 18 na pinis long Novemba 25.

Tripela kendidet i resis long rijinel sia. Ekting Gavana Leoo Dion i wanpela bilong ol. Nainpela kendidet i resis long Pomio sia na Mista Koimanrea i wanpela long ol.

Oi Wes Nu Briten pipel i noken salim graun

TOK i go long ol pipel bilong Wes Nu Briten long noken salim moa graun bilong ol bikos provins i wok long sot long graun, Siaman bilong provinsel Non Gavman Ogenaisesen grup Fabian Kaona i tok.


Em i tok tu olsem ol lain husat i laik go insait long welpam bisnis wantaim Nu Briten Pam Wel o Hargy Wel Pam kampani i mas lukaut bikos welpam bisnis na plantesen i save yusim bikpela graun eria. Na long dispela taim, hevi long graun i as long pait namel long ol hauslain na ol trabel long lo na oda insait long provins.

Mista Kaona i wokim ol dispela toktok long spesel lo na "Ja forum we Gavana Clement Nakmai i bin singautim long en las wik long Kimbe.


"Ol pipel long Wes Nu Briten i mas stop long salim graun bikos Wes Nu Briten i no bikpela eria moa olsem yumi save tingim." Mista Kaona i tok.

Em bin tok amamas long Gavana Nakmai long putim kamap dispela forum na tu stap insait long en. Em i bilip olsem spesel komiti we Gavana nakmai i bin kirapim em i raitpela rot long bihainim long traim kamapim gutpela sindaun na bel isi pasin long Talasea eria.





SEPIK NIUS



Pater Joe Queintep kamap Din long Nuku Dineri

LONG las mun Bisop bilong Aitape Daioses, Austen Crapp, i makim Pater Joe Queintep olsem Din bilong Nuku Dineri. Pata Joe Queintep i bilong Wawas ples, Pomio Distrik long Is Nu Briten provins.

Pater Queintep bipo long em i kamap din, em i stap olsem pris bilong Seim, Kafle, Wasai na Nawalu peris.

Pater Queintep i tok em i hama-

mas bikos em i bikpela nid long Nuku i mas i gat Din long stiaim ol wok. Pater Queintep i kisim ples bilong Pater Tony Burgess husat i nau Bisop bilong Wewak Daioses.

Tasol em i tok wok bilong Din em i hatpela wok na em bai i nidim pastaim sampela sapot bilong Bisop Austen na Bisop Tony Burgess long Wewak Daioses.

Pater Queintep i mekim wok Pater inap 19 yia nau bihain long

em bin kisim odinesen bilong em long Jenuari 6 1981. Bihain long odinesen em i bin lukautim Ningil, Karaitem na Yaluwape Peris inap long 12 yia. Em i bin stap tu olsem saplin bilong ami long Moem na Taurama Bareks inap long 7-pela yia.

Long 1997 Pater Queintep i bin go stap long Yogai Peris long Bereina Daioses Sentrel provins. Long 1998 em i go long Nuku

Dineri we em i stap 6-pela mun tasol na i go long 8 mun kos long Jerusalem long Isrel.

Long kos em i bin skul long olupela na nupela Testamen, na hap bilong dispela skul i karamapim tu lukluk raun long ol samting baibel i stori long en i stap long Holi Len.

Pater Queintep i tok dispela kos i bilong helpim em long kisim moa klia long ol toktok i stap long baibel

bai em i ken mekim gut wok bilong em.

"Dispela kos i opim tingting bilong mi long wok bilong mi olsem pris we mi lukim baibel i gat laip na mi ken pilim dispela insait long mi"

Pater Queintep i tok. "Dispela i kirapim mi na i givim mi moa strong na tingting long mekim gut wok bilong mi long lukautim ol kain sipsip."

Haus lotu bilong Saure bai i op

OL pipel bilong Saure, Is Sepik provins bai lukim nupela haus lotu bilong ol long dispela wik Sarere.

Dispela haus lotu bai Reveren Bisop Raymond Kalize bilong Katolik Asdaiosis bilong Is Sepik bai opim. Dispela haus lotu tu i kos olsem K3,000 we Wewak Rurel Lokol Level Gavman an Wirui Paris i bungim han wantaim long kamapim.

Dispela haus lotu em ol i wokim tupela krismas i go pinis tasol ol asples i nogat mani bilong opim olsem na ol i larim i stap inap dispela taim nau ol i redi long mekim dispela opening.

Man i go pas long bungim ol wok

na progrem bilong opim dispela haus lotu em Lawrence Mot na em i go pas long bungim ol pipel long mekim ol wok bilong stretim ples na haus bilong dispela open de i ken kamap long en long dispela wik Sarere.

Ol manmeri husat i kamap long lukim dispela open de bilong haus lotu bai lukim na harim stret pairap bilong kundu na singsing tumbuna bilong ol asples Saure. Ol yangpela tu bai amamasim dispela de wantaim ol singsing lotu wantaim gita na drama pilai. Bihain long ol dispela pilai na singsing bai lotu i stat na Pater Hubert Sewete bilong Wirui Paris i go pas long en.

Redio Is Sepik no i wok moa bikos mani sot

PLANTI ol manmeri bilong ples long rurel eria bilong Is Sepik i no kisim moa sevis bilong redio bihain long redio Is Sepik i klos daun bikos nogat mani bilong ronim dispela stesen.

Wanpela olupela anaunsa bilong redio, Brus Samban i tok planti pipel i no kisim ol bikpela tok-tok we i kamap insait long provins na kantri bikos ol i nogat redio stesen i wok.

Mista Samban i tok redio stesen i no wok inap wanpela mun olgeta nau.

Em i tok provinsel gavman i mas mekim wanpela samting bikos Nesenal gavamn i mekim planti senis na tu ol pipel i no klia long wanem hap sait memba bilong ol long palamen i stap.

Em i tok ol pipel i no save sapos ol i gat wanpela gavaman i makim maus bilong ol o nogat.

Mista Samban i tok i gat sampela bikpela projek long provins em i pipel i mas save long em.

Em i tok gavamn i mas sekim mani i go we bikos planti samting olsem rot, skul, haus sik, bris na ol arapela gavaman sevis i bagarap tru.

Nogat pawa long Aitape

PAWA i bin dai long Aitape taun las wik Sande bihain long narapela jenereta i bagarap.

Wanpela wik olgeta i nogat pawa saplai na ples i blekaut tasol bihain long las wik ol Elcom pawan i kamap na stretim gen jenereta. Tasol inap long las wik Sande pawa i dai gen.

Long las wik Elcom i salim pats bilong jenereta igo long Mosbi long ol i stretim na dispela em tupela liklik bekap jenereta we i bagarap. I nogat taim o tok klia long wanem taim bai dispela jenereta bai orait long Mosbi na ol bai salim i go bek.

Elcom tu i no toksave long wanem taim ol bai putim pawa i go bek na dispela i mekim ol pipel i paul olgeta na wet tasol i stap.

Planti samting bilong Elcom tu i olupela na lapun nabaut na i no inap wok gut na ol pipel i tok kain hevi olsem bai mekim Aitape i stap long tudak longpela taim.

Presentesen Sistas kirapim Yut Stadi Grup progrem long Malol

ADAM ELLIOTT i raitim

KOMYUNITI bilong Presentesen Sistas i wok long go het long wanpela Yut Stadi Grup (YSG) progrem long Malol long helpim ol yangpela bilong Malol Peris long helpim ol painim gut-pela sindaun.

Ol i bin kirapim dispela progrem bihain tasol long Julai 17 1998 sunami bihainim askim i kam long ol yangpela bilong dispela peris.

Sista Magaret Conway bilong Presentesen Sistas long Katolik Misin Malol, i tok moa long 250 ol yangpela em krismas bilong ol namel long 13 na 30 nau i stap insait long dispela YSG progrem.

Sista Conway i tok ol dispela yangpela i bin kisim sampela kain bagarap long 1998 sunami. Em i tok planti i lusim papa, mama, brata, susa, ol wanblut na planti ol arapela samting we i save sapotim laip bilong ol.

Sista Magaret Conway i tok dispela hevi i fosim ol long go stap long nupela hap na planti i no save hau ol i ken bringim bek gutpela sindaun long laip bilong ol.

Bihainim dispela askim bilong ol yangpela, ol i bin holim wanpela miting wantaim ol we tingting bilong fomim dispela Yut Stadi Grup (YSG) i bin kamap.

Dispela YSG i helpim ol yangpela long Rilijes Edukesen long olgeta de i karamapim ol topik olsem baibel stadi, lituji na ol samting olsem.

YSG i givim skul tu long tok Inglis, Mets, Komes na ol i lainim ol tu long musik na spot olsem soka, volibal na sofbal.

Antap long dispela ol yangpela wokim tu ol projek olsem stretim rot, wokim kanu bilong trenspot i go long

YSG senta na klinim ol baret wara long Malol i go long Arop long ol pipia sunami i bin kapsaitim.

Ol i helpim tu long brukim na rausim ol olupela skul bilding long ol olupela skul long nambis na stretim gen YSG senta.

Sista Magaret Conway i tok long 1999 em i bin spending tripela wik long Malol na wan wik long Arop, na dispela yia Bruda Theo (CSSP) i bin joinim em long givim skul long helt na spot. Em i tok em wanpela na em i painim hat long trevel i go i kam.

Ol i bin holim wanpela miting long dispela na nau ol yangpela bilong Arop na Waurain i save kam slip long YSG senta long wanwan wik na Fraide ol i save go bek long ples long wiken.

Sista Conway i tok ol 65 olgeta i save kam slip long kisim skul na ples slip into inap, tasol Malol.

Peris Kaunsel i givim pinis tok orait long ol long yusim pastrel senta.

Em i tok ol yangpela nau i sanap wantaim hama na nil long stretim pastrel senta bai ol i ken slip long en na i luk olsem bai redi long sampela taim long mun Oktoba.

Sista Magaret Conway i tok helpim mani bilong dispela progrem i kam long ol lain insait long Aitape yet na ovasis donas. Em i tok ol i yusim dispela ol donesen mani long kisim ol raiting matiriel, spotting gia na ol gita.

Sista Conway i givim bikpela tenkyu bilong em i go long bisop Austen Crapp, Rihebilitesen Komyuniti na ol arapela dona olsem ol skul, ol ogenaissen na wanwan ol manmeri long helpim bilong ol.

Sista Conway i tok dispela ol helpim i helpim tru ol yangpela bilong Malol Peris na ol i hamamas tru bikos ol i lainim samting we i ken givim sans long ol long painim gutpela sindaun.

Pacific Gold Studios

P.O. BOX 4470, BKO
FAX: (675) 3259395
EMAIL: pacgold@tiare.net.pg

proudly presents

BRAND NEW LOCAL RELEASES TO ROCK YOU INTO CHRISTMAS !!!

POM0189 RECCAE BRUKIM BUS	POM0191 P2UIF	POM0192 TOK PILAI TASOL	POM0193 KATIM KONA JOE
POM0194 QUAKES	POM0195 DUSTYS BAND	POM0196 HIGHER VISION	POM0197 VUNAIRIMA VOICES
POM0198 CHRISTIAN ARMY	POM0199 WHITE HOPE XMAS	POM0200 COVENANT PRAISE	POM0201 NEIL JOHN



SAUTEN



RIJON



Sios strongim Peter ToRot skul long Tapini

DANIEL MONA i raitim

Embasada bilong Pope John Paul 2 Asbisop Hanz Schwemer i tokim ol sumatin husat i bin pinisim gret 10 long Tapini Hai Skul insait long Sentral provins long senim pasin nogut bilong ol Goilala insait long kantri.

Em i bin go pas long Tapini long opim tupela nupela haus bilong ol tisa bilong Peter ToRot Komyuniti Skul na opim nupela stoa bilong misin long taun.

Em i tokim ol osem ol i mas soim gutpela pasin bilong Jisas Kraist long laip bilong ol na mas bihanim ol skul bilong kamap osem gutpela manmeri long laip bilong ol.

Em i tok skul em i bikpela samting na sapos yangpela man o meri i no wokim dispela kain skul em i no inap save long wanem samting i kamap long wanwan de insait long kantri na skul bilong rit na rait i bikpela samting ol pikinini mas i gat save long en.

Em i tok em i save kantri bilong yumi i gat bikpela hevi tasol insait long yumi em i no wanpela hevi. Em i tok hevi em asua bilong ol lida na yumi yet yumi i wok long bagarapim yumi yet long tok giaman, stilim mani bilong Gavman na wokim kain kain pasin we em i no stret tumas.

Em i tok sapos kantri i ken kamap gut em mas bihanim kristen pasin we yumi i ken wokim wok bilong yumi long stretpela kristen pasin.

Em i tok sapos Papua Niugini i laik go het moa em mas bihanim rot stret na em mas putim ol laip



• Ol skul pikinini long Tapini Komyuniti Skul i putim kamap wanpela drama pilai na ol bikman bilong sios wantaim Bisop bilong Bereina wantaim ol papamama long komyuniti i sindaun na lukluk. Poto Daniel Mona

na tingting bilong ol pipel i go pas long olgeta samting.

Bikpela hevi i kam nau long kantri bilong yumi em i asua bilong yumi yet. Dispela ol samting em osem long prais bilong ol samting long stoa i go antap, ol bisnis

i painim hat tru long wokim wok, nogat wok, na i no gutpela rot long wokim bisnis insait long kantri.

Bisop Schweimer tok ol Sista bilong Mary Help of Christians bai i kam long Tapini long yia 2002 long helpim ol skul long kamap tisa na lukautim ol sumatin. Em i tok skul bai kisim helpim bilong sios osem ples Goilala em sios bilong Katolik na sios i save tok ol Goilala ol lain

bilong kilim ol man na wokim kainkain trabel long Mosbi.

Tapini Skul bin op long yia 1984 na Praim Minista Sir Julius Chan i bin opim long Tapini na em i skul we Komyuniti na Gavman i go pas long mekim. Skul em i han mak bilong olupela memba bilong Goilala Louis Mona husat i dai pinis long 1999.

Pater Brian Chahill em i siaman bilong skul nau na namba tu siaman em Lawrence Ivolo na tu het masta bilong Peter Torot Komyuniti Skul. Ol narapela skul memba em Perai Manai, Joe Merusa, Raymond Keni, Peter Maia, James Komae, Morris Oki, Misis Manai, Gabriel Ivolo, na Daniel Mona.

Mosbi plis kisim tupela nupela ka

AUSAID i givim tupela nupela ka long ol plis long Mosbi long patrolim Magi na Hiritano haiwe insait long Sentrel Provins.

Tupela ka ya i hap bilong 13-pela ol niupela ka we AUSAID i bin donetim i go long plis konstabulari.

Ol plis bai yusim tupela ka ya long patrolim haiwe bihain long planti ol stii pasin i bin kamap long hap.

Ekting Plis Komisina, Joseph Kupo i bin givim ki bilong tupela nupela ka i go long Metropolitan Suprintenden, John Maru na Sentrel Provins Polis Komanda Suprintenden Nema Mondia na tok dispela tupela ka bai helpim ol plis long wok bilong ol.

Mista Kupo i tok ol haiwe patrol yunit husat save ron long haiwe i olupela pinis na dispela ol nupela karbai mekim isi long ol polisman long karamapim bikpela eria bilong Sentrel Provins.

Tupela nupela ka bai helpim ol plisman husat save patrolim Doa plantesen, Bereina na haiwe we i ron igo insait long Malalaua long Galp Provins.

Mista Maru husat i bin go wantaim Mista Mondia long kisim ka long Mista Kupo i tok em i wari long Magi na Hiritano haiwe bikos rot i bagarap na ol kar bai bagarap hariap tru sapos ol atoriti i no stretim rot klostutaim.

Ol Katolik Yut lida givim petisen long gavman

OL YUT lida bilong Mosbi Katolik Yut i bin prisenim wanpela petisen i go long gavman we ol i no wanbel long pasin pamuk i mas kam aninit long lo bilong kantri.

Dispela i min osem sapos gavman i givim tok orait, em bai orait long karimaut pasin pamuk.

Ol arapela samting we petisen i karamapim em long praveitasesen we gavman i laik salim ol aset o bodi we i save givim sevis i go long pablik, pasin we plis i save paitim na mekim nogut long ol man i wokim rong na Integriti Bil long ol politikel pati.

Ol yut i bin prisenim petisen long Oposisen lida Bill Skate taim em i pasim tripela de Evaluesen na Plening bung long las Sande.

Sosel Konsens komiti bilong Katolik Yut Kaunsil i bin makim maus na tok pablik i mas lukim, glasim na skelim ol tingting pastaim bipo palamen i givim tok orait long dispela samting.

Ol yut i laik save watpo na gavman i laik mekim pasin pamuk i kam aninit long lo bikos dispela i egens long pasin Kristen na ol gutpela pasin.

Ol yut i bin sutim tok long gavman long ol kain hevi i wok long kamap, prais bilong ol samting i go antap na ol manmeri i wokim pasin pamuk.

Ol yut i tok long tingting we gavman

i laik salim i go long han bilong ol praveit kampani ol aset bilong em, dispela i no gutpela. Ol i tok prais bilong ol samting bai go antap taim gavman i oraitim praveitasesen long kamap.

Long pasin we ol plis i save paitim ol yut taim ol i wokim trabel, ol i tok bikos fi bilong kisim ol loya i go antap na hevi bilong mani i sot i stap, ol yut i no inap kisim ol loya long makim ol taim dispela kain samting i kamap.

Long Integriti Bil bilong ol Politikel Pati, ol yut i singaut long kamapim lo we bai stapim ol memba long kalap long wanpela pait i go long narapela osem ol liklik manki i krai long loli na sispo. Na ol bai stap isi.

Ol i laikim tu gavman i mas stap long pawa long tupela yia na ol i ken ranim gut kantri. Ol i tok 18-pela mun bilong gavman i stap bipo vot i nogat bilip long en i kamap i sotpela taim tumas na i no gutpela.


Praim Minista Sir Mekere Morauta i bin givim K10,000 long sapatim ol yut program na ol i amamas.

Ol bin tok dispela ol hevi we ol yut i bungim em ol i mas kamaut long ples klia.

Bung bilong ol Katolik Yut long Mosbi Asdaosis i bin stat long Fraide Novemba 3 na pinis long Sande Novemba 5.

Krismas FOODWORLD Spesols!

Ilimo Kwikkai 900gr	K3.98		Gravox Asst. 200gr	K2.09	
Pork Sausages	K4.95 kg	Supa Spesol Prais!	Hiway Beef Biscuits 130gr	K0.58	
Maggi Noodles 85gr	K0.50t		Roots Rice 1kg	K1.43	
Rosella Tomato Sauce 300ml	K2.32		Tartan Loose Soap 75gr	K0.30	
Globe Corned Beef Taper 340gr	K2.59		Suncrush Cordial 750ml	K1.98	
Zenag Eggs per doz 55gr	K2.78		King Cooking Oil 250ml	K0.99	
<div style="display: flex; justify-content: space-between; align-items: center;"> <div style="text-align: center;"> <p><i>Selebretim Krismas long Boroko Foodworld Supa Krismas Spesol!</i></p> </div> <div style="border: 1px solid black; padding: 5px; text-align: center;"> <p>EXTENDED TRADING HOURS Monday to Wednesday - 8.00am to 7.30pm Thursday / Friday - 8.00am to 8.00pm Saturday / Sunday - 8.00am to</p> </div> </div>					
<p>Planti moa kaikai prais i go daun long en! Ph: 325 7566, 325 0863 Fax: 325 7096</p>					



HAILANS NUIS



Ol paiaman long Mendi mekim wok painimaut

OL PAIAMAN long Westen Hailans i go het long ol wok painimaut long paia we i bin kukim wanpela haus kaikai long Saina taun long Waghi peret.

Ol i bilip olsempaia i bin stat bihain long wanpela wokman i bin putim on ges kuka bilong en long narapela nait na i no pasim gut.

Bos bilong ol plisman long Westen Hailans Tony Wagambie i tok ol plisman bilong em i wok gut wantaim ol paiaman long traime painim wanem

samting tru i kamapim paia long en tasol i kam inap nau ol i no painim wanpela samting.

Bos bilong ol paiaman long Westen Hailans Bal Kena i no autim sampela toktok tasol em i tok ol wok painimaut i go het na ol bai givim ripot long dispela samting bihain.

Haus kaikai ya i hasp long Lolipop stoa na em i wanpela olupela supamakot long Hagen.

Stoa ya i bilong Bromley Manton stoa grup.



Ol lain wantaim stail • Ol lain long Hailans i soim tru kala bilong bilas na stail bilong danis long Goroka so. Foto: SAPE METTA.

Mendi laikim namba tu beng

JOE KANEKANE i raitim

OL I strongim ol bikpela beng long kantri long opim han bilong ol long Sauten Hailans long sevim planti pipel husat i laik yusim sevis bilong ol beng.

Etministreta bilong Sauten Hailans Pila Niningi i tok provins i gat wanpela beng tasol na planti pipel i save kisim longpela taim long wet na namba tu beng i ken helpim na daunim dispela hevi.

Mista Niningi i tok em gat wanpela opis i stap nating na sapos sampela beng i gat laik long opim han long Isten Hailans, ol i ken toktok long Mista Niningi long en.

Em i tok taun i gat planti bisnis na i gat nit long narapela beng moa i mas kamap long daunim hevi we PNG Benking Koporesen em wanpela beng tasol long provins i save bungim taim ol kastoma i save pulapim beng olgeta taim.

Wespak i bin pasim

brens bilong em long Isten Hailans sampela krismas i go pinis bihainim ol hevi long hap.

Mista Niningi i tok wanpela samting we em i lukim kamap long provins em long kirapim laik bilong ol bisnis kampani long opim opis bilong ol long provins.

Em i tok planti lain i save ting olsem Mendi i nogat planti gutpela samting long en tasol Mista Niningi i tok dispela i no tru. Na em laik wokim ol samting bilong rausim ol dispela ting-

ing na mendi bai kamap na ol man i no moa lukim em olsem wanpela taun i stap longwe moa.

Em i tok em wok long toktok wantaim ol meja ka kampani long kirapim beis bilong ol long Mendi na em i gat graun na opis i redi i stap we ol i ken yusim long en.

Em bin tokaut tu olsem ol bai putim ta long ol rot insait long Mendi taun na ol bai kisim wanpela kontrakta long karimaut dispela wok.

Nogat mani na Redio Goroka i pas

SAPE METTA i raitim

LOKOL NBC redio stesin bilong Goroka - Karai Bilong Kumul (KBK) i pas na stapim olgeta wok brodkas inap mun foapela olgeta nau bikos i nogat mani long helpim na karimaut ol wok brodkas sevis bilong en.

Redio KBK husat i save givim sevis long ol lokol pipel bilong Isten Hailans i bin pas na stapim operesen long mun Ogas. na stesin bai i stap pas yet sapos i nogat mani long helpim em long operet.

Stesin progrens menesa Tonka Nonao i tok redio Goroka bai i no inap long wok inap em i kisim sampela fans na helpim i kam long Isten Hailans Provinsal Gavman.

Em i tok redio KBK i save sanap strong na mekim wok i go het bikos Isten Hailans gavman i save givim bikpela sapot na

stesin i save ronim gut ol wok bilong en.

Tasol long dispela yia Isten Hailans gavman i no givim kain sapot olsem ol i save givim long ol yia i go pinis olsem na long dispela as redio stesin i pas," Mista Nonao i tok.

Em i tok nem yet KBK redio stesin i kisim taim stret long wanem Telikom, Elcom na Taun Atoriti i go insait na rausim olgeta komunikesen, pawa na wara saplai sevis bikos ol i luksave olsem redio stesin i nogat mani long baim ol dispela sevis em ol i wok long yusim.

Mista Nonao husat i bin wok wantaim NBC redio sevis inap moa long 30 krismas i tok long ol yia i go pinis ol redio stesin i no save bungim kain hevi. Tasol taim ol gavman i bin senis i go i kam na kamapim ol kankain rifom sistem i bagarapim tru planti gutpela sevis em ol pipel i save kisim na redio sevis em i

wanpela long ol.

Em i tok nau yet em wantaim 12-pela wokman na meri bilong em i no mekim wok. Ol i stap nating tasol na kisim ful pe long olgeta fotnait.

"Mipela i amamas long mekim ol wok sapos i gat wok. Na sapos i nogat wok mipela i pilim wankain tasol. Na em wari bilong husat? Mista Nanao i askim. Em i tok, stesin em i stap na wok em ol i ken mekim, tasol helpim i stap we.

Mista Nonao i mekim askim i go long Isten Hailans provinsal gavman long kamap wantaim sampela helpim na fanim Redio KBK long i go bek long operesen na givim sevis i go long ol likol pipel bilong Isten Hailans. Em i tok sapos Isten hailans gavman i ken sapotim Redio Goroka wantaim K60,000 em bai i ken helpim redio stesin i karimaut ol wok brodkas bilong en i go inap long pinis bilong yia 2001.

Lutheran sios i kamap long Yoyo - Haga viles

LONG Novemba 1996, ol viles komyuniti long Kuru maunten long Fayantina eria insait long Isten Hailans i bin wokbung wantaim na kamapim planti bikpela hatwok tru, na dispela hatwok bilong ol i karimaut kaikei we rurel viles wara saplai bilong ol i ron na tu long sem taim

ol i bin opim wanpela nupela edpos long givim gutpela sevis long ol.

Maski sapos em i bus eria, ol pipel long dispela eria i gat gutpela tingting long kamapim ol samting na lukautim ol yet gut na tu kamapim gutpela sindaun insait long viles komyuniti. Long wik i go pinis

klostu long dispela eria long Kuru maunten wankain pasin i bin kama, tasol dispela taim ol pipel long dispela ol viles i lukim opening bilong wanpela nupela Lutheran haus lotu long Yoyo-Haga viles.

ELCPNG i bin i go insait na putim ap wanpela haus lotu long hap

long 1992. Na i kam antap long 1999, ol kongregesen i lukim olsem dispela olupela haus lotu i mas i go daun na nupela bilding i mas kirap na sanap. Wanpela krismas pinis na dispela tingting bilong ol kongregesen bilong Yoyo-Haga Lutheran sios i no popaia.

always hit the spot!

Arrow Beef



MADANG NIUS



Plis sasim opisa bilong Jacob Wama

BEN TAUMAI i raitim

Madang plis i holim na sasim Gabriel Poska long paulim K100,000 bilong stet long las wik Mande. Mista Poska em ilektorel opisa bilong Madang memba Jacob Wama.

Em ibin kamap long Madang Distrik Kot long Tunde las wik we mejistret i surukim kot bilong em i go moa long Novemba 20 long dispela mun. Bikman ya i bilong Bukuendon

ples, Yangoru, Is Sepik provins.

Plis i tok long tupela taim long Jun 29 na Julai 6, 1999 man ya i bin rausim K50,000 tupela taim. Dispeal mani i bilong Geming Bod. Ol sek namba em i yusim long rausim ol dispela mani em, 135578 na 135569 we i bin go insait long pasbuk namba 1000069101.

Poska i baim kot long K1,000 na plis i tok ol i wok long sekim yet dispela ripot na inap sasim tupela man moa.



• Dogia Komyuniti skul i bin kisim wanpela dabol klasrum na wanpela lonmowa bilong katim gras i kam long Madang open memba Jacob Wama. Foto: ROBERT KAIA.

Ol papa long Krangkret i wet yet long mani bilong ol

KIWURAM KANAKO i raitim

OL papa bilong Krangkret Ailan husat i bin putim mani long dispela Asia/Pacific War Redress Association i wet longpela taim pinis long kisim mani bilong ol i kam long gavman bilong Japan long ol birua na bagarap we ol i kisim long han bilong ol ami bilong Japan long Namba tu bikpela pait bilong wol woa 2.

"Mipela i wok long wet yet. Sampela bilong mipela i dai pinis. Mipela sampela i wet yet. Mipela i laikim gutpela toksave i kam long dispela grup we Gabriel Laku i go pas long en. Planti taim mipela save harim olsem dispela taim bai mipela i kisim mani bilong mipela. Tasol mipela i no save kisim. Mipela i tingting planti, nogut ol i giamanin mipela. Dispela i no stret na save bagarapim tingting," Mista Anis Dong i tok.

Mista Dong i surukim tok na tokim Wantok nius olsem ol bin lusim bikpela mani pinis. Samting olsem 100 manmeri long Krangkret Ailan i givim mani i go long komiti i stap long Madang.

"Mipela givim namel long K20 na K40 na mipela i wet yet. nau mipela i no harim wanpela klipela toktok i kam long dispela komiti i stap long Madang. Mipela i ting olsem ol sutim nus bilong mipela pinis. Mipela i no save wanem kain toktok em. Praim

Minista Sir Mekere Morauta i bin paitim wantaim Praim Minista bilong Japan. Mipela i gat rait long harim," Mista Dong i tok.

Tasol Wantok niuspepa i bin raitim wanpela stori long namel bilong dispela yia pinis we em i tok olsem opis bilong Praim Minista i no save sapos Sir Mekere i bin paitim dispela bikpela toktok wantaim wanwok bilong em long Japan long las kris-mas taim Sir Mekere i bin go long Japan.

Long wankain taim, planti manmeri bilong Bogia, Ramu na Raikos i wari olsem ol i wet longpela taim tumas long lukim kaikai bilong singaut bilong ol i go long gavman bilong Papua Niugini na Japan.

"Mipela i no singautim ol Japan ami long kam na pait long kantri. Mipela belhat long pasin nogut ol bin mekim long ol tumbuna, papa, mama, brata na susa bilong mipela. Sampela ol i kilim i dai nating. Sampela soldia i mekim pasin nogut long ol meri long taim bilong pait. Ol i rabisim mipela nogut tru. Japan gavman i mas baim pekato bilong ol soldia bilong en," Mista Dong i tokim Wantok niuspepa.

Nau yet olgeta lain husat i givim nem na mani pinis long ol wanwan komiti bilong PNG Asia Pacific War Redress Association i mas wet yet hiko's nau yet i nogut wanpela klia toktok long wanem samting bai kamap long dispela askim bilong ol pipel long kantri.

6-pela distrik edministreta no amamas

SIKSPELA distrik edministreta bilong Madang i raitim petisen pepa i go long Madang Provinsal Edministreta Clant Alok long i noken westim taim tasol go het hariap long stretim posisen na wok bilong ol pablik sevans long Madang Provinsal Edministretiv Rifom straksa.

Ol 6-pela distrik edministreta ya em, Alung Wang long Sumkar, Chapau Lili long Raikos, Bonga Timula long Usino Bundi na Peter Lavidah long Midel Ramu, George Chapok long Madang na Camillus Dugumi long Bogia.

Ol i raitim long petisen olsem

ol i no amamas long bikpela taim i lus nating-na ol i wokman i wok long wet longpela taim i kam long posisen bilong ol aninit long nupela rifom straksa. Ol i tok tu olsem provinsal PEA eksekutiv i no save toktok tu wantaim ol long kain senis olsem na dispela kain senis i no save makim tru sapat bilong ol.

Pepa bilong ol i tok senis we i kamap i bin kamap tasol long tingting na sapat bilong ol wok-lain long provinsal hetkota we ol i harim toktok bilong sampela lain husat i gat ol sas long wok bilong ol o i gat hevi nau long

eksen bilong edministresen yet. PEA i no bin toktok wantaim ol distrik edministresen woklain husat tu em ol memba long dispela samting olsem na eksen bilong ol i nogat sapat.

6-pela distrik edministreta i laikim olsem ol toktok i stap long pepa ya i mas go long Dipatmen bilong Pesenel Menesmen.

Tasol Wantok i save olsem seleksen bilong ol sinia opisa i kamap na pinis na nau ol bai i go insait long ol posisen bilong ol midel menesmen na ol lowa level opisa sampela taim long dispela mun.

Asples kampani winim saplai kontrak

MADANG Provinsal Gavman i givim wanpela bisnis kontrak long Mamose Schools Suppliers kampani long saplain ol skul sating long ol elementri, komyuniti na ol praimeri skul insait long provins.

Provinsal Edministreta Clant Alok i tok provinsal tendas bod i givim dispela kontrak long kampani ya bikos long gutpela wok bilong em bipo i kam wantaim provinsal gavman. Na tu dispela kampani i save stap long Madang na i bin gat gutpela wok na rekot bilong em we mipela olgeta i luksave long en las yia, Mista Alok i tok.

Mista Alok i no tokaut amas tru dispela kontrak i kos tasol em i tok bai kontrak ya i stap inap wanpela krismas tasol na bihain ol bai glasim na skelim gen long neks yia.

Papa bilong dispela kampani em olpela Nesene! Sels Menesa wantaim Kristen Press long Madang.

Papa bilong kampani na Menesing Dairekta Pius Bugatar i tokim Provinsal Edministreta na eking

Gavana Pengau Nengo olsem kampani bilong em bai wok strong na traim long bihainim ol toktok i stap insait long kontrak. Dispela em bikos edukesen em bikpela samting long ol yangpela bilong yumi long bihain taim. Gutpela edukesen em ki bilong ol gutpela samting i kamap olsem na kampani bilong mi i bilip long dispela na mipela wok hat wankain olsem mi bin mekim bipo taim mi stap wantaim Kristen Press, Mista Bugatar i tok.

Em i tok edukesen long ol provins olsem Madang, Sentrel, Nu Ailan na Morobe i bin kam long longpela rot na i bin kamap gut olsem na i mas gat moa taim na strong i go long edukesen long mekim em i ken go gut moa yet.

Em i tok amamas long Madang Provinsal Gavman long i gat bilip long em na givim em dispela kontrak na em bai wok hat long mekim wok bilong em gut long sapatim na strongim edukesen long provins.

Amele musik i pairap i go yet

AMELE eria bilong Madang i gat planti kainkain nem olsem stori bilong Amele ailan. Samting tru, i nogat wanpela ailan o solwara long Amele.

Nem Fulumu em i no nem bilong Madang. Nogat nem i kam long hap bilong Morobe. Orait long Amele yet, biknem musik lain Wali Hits i kalap i go antap na kilim i dai ol arapela biknem musik grup olsem Kales Gadagads, Old Dog na Off Beats, Dofuns, Odd Forms na planti arapela.

Junia Wali Hits i kukim ol manmeri yet wantaim singsing - stil wetim yu. Em pawa bilong ol manki Wali (Ohiss Mel) we ol meri Wali (Ohiss Melaid) i save tok 'Ain Bust' (Noken wari long ol samting). Nau yet narapela nupela musik lain i kamap gen na ol i gat nem we i kraipani liklik long iau.

Mala Hiffzz. Na ol bilong ples Ayab long Amele yet. Noken tingting tumas long nem bilong ol, tasol traim skelim musik. Sapos lek i laik kirapim das, em yu yet nau. Tru tumas, musik bilong ol i save sindaun gut taim yu laik malolo long apinun wantaim ol sotpela meri i gat yelopela hat ya.

Ol wantok Amele husat i wok wantaim Downer Construction long Jefkot Haiwe i tok olsem Mala Hiffzz musik save kilim i dai ol pen long bodi bilong ol man husat save wok wantaim ol traipela masin olsem bulldosa.

Dispela musik grup i stat olsem wanpela yut grup bilong Luteran sios long yia 1980 na i kam. Ol i save go pilai gita na singsing long ol bikpela kibung bilong sios na tu long taim bilong nambawan Komunio, Konfemasio, krismas nait na arapela.

Bilong wanem tru na Mala Hiffzz i no bin katim ol lotu singsing wantaim Tumbuna Treks? Kwens Bui, man husat i go pas long 'Mala Hiffzz' i bekim.

"Mipela i lukim olsem i no gat planti manmeri i save laik harim ol lotu singsing, olsem na mipela katim ol singsing bilong danis stret. Tasol, mipela bai lukluk long bihain na katim ol gutpela lotu singsing mipela save singsing pastaim."

Mista Bui i tokim Wantok olsem nambawan kaset ol i bin givim long Tumbuna Tracks em i gat ol lotu singsing long en. Tasol taim ol i lukim olsem i gat gutpela maket bilong ol lotu singsing, ol bai katim wanpela kaset we ol bai putim ol lotu singsing.

Olsem ol arapela grup husat i kam katim ol singsing wantaim Tumbuna Tracks, 'Mala Hiffzz' i bilip long strongim 'Musik bilong Madang' na wok bung wantaim tumbuna Tracks studio.

"Mipela amamas long luksave olsem Tumbuna Tracks Studio i wok gut wantaim mipela long kamapim nupela musik albam. Mipela kamapim nupela musik albam. Mipela i luksave tu olsem TTS i traim long mekim musik bilong Madang i go kamap bikpela. Em strongim mipela long go het na holim strong 'Wali Stail' Mista Bui i tokim Wantok."

Mala Hiffzz i bihainim lek mak bilong Sail Barua. Sail Barua em save kirapim skin na das wantaim ol mambu na gita. Yu inap harim dispela Old Bank long redio Madang. Na ol dispela lain i kamap tu long ples, Ayab, Wali kantri Amele.

Olsem na sapos yu laik sindaun isi na harim ol gutpela singsing bilong 'Mala Hiffzz', traim tingim sapos yu wanpela manki bilong ples na pren meri

bilong yu em wanpela skul meri na save raitim pas long yu long tok Inglis na save Inglis tasol long yu! Orait sindaun na harim 'Sukul na Bilimig'.

Olsem wanpela meri i tokim mi. Brata nau mipela ol meri long ples i laik save long tok Inglis olsem na mipela wok hat long skul. Bipo em ol man save Inglis na mipela save hangamap. Nau mipela bai bekim dinau. Sapos yu no save long tok Inglis, em "asua bilong yu" olsem edwin bafis i singsing pinis. Olsem na susa hia i tok, ol pikinini man i mas skul gut na noken bikhet. Wankain olsem 'Hitsy Golo i tok. "Pinisim skul pastaim em bai rait olgeta." Long 'lainim gut tok Inglis na bai ol meri bai hangamap long yupela."

Narapela gutpela singsing bilong bringim lewa bilong yu i go bek long ples, em long 'yu Wengul'. Sapos yu stap long Koroba (SHP), Sidest ailan (MBP), Emirau (NIP) o long Bauvan ailan (Manus) ating bai yu kraip na kus pundaun taim yu harim 'Yo Wengul'. Em bilong toksave olsem yu mas tingim asples bilong yu. Noken harim tasol yu Wengul, nogat holim wanpela wara mambu na dai isi isi.

I gat 10-pela singsing i stap long dispela kaset na 9-pela singsing i stap long tokples Amele na tokpisin. Wanpela singsing tasol i stap long tokples Raikos.

Mista Bui i tok tenkyu i go long ol papa bilong Mala Bet Klen long givim tok orait long ol long katim dispela tupela singsing em long 'Yo Wengul' na 'Yomkom Galea'. Mala Hiffzz tu tok tenkyu long Chris Seeto, Demas Saul, Udd Banag na Jacob Kanage bilong Tumbuna Tracks Studios

Lae Nius

Wenge i no amamas long dai bilong waitmeri

DAI bilong wanpela waitmeri long Lae long dispela wik Mande i no bin stret long bel na tingting bilong Morobe Gavana Luther Wenge.

Waitmeri ya em Helen Susanne Nish, krismas bilong em 44 na em bilong Victoria long Australia. Na em j save wok wantaim Brian Bell long Lae olsem menesa.

Ripot i tok taim olsem hap pas 8 long moning (8.30am) em i bin go long Brian Bell stua long Eriku long kisim ol mani bilong wiken na i bin kam bek long opis bilong em long Maekula strit we dispela birua i bungim em.

Taim em i bin kamap klostu long ples bilong stapim ka, 5-pela yangpela man i ron i kam long ka bilong em wantaim wanpela pistol (sotgan) na longpela naip. Tripela

narapela lain i bin stap insait long wanpela ka we ol j stilim na ol i draiv i go fowet long meri ya na baim em long sait bilong boskru.

Meri ya i no inap long go ausait long ka bilong em hariap bikos ol lain nogut ya i tok strong long em i mas go ausait long ka na ol sutim em long sotgan long raitan solda bilong em na tu ol i sutim em long naip long beksait bilong em.

Ol dispela trabel lain i ronawe long stil ka wantaim ol mani mak olsem K1618.09 na ol sekmani we ol i kisim long ka bilong waitmeri ya.

Ol lain i helpim em na kisim em i go hariap long Tusa Medical Centre tasol em i dai bikos em i no bin pulim gut win inap em i bin go kamap long klinik.

Bai bodi bilong em i go bek long Australia we ol famili bilong em bai planim.

Plis long Lae i askim olgeta lain long helpim long painim ol dispela stil lain na ol man nogut ya.

Mi no amamas tru long dispela birua, Gavana Luther Wenge i tok. Mi salim tok sori bilong em i go long famili na ol wanwok bilong leit Mis Nish.

Ol bisnis komyuniti i save givim planti mani long dispela siti olsem na mipela i mas lukautim ol gut. Ol raskol, plis noken stil long ol dispela bisnis o bagarapim ol wokman bilong ol bikos ol tasol i save baim takis long ol marasin mipela i save kisim long ol haus sik na yu no save, nogut yu tu bai kisim marasin long haus sik long bihain taim, Gavana Wenge i tok.

Ol fama kisim kakao draia

ELLEN VAVITAN TIAMU
i raitim

TRIPELA ples insait long Morobe provins i kisim pinis wanwan kakao draia bilong helpim wok bilong kirapim kakao insait long provins.

Tripela ples ya em long Mare long Makam distrik Apo long Labuta distrik na Otokai long Hube distrik.

Bosman i go pas long wok bilong kakao na kopra insait long Morobe provins, Peter Homu i tok dispela givim bilong tripela draia o fermenti i bihainim tingting bilong ol long kirapim na mekim bikpela wok bilong kakao insait long provins.

Em tok dispela helpim em bilong helpim wok bilong ol lik-

lik fama insait long provins bai ol i ken amamas na tingting strong moa long wok.

Dispela ol tripela nambawan draia em PNG Kakao na Kokonas Extension Agency i givim i go long ol ples long provins we ol i painim hat long draia bilong draim ol kakao bins bilong ol.

Kokoa Bod long dispela yia i givim pinis samting oslem 300,000 pikinini diwai kalsa i go pinis long ol liklik fama long olgeta hap bilong provins na as tingting bilong ol nau em long helpim wantaim draia.

Morobe nau i wok long kamapim olsem 1000 ton kakao long wanwan yia 400 tan i kam long ol liklik fama long ples na 600 i kam long ol plentesen.

Insait long 10-pela yia klostu olsem 1,500 na 1,600 hekta kakao ol i planim pinis long provins tasol Mista Homu i tok prodaksen o wok bilong kamapim planti kakao i no kamap gut long wanem i gat sampela hevi o wari i stap.

Sampela ol dispela wari em long helpim i kam long ol save-man bilong wok kakao i nogat i nogat ol lain bilong baim kakao bin i no gat draia bilong draim bin na i nogat trenspot long kisim ol bin i kam long Lae o ol hapwe ol i ken salim kakao.

"Morobe nau i ken winim ol provins oslem Is Niu Briten na Not Solomon long wok bilong kakao sapos yumi wok gut," Mista Homu i tok.

Praim Minista rausim tupela Morobe lida

YAKAM KELO i raitim

GAVMAN bilong Sir Mekere i rausim pinis tupela Morobe lida long wok Minista bilong em. Tupela Morobe lida ya em Mao Zeming memba bilong Tewae Siassi na memba bilong Finsafen Alfred Pogo.

Mista Zeming i bin namba tu Praim Minista na holim wok olsem Minista bilong Agrikalsa na Laivstok. Em i namba tu lida bilong Pipels Demokratik Muvmen (PDM) pati na PDM bai bung bihain long tokaut sapos Mista Zeming i ken holim yet wok bilong namba tu lida bilong PDM o nogat.

Alfred Pogo em PDM memba na i bin holim wok olsem Minista bilong Woks na Implimentesen.

Praim Minista i bin rausim ol tupela wantaim arapela arapela Minista long wok bilong ol long las wik bikos i gat tok olsem ol sampela PDM memba i bin pasim tok wantaim arapela pati memba long salensim Gavman long wanpela mosen. Dispela mosen em long surukim bung bilong Palamen i go long Jenuari 23, 2001 long neks yia. Sapos dispela mosen i bin kamap tru, bai i nogat palamen bung long dispela mun i

go inap Jenuari neks yia. Bai i nogat bung tu long kamapim nesanel baset bilong 2001 na tu long pasim lo bilong Intagrity Bil bilong Politikel Pati na ol Kendidet.

Sir Mekere i tok em i bilip dispela salens i no inap kamap nating tasol sampela PDM memba insait long Gavman na pati bilong em yet i pasim tok wantaim ol arapela pati lain long mekim dispela salens long Gavman.

Insait long kabinet nau em memba bilong Makam Andrew Baing husat i kisim nupela wok Ministri olsem Jastis Minista na memba bilong Lae Bart Philemon tasol i stap insait.

Long Gavman sait em ol memba olsem Bart Philemon, Andrew Baing, Luther Wenge, Keneddy Wenge, Tukape Masani, Ginson Saonu na Samson Napo i stap insait.

Samson Napo i bin muv wantaim pati bilong Pangu pati long votim mosen we i salensim Gavman long las wik. Tasol nau Gavman i kisim bek Pangu pati na givim wok ministri long Pangu lida Chris Haiveta.

Tukape Masani i bin lusim lain bilong em long Oposisen na go joinim Gavman sotpela taim i go pinis.

Gavana Wenge abrusim vot i nogat bilip

....mosen i abrusim taim bilong rejista

MOROBE Gavana Luther Wenge bai kotim ol lain husat i raitim wanpela pepa we i tok em i mekim planti krangki samting long wok bilong provins.

Gavana Wenge i tok em skelim olsem dispela pepa i gat ol tok giaman tasol long en na dispela i bagarapim tru nem bilong em Gavman bilong em long Morobe provins.

I gat wanpela pepa sampela lain i kamapim na mekim sampela tok salens egensim Gavana Luther Wenge. Ol i raitim nem bilong ol kaunsil presiden na ol nesanel memba bilong Morobe provins long nesanel palamen long dispela pepa. Tasol ol dispela nem i nogat signesa o han mak bilong ol lain i gat nem long pepa.

Gavana Wenge i tok em i bilip olsem dispela em wok bilong ol jeles lain tasol long i laik bagarapim gut nem na wok bilong Morobe Gavman.

Sapos ol i laik salensim sia bilong mi olsem Gavana, ol i mas salensim mi long 2002 ileksen na i no ken kam long ol krangki rot olsem. Mi bin salensim Jerry Nalau long rot bilong ileksen tasol bikos mi gat rispek long em na mi mas salensim em long stretpela rot, Mista Wenge i tok.

Mi no kamap Gavana nating, mi em bon lida na dispela em presen Bikman i givim long mi, Gavana Wenge i tok.

Em i tok dispela pasin bilong mekim ol giaman hait tok salens em bikos long jeles pasin tasol long ol gutpela wok Gavman bilong i mekim. Nau i gat ol gutpela wok olsem Lae siti rot i kamap gut bikos Australia Gavman i ama-

mas long givim helpim long dispela Gavman, em i tok.

Gavana Wenge i tok maski ol dispela lain lida na memba i sainim dispela mosen pepa long bihain, em bai kotim olgeta long kot yet bikos i gat ol strongpela giaman toktok i stap long en na ol i skelim ol dispela pepa i go raun long planti lain pinis na dispela i bagarapim nem bilong mi wantaim gavman bilong mi. Olsem na nau yet ol i mas kam tok sore long mi bikos mi i givim toksave pinis long loya bilong mi long redim ol kot pepa bilong kotim husat lain i mekim dispela pasin long mi, em i tok.


Taim mi kotim ol, mi bai kisim bikpela mani long bagarap ol i kamapim long mi. Taim bilong ileksen tu i kam klostu na mi mas gat mani bilong baim ol posta bilong mi, Mista Wenge i tok.

Em i tok sampela toktok long dispela salens pepa i kamap bihainim toktok bilong em long kamapim lo bilong oraitim pasin pamuk long kantri. Tasol Mista Wenge i tok dispela toktok i go aut klia pinis na dispela toktok i sut long stretim o daunim hevi bilong sik AIDS i wok long kilim ol manmeri insait long kantri.

Em i tok tu olsem dispela pepa bai i no inap wok bikos taim bilong rejistaim long klek bilong asembli em i abrus pinis. Wanem mosen ol memba i laik kamapim i mas rejista 7-pela de pastaim long ol i tokaut long en long bung bilong asembli.

Gavana Wenge i tok de bilong rejista i abrus pinis na dispela mosen tu i abrus. Tasol man husat i go pas long raitim dispela salens pas tu i no klia yet.

trukai.
RICE



SAPOS NAMBA BILONG YU ISTAP LONG HIA.
YU WINIM K200

C00324373 A00244681 B00628944 A00383261
F00403110 C00032073 C00399238
E00446401 D00256434 E00548393

LONG KISIM PRAIS BILONG YU. GO LONG TRUKAI DISTRIBUTION CENTRE.

Yunaitet sios i opim 17 Jenerel Asembli Miting

LYNNE MINIRU i raitim

MOA long 400 manmeri i bin go lukim seremoni bilong opim 17th Jenerol Asembli Miting bilong Yunaitet Sios bilong Papua Niugini insait long Pot Mosbi long Sande igo pinis.

Modereta bilong Yunaitet Sios, rait Reveren Samson Lowa i bin go pas long toktok na welkamim ol sios memba long ol narapela distriks insait long kantri.

Insait long dispela bikipela bung i bin gat eitpela reginol bisop olsem Reveren laka Renagi (Hailens), Reveren Hasu Lokoloko (Wes/Galp), Reveren Tutmona Himata (Bogenvil), Reveren Gerson Kapman (Niu Ailan), na niupela bisop bilong Niu Briten rigen, Reveren Isikiel Tioti.

Ol narapela bikmanmeri husat bin kam lukim seremoni em Darekta bilong PNG Inpesmen Promosen Atoriti, Mista Gei Ilagi,

Sekreteri bilong Dipatmen ov DAL, Mista Miri Satae na meri bilong em na Presiden bilong Nesenol Kaunsil ov Wimen, Misis Susan Satae, Mista Jimmy Veneo na Mista Iga Kila bilong NBC, Mista Lohani Henao (Asosiet loya na Siaman bilong Not Seket), Mista Laeka Pukari (Siaman bilong Is seket wantaim meri bilong em, Ata Pukari).

I bin gat planti singsing lotu na pilai drama long amamasim na

opim bikipela miting bilong ol Yunaitet Sios long kantri.

Foapela seket bilong Yunaitet Sios insait long Pot Mosbi bai givim helpim long ronim gut program bilong miting long dispela tupela wik.

Nambawan sesen bilong Jenerol Asembli miting i bin stat long Mande 6 long ples Tatana ausait long Mosbi na wan wan de bai miting kamap long narapela narapela ples inap long de 17 bilong dispela mun.

Engliken sios long Mosbi i gat wanpela welfea kodineta.

HELLEN REI i raitim

ANGLIKEN Daioses long Pot Mosbi nau i gat wanpela ful taim welfea kodineta. Nem bilong en em Barbara Awaita.

Ms Awaita i save wok olsem nes na i holim wanpela basela digri long helt saiens long LaTrobe Univesiti long Melbon, Austrelia.

Ms Awaita i bilong ples Tufi na Wanigela long Oro Provins na i bin wok olsem welfea kodineta moa long tupela mun nau.

Ms Awaita tok wok bilong en em long go long ol kain ples olsem haus kalabus na ami bareks long givim toktok long HIV/AIDS, kari-maut awenes progrem, holim ol woksop na tu skulim ol manmeri long kisim gutpela kaikai long

lukautim bodi bilong ol na long abrusim ol bia na strongpela drink na simok nogut.

Ms Awaita i wok wantaim ol mama grup na ol yut grup tu we em i bilip bai helpim ol long bihainim stretpela pasin long lukautim ol yet.

Angliken Sios i kamapim dispela opis long helpim ol pipol bikos bipo em dispela kain opis i nogat na ol pipol i no save kisim helpim taim ol nidim help stret.

Ms Awaita i tok Angliken daioses i askim ol dona egensis long givim sapot long dispela prosek long go yet long tripela moa yia.

Mani bilong kamapim dispela prosek i bin kam long Prait Minista Sir Mekere Morauta taim em i go lukim lonsing bilong Petekos 2000 long Sen Mary's Sios long Gerehu long dispela yia.

Katolik sios i laik kirapim wok bilong skul

KATOLIK sios insait long Morobe provins i wok long lukluk strong long kirapim wok bilong edukesen o skul insait long provins.

Antap long wok bilong skulim ol tisa na ol sumatin, las wik ol i holim wanpela miting o skul we ol i lainim ol memba bilong bod ov gavana long sampela skul insait long provins long responsibiliti o wok bilong ol insait long ol skul wanwan.

Long yia antap (2001) bai i gat wankain skul gen bilong ol narapela memba bilong Bod.

33 manmeri i bin kamap long dispela miting we i bin stat long

Mande na i pinis long Fonde las wik.

Long pinis bilong bung long Fonde Bishop bilong Lae Diocese Bishop Henry Van Lieshaut i tokim ol sumatin olsem pasin bilong skul nau i no olsem bipo na wok bilong Bod ov Menesmen long ol skul em i impotant sapos skul bai i raun gut.

"Yupela mas save long pawa bilong yupela na we bilong stretim wari insait long ol wanwan skul bilong yupela."


Em tok bikhet pasim tu nau i kamap bikipela long ol sumatin long skul na ol Bod ov Menesmen i no gutpela long ol skul.

Em tok aninit long lo, ol Bod memba i mas sevim 3-pela yia tasol planti skul i no klia long dispela lo na ol i save senisim bod klostu klostu.

Em i tokaut tu olsem olgeta skul i mas gat Bod ov Menesmen aninit long lo.

Mista Tsika i tok tu olsem Katolik Sios i wanpela bodi we i wok long go pas long wok bilong edukesen na skul na ol skul bilong ol i save ron gut na i no olsem sampela bilong Gavana yet.

Dipatmen bilong Edukesen tu i gat wanpela liklik buk we i gat moa toktok long wok bilong Bod ov Menesmen.



• Barbara Awaita (raitim) i toktok long ol Mothers Union insait long wanpela semina em i holim wantaim ol meri long 8 mail Pot Mosbi. Foto: HELEN REI.

Ol meri pater i winim ol man pater bilong Engliken sios

OL meri pater i winim ol man pater bikos ol i ken luk save gut long ol hevi na wari bilong ol kongrigesen bilong ol.

Pater Danny Bray Guka i tok olsem bihain long em i kam bek long Austrelia we em i bin stap tripela mun long hap na wok wantaim ol Angliken Sios bilong Austrelia.

Pater Danny i tok Angliken Sios long Papua Niugini i nogat meri pater olsem long Austrelia.

Em i tok long Austrelia i gat meri pater bilong Angliken Sios we em i bin wok wantaim tupela bilong ol.

Pater Danny i bin wok long Austrelia long tripela mun olgeta we em i bin lukim na lainim planti ol samting namel long Austrelia na Papua Niugini.

Daiosen Bisop Michael Hough na Pater Doug Dickinson bilong Sen Baptis Sios long saut Melbon i bin redim ron bilong en.

Pater Danny i bin wokim sampela pastorol wok we em i wok wantaim ol wimen ministris, yut grup na ol liklik pikinini olsem long Sande skul.

Asbisop Peter Watson bilong Angliken Sios long Pet long Austrelia i bin givim tok orait long Pater Danny long wok olsem pris.

Pater Danny tok em i nambawan taim bilong en long wok namel long ol manmeri bilong kainkain kalsa na reis tasol dispela i no stopim ol manmeri long kam long en na askim em long helpim ol.

Wanpela bikipela samting em i bin lukim long Austrelia em long pasin we ol wait man save putim ol lapun manmeri long ol institusen o haus bilong ol lapun tasol na larim ol narapela ol lain i lukautim ol inap long ol i dai.

"Mi wari tru taim mi lukim ol bikos ol lapun i stap longwe long ol femili bilong ol," Pater Danny i tok.

Tasol em i tok long sait bilong lotu em i gutpela bikos taim ol lapun i stap long wanpela hap olsem na longwe long haus na femili bilong ol, ol bai tingting moa long God.

Pater Danny tok em i amamas tru long lukim olsem planti ol memba bilong sios i helpim sios long karimaut ol wok bilong sios we i strongim kristen bilip bilong Austrelia.

Dispela em i nambawan taim bilong wanpela lokol pris long Mosbi daioses long go daun long Austrelia long stap insait long dispela progrem na em i hop bai kain progrem bai kamap long bihain taim tu.

Pater Danny tok em wokim plen long ol samting we sios bai karimaut tasol nau yet i nogat mani olsem na em i tok plen bilong en i ken wet pastaim.

Em i tok wanpela plen bilong en em open haus progrem we sios bai karimaut ol pilai spot na givim kaikai free long ol manmeri long strit long tripela taim long wanpela wik.



Ol manmeri i bisi tru long lukluk

• Bishop Gerard Deschamps bilong Bereina i lukim ol drama ol lain i putim kamap taim em i go long Tapini. Foto: DANIEL MONA.

Senis kamap long Sogeri

VERONICA HATUTASI i raitim

PRINSIPEL bilong Sogeri Nesenel Hai skul (SNHS) Arnold Lakamanga i amamas long skul i wok long kamap gut long sait bilong ol sumatin i bihainim gutpela pasin na tu long sait bilong mekim gut long ol akademik sabjek.

Mista Lakamanga i bin tokaut long dispela samting long greduesen bilong 242 Gret 12 sumatin long Sogeri NHS las Fraide.

Em bin tok bikos skul i wok hat long stiaim ol sumatin i kamap gut, gutpela senis i kamap nau na em i amamas.

"Bikpela senis i kamap insait long tupela yia bihain long 1998. Tude mi amamas long prisening gutpela ripot bilong skul. Long yia 1998 planti pipel i no bin amamas tumas long skul ripot we mi bin priseningim.

"Bogenvil Afeas Minista na namba wan praim minista na olpela sumatin bilong Sogeri, Sir Michael Somare taim mi priseningim 1998 skul ripot i bin tok " skul inap wokim gut na kamap gut moa".

Olsem nau mi amamas long tokaut olsem ripot skul long dispela yia i gutpela, skul bot ov manesmen na Gavanin Kaunsil i no bung long wanpela taim bilong toktok long ol bikhet sumatin na ol kain olsem.

"Mi amamas long Gavaning Kaunsil i bin karimaut gutpela wok. Na gutpela sapot bilong ol papamama na komyuniti i kam long skul, ol tisa na sumatin i strongim tu gutpela kamap bilong skul," Mista Lakamanga i tok.

Em i tok Sogeri i kamapim sampela nupela samting long sait bilong ol nesenel hai skul long kantri na em i kamap olsem modol we ol narapela i ken bihainim long en.

Namba wan em long kamapim rot long senisim pasin bilong ol manki na givim sans long ol i go bek long skul bihain long 12-pela mun long stap

aut.

Long las yia, skul i bin kamapim dispela rul bilong 12-pela mun saspensen.

Aninit long dispela rul, husat sumatin i bikhet na brukim ol strongpela lo bilong skul bai i stap long saspens long wanpela yia. Na insait long dispela 12-pela mun, em i mas senisim pasin bilong em, kism gutpela tingting na rait i go bek long skul long ol i ken glasim na skelim ripot na ol i ken kism bek ol sumatin i stap insait long hevi. Dispela em gutpela rot bikos skul i no rausim sumatin olgeta olsem bipo tasol em i givim sans long en bilong lusim bikhet pasin, senis na kamap gutpela manmeri bilong skul na kantri.

Skul i bin kirapim nupela Pesenel Developmen kos long dispela yia.

Kos ya i karamapim ol samting bilong helpim manmeri i kamap gut olsem gutpela pasin, ol samting bilong strongim gut ol yangpela pipel long kamap ol gutpela sitisen bilong kantri na stap gut insait long komyuniti na ol arapela isu moa.

Em i tok Sogeri em i fes long dispela tupela samting na ol arapela NHS long kantri i ken lukim, skelim na glasim na bihainim.

Bilong makim ol Gret 12, wanpela meri greduet i bin tok tenkyu long ol tisa na skul bilong sapotim ol sumatin long stiaim ol long bihainim gutpela pasin.

"Tok amamas bilong mipela i go long ol tisa na skul long helpim gut mipela long kamap ol gutpela manmeri.

"Long ol wanskul husat i no wokim gut, noken ting olsem yu lus, nogat, i gat planti rot long go hetim skul.

"Yumi mas givim gutpela eksampel i go long ol narapela na skruim save yumi kism long Sogeri bilong helpim ol arapela," em bin tok.

Em bin strongim ol Gret 11 sumatin long wok hat na kism ol gutpela mak na long wankain taim tu, bihainim gutpela pasin.

Resis i stap long posisen bilong Sandaun Gavana

WINIS MAP i raitim

KLOSTU taim pait long pawa bai kamap long Sandaun provins bihain long gavman i makim Gavana John Tekwie olsem Minista bilong Tred na Industri las wik.

Ripot i kam long Vanimo i tok bikpela resis i wok long stap nau long top wok olsem gavana bilong provins bihain long Mista Tekwie i kism Tred na Industri ministri.

Aninit long rifom, taim memba i kism wok olsem minista, em i mas lusim posisen bilong gavana na givim sans long narapela man.

Long Sandaun provins, dispela wok i stap nau long han bilong Aitape/Lumi memba Eddie Sowni, Vanimo/Grin Riva memba Micah Wes na Robert

Sakias memba bilong Telefomin, bilong resis long en.

Ol ripot long Vanimo i tok Mista Sowni (Aitape/Lumi) i gat bikpela biilp olsem em bai winim wok olsem gavana. Em i tok em i gat sapot bilong Mista Tekwie na ol memba bilong ol arapela provins.

Tasol ol ripot i kamap tu olsem foma Koreksenel Institusen memba Mista Wes i wok long traim hat long resis long dispela posisen bihainim pasin we Praim Minista Sir Mekere Morauta i wokim las wiken long senisim ol gavman minista na Mista Wes i lusim Koreksenel Minista Ministri.

Mista Wes i save sapotim tu ol developmen projek bilong Mista Tekwie na ol ripot i tok em i gat sapot bilong em.

Mista Wes na Mista Sowni em ol memba bilong Pipels Advens Pati (PAP) Mista tekwie i

memba long en tasol Mista kumbakor na Mista sakias em ol memba bilong Pipels demokretik Muvmen (PDM) we i stap long gavman nau.

Mista Sakias na Mista Sowni nau i stap long Vanimo long traim givim sapot long Mista Tekwie.

Ol ripot i kam long Vanimo i tok bai das i kamap na PAP Pati bai bruk long namel sapos Mista Sowni na Mista Wes i resis long posisen bilong gavana. Na dispela i ken helpim Mista Sakias long winim nominesen long posisen bilong gavana.

Bai ol i makim taim bilong ileksen long gavana bilong Sandaun insait long Provinsel Asembli bung we bai kamap klostu taim.

Planti long ol asembli memba em ol Lokol Level Gavman kaunsil presiden na i luk olsem Mista Sakias bai i gat ful sapot long ol Telefomin LLG memba.

Gutpela senis i kamap long Sogeri

OL GRET 12 sumatin long Sogeri Nesenel Hai i kism salens long yusim gut ol samting ol i lainim long skul na tu tingim ol papama na ol hauslain bilong ol husat i bin helpim ol long go hetim skul.

Tu ol bin kism salens long wok hat bikos long dispela taim maski ol sumatin, ol manmeri i pinisim bikpela skul na ol i gat planti save na ekspiriens, wok i sot na olsem planti i no inap long painim wok.

Sentrel provins Gavana Opa Taureka husat i bin givim toktok long 242 sumatin husat i bin greduet long las Fraide Novemba 3 i bin tok " tude yupela i pinisim skul tasol em i stat long nupela salens long futja bilong yupela.

"Nau taim i hatpela long olgeta, ol haia institusen olsem Sogeri na ol arapela wantaim tu ol bisnis kampani.

"Mi tokim yupela long tingting gut, lukluk gut bikos yumi save pinis olsem nau em i hat long painim wok.

"Na ol dispela samting i kamap bikos long rot we ol gavman na lida bilong bipo na nau i wokim,"

Mista Taureka i tok.

Em bin tok long kism gutpela kwaliti skul na sevis, ol lida i mas givim gutpela helpim bilong ol tu i go long skul.

Em bin tok edukesen na menpawa o ol lain long mekim wok i bikpela samting tasol gavman i feil long dispela eria.

Mista Taureka husat i bin skul long Sogeri long 1960 i tok em i amamas long harim olsem skul i senis na i kamap gut long sait bilong gutpela pasin i kamap strong na tu ol sumatin i wokim gut long ol mak.

Bikos long ol senis ya, Gavana Taureka i tok Sentrel provinsel gavman bai givim sampela helpim i go long skul bilong karimaut ol mentenes wok long ol klasrum na ol arapela skul bilding.

Em i tok olgeta skul insait long Sentrel provins i gat wankain sik bikos planti ol bilding i bagarap na ol i nitim mentenes tasol wok bung wantaim komyuniti, ol papamama na ol bisnis haus bai helpim long stretim ol dispela samting.

Sip bai ron long Lae i go Alotau

ROSALYN ALBANIEL i raitim

GAVANA blong Milen Be, Titus Philemon, i givim tok promis bilong em olsem ol sip bai i statim ron bilong ol ken long Lae i go daun long Alotau long neks wik.

Mista Philemon i mekim dispela toktok long Lae long Fraidei las wik, taim em i bungim ol lain pipel bilong em long wanpela bung we ol asples lain bilong em yet i bin kamapim.

As bilong dispela bung we ol lain Milen Be husat i wok na skul long Lae i kamapim em long autim bel hevi bilong ol long disisen we Provinsel Lo na Oda Komiti bilong Milen Be i bin wokim long stapim olgeta ron bilong ol sip bilong Luteran Siping Kampani i go insait long Alotau.

Ol sip bilong Luteran Siping i bin statim ol dispela ron bilong sip bilong ol i go insait long Alotau long Julai long dispela yia. Long Septemba Lo na Oda komiti bilong Milen Be, we Gavana Philemon i go pas long en, i bin katim ol dispela ron.

As ol i givim em olsem hevi bilong lo na oda i bin sut i go antap liklik na ol i ting olsem wanpela as bilong dispela hevi em bikos long ol ron we ol sip i karim kankain manmeri na kago wantaim.

Tupela taim olgeta ol i stapim dispela ol ron. Namba wan taim em long Septemba na namba tu taim long Novemba 1.

Ol biklain bilong Milen Be i tokim Gavana bilong ol long dispela bung long wanpela petisen or askim leta olsem ol i luksave long as na tingting gavman bilong ol i gat long katim dispela sevis tasol ol i ting dispela ino gutpela bilong wanem planti bilong ol i kism taim long sait bilong painim rot i go long ples.

Gavana bilong Milen Be i harim olsem ron bilong sip i wanpela bikpela samting long sindaun bilong ol dispela lain bilong wanem prais bilong balus i antap tumas.

Em i harim olsem ol lain bilong em ino long Lae tasol antap long Hailans, Madang, Sepik na Niugini Ailans i save kamap long Lae na yusim dispela rot long go bek long ples long malolo taim bilong ol.

Ol i tok moa olsem disisen bilong em na komiti i wokim ol i kism taim olsem na ol i askim em na komiti bilong em long harim krai bilong ol.

Insait tu long askim bilong ol igo long gavana bilong ol, ol lain Milen Be i askim bai ol i no ken katim dispela sevis tasol long traim long lukluk long ol arapela rot long traim stretim dispela sevis na sem taim tu, traim daunim lo na oda long ples bilong ol.

Ol i askim bai ol plis long Lae, Popondetta, na Alotau i wok bung wantaim long was long pasindia na kago i go insait long Alotau;

• Provinsel gavman bilong Oro na Milen Be i askim ol lain long Luteran Siping na Habas Bod long sanapim teminel o haus wet wankain olsem dispela long wof long Lae bai helpim ol long glasim wanem kain lain i kalap long ol sip;

• ol asples Milen Be i stap long Lae na Oro long kirapim wanwan komiti long wok, bung wantaim Lo na Oda Komiti bilong Gavana Philemon long traim long givim stia toktok long wokim gut kamap ol sevis o ron bilong ol sip we bai ol pipel i no inap kism taim;

• sapos gavman bilong gavana Philemon i ting olsem sevis we Luteran Sios i givim ino gutpela, long traim long lukluk long kirapim sampela arapela rot;

• long gavman bilong em long tokaut long ol pipel bilong em sapos ol i gat plen long kamapim Join Vensa wantaim sampela arapela lain long wokim wok bisnis long sait bilong ron i go long ples; na tu

• sapos gavman bilong em i laik katim olgeta dispela ol ron bilong ol sip i go long Milen Be long helpim ol pipel bilong em long givim hap mani long ol lain husat i laik go bek gen long ples.



Nupela Minista

• Henry Smith, memba bilong Goroka Open i kism nupela wok olsem Minista bilong bilong Korektiv Sevis. Em i mekim promis bilong em olsem nupela minista loing ai bilong gavana jeneral bilong PNG Sir Silas Atopare long Gavman haus long Pot Mosbi dispela wik. Mista Smith em i wanpela nupela minista we praim minista Sir Mekere Morauta i bin makim las wik. Foto: IVAN BAYAGAU.

EU katim sapot i go long Welpam industri

ROSALYN ALBANIEL i raitim

OL LAIN long European Union (EU) i no inap putim sapot mani moa i go insat long wanpela akaun o paus ol i kolim long tok Inglis "Stabex Fund".

EU i bin tok aut long dispela long pinis bilong las mun long wanpela bikipela miting we ol lain long Oil Palm Industry Corporation (OPIC) i bin kampim long Mosbi.

Wanpela maus man blong EU long dispela miting i tok olsem ol i bin wokim dispela disisen long wokim bai ol gavman na praivet sekta (ol lain wok bisnis) bai traim long wok bung wantaim long helpim ol man husat i save tuhat long planim na kamapim welpam.

Mausman blong EU i tok aut olsem nau yet gavman i wok long wok ol yet na ol bisnis man tu wankaim na industri i wok long kisim taim na i go moa yet ol kain lain olsem ol tu husat i save traim

long givim han na helpim.

Em i tok klia olsem wok bilong ol em long givim sapot tasol, ino long wokim wok we gavman na ol kampani yet i sapos long wokim.

Em i tok klia olsem as bilong katim sapot mani i go insait long paus o akaun ya we i bin stap bip em bikos, ol i lukim olsem mani ino go long wok stret bilong em (long sapotim ol groas man blong ples na blok tasol long taim prais ino gutpela). Ol i wok long yusim long wokim kainkain arapela wok we

gavman na kampani yet i pundaun na i no wokim.

Em i strongim tok moa long tok olsem gavman, kamapani i mas opim ai na stat long luksave gut long wok blong ol stret na senisim dispela pasin blong tingting oltaim olsem "sapos mi no wokim i gat arapela lain i stap long wokim."

Mausman ya i tok sapos ol i luksave gut na senis bai ol i ken givim bek helpim bilong ol.

Tasol em i tok we ol projek o wok we grup bilong em i givim tok

promis long helpim bai kisim yet helpim yet long ol inap long taim olgeta mani insait long paus ya i pinis.

Em i tok bikipela amamas tu long ol lain OPIC long hatwok blong ol long kamapim dispela bung na i tok em i laikim bai i mas gat moa. Bilong wanem kain bung i bai givim sans long ol lain long gavman na tu long kampani long bungim het na tingting tu long helpim ol liklik man long ples na wok welpam tu insait long kantri.



Nupela mausmeri

• Gavman Jeneral Sir Silas Atopare i bungim nupela Ambasad bilong Amerika insait long PNG, Susan Jacobs dispela wik. Susan i makim kantri bilong em Amerika long ol toktok we bai kamap namel long kantri long PNG na Amerika. Foto: IVAN BAYAGAU.

Kakau Prais ripot

Cocoa Board of PNG Economics Section

Actual Dis and Wet bean prais (Monday, Novemba 6, 2000).

Maket Ripot bilong Kakao long dispela wik

Mande, Novemba 6 inap long Fraide, Novemba 10.

Indicative cocoa prices

Current	Previous	Change
02.11.00	02.11.00	

New York Closing on 02.11.00	749	753	-4
------------------------------	-----	-----	----

New York Closing Kina Equivalent	2203	2282	-79
----------------------------------	------	------	-----

London Closing on 02.11.00	583	582	1
----------------------------	-----	-----	---

London Closing Kina Equivalent	2546	2555	-9
--------------------------------	------	------	----

Exchange Rate US\$/Kina	0.3400	0.3300	0
-------------------------	--------	--------	---

Exchange Rate Pound/Kina	0.2290	0.2278	0
--------------------------	--------	--------	---

Average Kina per tonne equivalent	2374	2418	-44
-----------------------------------	------	------	-----

Estimated FOB Price (less C.I.F Costs)	2177	2221	-44
--	------	------	-----

Estimated DIS (Kina/tonne) - b/	1742	1777	-35
---------------------------------	------	------	-----

Estimated DIS (Kina/bag)	109	111	-2
--------------------------	-----	-----	----

Estimated Wet Bean Price (K/t) - c/	697	711	-14
-------------------------------------	-----	-----	-----

Estimated Wet Bean Price (toea/kg)	70	71	-1
------------------------------------	----	----	----

Notes:

a - Weighted average of a CIF, discounts and other costs to export destination

b - assumes 80 per cent of FOB

c - assumes 40 per cent of recovery rate

Dis	Wet Bean
Kina Per Bag	Toea Per Kilo
Rabaul 121 - 127	30 - 45
Kokopo 114 - 123	30 - 49
Kavieng 104	30 - 40
Namatanai 103	30 - 40
Kimbe 104	
Buka 117 - 120.50	30 - 40
Kokopau 120	
Lae 108	
Madang 108	25 - 40
Popondetta 104	
Wewak 86 - 112	
Lorengau 103	

Maket Komentri

Despite the presence of a few potentially bullish items this morning, the cocoa markets of London and New York ended fairly quiet sessions with moderate losses. The early dealings in London included a sharp rise in the value of the Euro against the Pound (and the Dollar) which came as a result of an early round of intervention by the European Central Bank (ECB). The impact on cocoa was expected to be Bullish, as a initial removed the immediate threat of fresh origin sales from Ivory Coast shippers. Unfortunately for the bulls, that never happened. The inability of the New York market to rally, coupled with an afternoon retracement for the Euro to spark an afternoon decline in London which ultimately pulled the nears roughly 10 pounds off of the a.m. highs. The apparent emergence of hedge setting from Ivory Coast sources in the afternoon also added to the downside pressure of both markets while options related selling in New York ahead of today's expiration of Dep00 options magnified the decline further.

Ol Kopra sek bauns long Finsafen

FAY DUEGA i raitim

OL KOPRA groa long Finsafen insait long Morobe provins i no moa kisim ol kopra bilong ol i go long Kopra Marketing Bod depo bihain ol sek we CMB i peim long kopra bilong ol i bauns.

Manesa bilong Fins kopra sab depo John Yagelom i tok ol sek ya i bilong mun Oktoba.

Em i tok ol growa i bin laik kesim samting olsem K700 tasol em i bauns bikos CMB akaun i no gat inap mani long en.

Em i tok ol sek bilong mun Septemba i bin orait tasol ol dispela bilong las mun em i nogat.

Mista Yagelom i tok long dispela na ol groa i les long salim ol kopra bilong ol.

Em i tok ol i katim na smokim kopra i stap tasol ol i les long salim ol na ol i holim ol bek i stap long ples.

Em i tok long nau tu prais bilong kopra i stap daunילו na dispela i mekim ol groa i les moa yet long salim kopra bilong ol.

Long Ogas 1999, CMB i bin wok long peim K923 long wanpela ton hot

ea kopra, K913 long FMS na K903 long smok kopra.

Long mun Janueri long dispela yia, CMB i wok long peim K733 long hot ea, K713 long FMS na K693 long smok kopra.

Long mun Julai em i peim K391 long wanpela ton hot ea, K271 long FMS na K351 long smok kopra.

Long mun Septemba prais i pundaun long K231 long hot ea, K216 long FMS na K190 long wanpela ton smok kopra.

Mista Yagelom i tok ol ples lain long Finsafen i save kisim mani long salim kopra na taim sek i bauns na tu prais i go daun stret, planti pipel i kisim taim stret.

Em i tok ol papamama na ol sumatin bai painim hat tru long peim ol skul fi neks yia.

Ol i katim tu ol telipon long Finsafen kopra sab depo na ol wokman i wok long yusim telipon bilong Luteran Siping kampani long kisim ol telipon mesej o toktok long ol kola bilong ol.

Mista Yagelom i bin wokabout i go long Lae CMB brens las wik long ripotim ol hevi bilong ol groa na ol wokman i kam long CMB hetkota long Mosbi.



TOKSAVE I GO LONG OLGETA NPF MEMBA

Long kibung bilong Nesenel Providen Fan (NPF) Bod long Trinde 18 Oktoba 2000, Bod i bin mekim wanpela disisen long askim ol save man bilong lo long rot istap pinis long givim tok orait long NPF long rausim sampela savings long akaun bilong wanwan memba. Dispela rot bilong rausim mani long akaun bilong ol memba bai helpim long soim stret mak bilong mani NPF i gat i kam inap long 31 Disemba 1999.

NPF nau i gat hevi yet long dinau mani. Dispela hevi i kamap long wanem NPF Bod na Menesmen bilong bipo na Gavman tu i bin lusim planti mani long ol investmen we i no bin pulim win mani ikam long NPF. Ol save man bilong lo i tokim NPF Bod long ol mas rausim sampela savings long wanwan memba akaun long givim mak o value bilong mani NPF i gat long dispela taim. Sapos Bod ino bihainim dispela edvais, bai NPF wantaim ol memba i bungim hevi long NPF savings, na bai Bod igat kot long ol ino bin stretim dispela hevi.

Long dispela taim nau, mani NPF igat long em ino soim stret value bilong ol savings na samting o asset NPF i gat nau. Taim ol memba wok long rausim mani long skul fi, wokim haus na baim haus na ritaimen savings long taim bilong pinis wok, NPF bai lusim olsem K2 milion insait long wanwan mun na bai i nogat mani long baim ol narapela memba bihain.

Long dispela as tingting na NPF Bod i mekim dispela disisen long rausim 50 pesen savings long wanwan memba akaun. Dispela rot bilong rausim mani long memba akaun istap pinis long lo bilong NPF (NPF Act and Rules). NPF Bod na menesmen i save olsem ol memba bai ino inap hamamas long dispela pasin bilong daunim mak bilong savings long wanwan memba akaun.

Long skelim ken mak bilong mani istap nau long akaun bilong ol memba, NPF Bod i mekim disisen olsem:

1. NPF bai pasim olgeta widrowol ol memba save kisim long nau igo inap 31 Disemba 2000;
2. Kamapim wanpela komiti husat bai igat ol mausman bilong Gavman, ol kampani na memba long lukluk long arapela rot long daunim mak long 50 pesen ikam daun liklik. Na sapos ol memba i wanbel long wanem kaim rot ol kamapim, bai Siaman bilong NPF Bod bai bringim dispela toktok igo long Nesenel Eksekutiv Kaunsel long mekim disisen;
3. Sapos dispela komiti ino kamap wantaim sampela rot long daunim hevi bilong mani istap long NPF nau, bai NPF Bod i givim tok orait long kamapim pasin bilong rausim 50.01 pesen long wan wan memba akaun bipo NPF i painim bikipela hevi moa.

K. Twata

Mr. Koiari Tarata, ISO
Seketeri bilong Fainens

WINIM FAMILY HOME WANTAIM

Enjoy
Coca-Cola

4

PELA LONG
WINIM



WINIM HAUS wantaim 'COCA-COLA'

'COCA-COLA' nau i givim gutpela
sans long yu winim wanpela
FAMILI HAUS.

Sapos yu laik win, baim ol 500ml 'COCA-COLA' botol
igat ol haus promosen mak long en. Raitim nem na
adres bilong yu long lebol na putim insait entri
box long dispela ol supermarkets, Best Buy, Renbo,
Stop and Shop, Andersons, TST na Coca-Cola Depots.

Igat fopela haus long winim - 1x Southern Region,
1x Morobe Region, 1x Highlands Region, na
1x Sepik-Madang Region. Dispela kas FAMILI HAUS
bai sanap antap long giraun bilong winner.

Dispela Coca-Cola FAMILI HAUS kompetisen nau em
wanpela bikpela laiftaim sans. Baim planti 500ml
'COCA-COLA' long givim moa sans long win.

Kompetisen bai pinis long Novemba 10, 2000.

HURRY! HURRY! HURRY!

ENTA NAU RESIS BAI PINIS NOV 10TH

Lukim PNG Extra long
EMTV. Dro bai kamap long
Mandei Novemba 13th.

Fopela fantastik haus bai
fopela laki winas i winim;
Wanpela long Hailens Rijen,
Wanpela long Sauten Rijen,
Narapela long Morobe Provins,
na narapela long
Madang - Sepik Provins.



Ol pipel i bungim birua long balus

Ol soldia bilong Taiwan i karim kes bilong wanpela long ol pipel i bin dai long balus birua long Chiang Kai-Sek ples balus long Taipei las wik. Eiti wan (81) pipel i bin dai long en. Ol ripot i tok jet balus i bin wok long tekov long rong teminel. *Piksa i kam long Weekend Australian niuspepa.*

Fiji hevi kamap bikpela gen

Fiji:

I LUK olsem hevi long Fiji we i bin kamap long Kwin Elizabet Bareks long Suva las Fonde i hap long pait long pawa we militeri o ami i stap insait long en.

Eitpela pipel i bin dai long dispela hevi na 30 i bin kisim bagarap.

Na ol ripot i tok foma priam minista na lida bilong tupela ku o tekova long Fiji gavman long 1987, Sitiveni Rabuka i go aps long las wik Fonde hevi.

Ol ripot i tok ol wok painimaut i kamap long Mista Rabuka nau. Na ol i tambuim em long go insait long Bareks na tu long ami hetkota.

Ol ripot i tok as bilong dispela hevi em ol i laik kilim ami komanda Komodo Voroqe Bainimarama bihainim hevi long Me 16,2000 we George Speight na ol lain bilong em i bin kamapim ku long tekova long Fiji gavman. Na stat long dispela taim, Fiji i wok long stap long hevi.

I kam inap nau Fiji i stap aninit long interim gavman na lukaut bilong ami ol i kolim long masel lo.

Bihainim hevi long Fonde we ol i tok sampela amilain i memba long Kaunta Revoluseneri spesel fos husat i bin sapotim Mista Speight long Me 19 ku long rausim gavman bilong Mahendra Cahudhry i bin kamapim plen long rausim nau ami komanda. Ol dispela lain na sampela sief i memba bilong Gret Kaunsil bilong ol Sief i pret olsem Komodo Bainimarama bai putim ol long kot na ol i laik rausim em na olsem ol i kamapim hevi long las Fonde na kirapim bek hevi long Fiji. Long nau, Fiji ami i bruk long tupela hap we sampela lain (ol memba bilong CRW) i sapotim ol siefs na Speight taim bikpela lain i sapotim yet gavman.

Mausman bilong ami em Howard Politini i tok 40 long ol 80 GRW memba i bin stap insait long

Fonde hevi na faivpela bilong ol i dai long pait wantaim ol ami taim tripela gutpela soldia tu i dai. Fitin long ol GRW i ronawe hait yet.

Ol ripot i tok ol lain bilong CRW i dai bihain long ami i bin paitim ol. Olsem na Humen Raits Komisin i tok em bai karimaut ol wok painim long dispela samting.

Ol ripot i tok long nau, Komodo Bainimarama i stap long strongpela lukaut long Walu nevi beis na ranim kantri.

Long wankain taim tu, ol ripot i tok Hai Kot bai mekim disisen bilong em long dispela wik na tokaut sapos Fiji i gat yet mama lo o nogat.

Ripot i tok militeri na interim gavman bai kisim taim long dispela disisen.

Jastis Tony Gates bai givim disisen sapos dispela nupela mama lo we Fiji i bin kamping long 1997 i bihainim lo o nogat na tu sapos etministresen bilong Chaudhry em i stap yet olsem ligel gavman o gavman i kam aninit long lo.

Long wankain taim, Fiji i stap yet long moa hevi tasol ami i wok long painim 15-pela rebel soldia husat i stap insait long Fonde hevi na ol i ronawe.

Long taim ol rebel soldia na lain bilong ol i kirapim hevi na ol i laik kisim em na ol arapela sinia opisa bilong en, Komodo Bainimarama i bin ronawe bihainim bus na i orait.

Foti soldia i bin stap insait long dispela hevi we ol i bin stapim eitpela awa bihain taim Komodo Bainimarama i odaim ol soldai bilong en long go insait long bareks na holim ol lain i wokim trabel.

Wanpela bikman bilong Fiji Ami Liutenen Kenel Filipino Tarakinikini i tok em bai kisim ligel eksen long Nu Silan Foren Minist Phil Goff bilong wokim sampela toktok i no tru.

Mista Goff i bin tok Mista Tarakinikini i bin go pas long ol soldia husat i go egens long gavman na kamapim hevi bilong las Fonde long Kwin Elisabet Bareks.



• Olpela Fiji Praim Minista Sitiveni Rabuka i sekim Fiji militeri peraid long Albert Park, Suva. *Poto: HARLYNE JOKU.*

Panadol marasin i stap long hevi

Australia:

PANADOL; dispela marasin we planti pipel i save yusim long sik olsem hetpen, tuhat, flu na planti ol arapela sik moa i stap gen long hevi, ol ripot i tok.

Long Australia long dispela wik, ol i bin rausim ol panadol peket long self long namba tu taim long dispela yia bihainim ol toktok long sampela lain i laik

bagarapim na putim posin long ol panadol marasin prodak.

Long mun Julai long dispela yia, toktok i bin kamap olsem sampela lain i putim posin long ol panadol prodak na olsem ol i bin rausim olgeta panadol prodak long self.

Smith Kline Beecham, kampani we i save wokim marasin ya i tok ol bai salim ol panadol

marasin long kemis tasol na i no long ol arapela hap.

Wankain samting tu i bin kamap long dispela yia long raival kampani Herron Famasutikels.

Ol plis long Nu Saut Wels i wok long traim painim husat tru i wokim ol dispela pret toktok na ol bai painim na givim bikpela mekim save long ol.

35 famili i laik kamap sitisen bilong Australia

Australia:

TETI faiv famili husat i bin kam long Australia long mun Septemba long stap insait na lukim bikpela pilai Olimpik long Sidni i askim gavman bilong Australia sapos ol i ken kamap olsem ol sitisen.

Ol dispela lain i hap long 145 pipel we tok orait pepa bilong ol i ekspaia pinis long Oktoba 31.

Ol i les long go bek long ples bilong ol na ol i laik stap olgeta long Australia.

Sampela long ol lain i no laik go bek long kantri bilong ol em long biksa bilong Gabon long Afrika, Stephane Nzue Mba, resla bilong Tunisia Hassene Firina tupela narapela wankain tok bilong en, foapela atlit bilong Georgia, weit lifta Valery Sarava na Mukhran Michedidzer na Alezander Tsertsvadze Ol arapela long lista em long tupela moa atlit bilong Rasia na ol arapela bilong ol lsten Yurop kantri.

Ripot i tok 28 pipel bilong Amerika i abrusim taim bilong ol long stap long Australia, 14-pela bilong Inglan, tupela bilong Japan, faivpela bilong Gemeni na 13-pela bilong Kanada.

Ol ripot i tok Imigresen Ministas Philuip Ruddock i tokim The Australian niuspepa olsem ol ino inap long tok oraitim 30 pesen long ol aplikesen bilong ol.

Gavman i bin ting olsem planti moa Olimpik Gems lain bai i laik stap bek long Australia tasol ol i lukim olsem nau mak i no antap tumas.

Ol opisel i bilip olsem dispela em bikos Australia i stap longwe na em i hat long i go i kam skelim wantaim ol lain i bin stap bek long Atlanta, USAwe moa long 200 pipel i bin laik stap bek bihain long 1986 Olimpik Gems.

Ol ripot i tok tu olsem ol Olimpik famili memba i gat moa hauslain long Amerika na i no tumas long Australia.

Nesenel ileksen long Amerika i strong tru

Amerika:

Nesenel ileksen kempain long Amerika i hot long dispela taim na taim faivpela de tasol i stap long ileksen i stat long neks wik, ol politisen i wok hat stret long pulim ol vota wantaim ol kempain bilong ol.


Ol nem olsem Vias Presiden Al Gore, George Bush, Bill Clinton, Misis Hilary Clinton i wok long kamap bikpela. Na bikpela resis tru i stap tasol nem bilong olgeta i wok long kamap strong.

Tasol long ol ripot bilong dispela wik, nem bilong kendidat Bush i bungim hevi taim ripot long dring na draiv sas i kamap long ples kia.


Long 1976 taim Mista Bush i gat 30 krismas, em bin kisim dispela sas na nau em i kaaut long ples kia, dispela i ken bagarapim gutpela rekot bilong em. Ol ripot i tok sapos Mista Bush i bin tokaut long dispela samting pastaim, em bai ino inap long bagarapim ol vot tasol nau em i gat

wari bikos em i kamap long ples kia klostu taim ol vot i stat. Ol ripot i tok Misis Clinton husat i nem bilong em i kamap

strong olsem Fes Ledi i gat sans long mekim gut tasol em i mas resis wantaim narapela kendidat, Rick Lazio.



• Presiden Bill Clinton i amamas long meri bilong em Hilary taim ol i go insait long wanpela risepsen o bung long Manhattan. *Piksa i kam long Weekend Australian niuspepa.*



• George Bush i bin kisim sas long wokim rong taim em i spak na draiv long 1976. Wanpela long ol pasindia long ka em bikpela tenis pilai bilong Australia em John Newcomb. *Piksa i kam long Australian niuspepa.*

Bikpela de bilong ol hos pilaia!



• Ol dispela biknem meri lain olsem Annette Allison, Glen-Marie Frost, Kerrie-Ann Kennerly na Liz Finlay bai stap long fasen so na soim stail bilong ol wantaim ol stail klos long amamasim Melbon Kap de. Piksa i kam long Weekend Australian niuspepa.

Australia:
Em i kap de gen na Melbon Kap i kukim ples.
Taim bilong sampela i amamas na taim bilong sori long ol arapela.
Taim bilong pilai hos em taim bilong soim ol kain stail long fasen wol tu ya.

Melbon Kap de i bin kamap long Tunde, Novemba 7. Dispela em bikpela de bilong hos resis long Australia we ol i save holim long Melbon.
Long dispela yia, 24 hos i bin stap insait long resis. Resis ya i save pulim bikpela mani tru long en na

planti man i save winim bikpela mani taim planti tu i save wokim bikpela lus tu.
Resis ya i gutpela taim tu long soim long ples klia husat i kamap long stail bilong ol naispela klos. Olsem na bikpela fasen so i save kamap long taim bilong melbon Kap de.

Moa nius long Midel Is hevi

Israel na Palestain:
PRESIDEN Bill Clinton bilong Amerika bai bungim Israel lida Praim Minista Ehud Barak na Palestain lida Yasser Arafat long dispela wik bilong karimaut ol toktok long painim gutpela sindaun namel long tupela sait.
Ol ripot i tok bung ya bai kamap long Wasington, Amerika.
Long pait na hevi namel long tupela grup we i stap nau long wik faipela wik, 177 pipel bilong tupela sait i dai pinis long en planti moa i kisim bagarap.

Pait i go het yet na long dispela wik, moa long 100 pipel i kisim bagarap na sampela i dai.
Tasol ol ripot i tok maski hevi i go het yer, em i slek liklik.
Long ples Hizma we i stap long Wesbeng klostu long Jerusalem, wanpela man Palestain i bin dai bihain long ol pait namel long ol yangpela bilong Palestain na ami bilong Israel.
Bihainim ol dispela samt-ing, Praim Minista Ehud Barak i singautim Palestain lida Yasser Arafat long

stapim ol hevi long hap sait bilong en na sekan na bel isi pasin namel long tupela grup i ken kamap.
" Mi askim yu Yasser Arafat husat i bin sekanim Yitzhak Rabin long noken larim ol hatko grup long bosim yu long kampim moa dai na hevi. Mi save olsem yu i ikoen stapim ol dispela hevi," Mista Barak i tok.
Presiden Barak i bin wokim dispela toktok long wanpela reli we moa long 75,000 pipel i bin bung long tingim de we sampela lain i bin kilim dai olupela lida bilong Israel, Mista Rabin long en.

Biknem muvi ekta, "Trapp famili" i bung wantaim gen



Ol lain ekta husat i bin ekt olsem ol pikinini bilong Von Trapp famili bilong Austria long Sound ov Musik piksa i sanap long kisim piksa long Salzburg long Austria las wik.
Long lef i go long rait em : Kym Gareth (Gret), Charmian Carr (Liesl), Angela Cartwright (Brigitta), Nicholas Hammond (Friedrich) Duanne Chase (Kurt), Debbie Turner (Martha na Heather Menziz (Louisa).
Ol lain long piksa Sound of Musik i bung wantaim bihain long 35 krismas.
Save harim na lukim piksa bilong biknem muvi

Ol i planim bodi bilong leit Empera bilong Ethiopia

Addis Ababa, Ethiopia:
Ol bai planim bodi bilong leit lida bilong Ethiopia Empera Haile Salassie husat i bin dai 25 krismas i go pinis long 1975 long Triniti Katitrel long Sentrel Addis Ababa, ples we em bin laikim ol long planim em long kantri stret bilong em long Ethiopia long dispela wik.
Bihainim ol stori, Selassie em i 225 long royel famili bilong Ethiopia na em i hauslain bilong King Solomon na Kwin ov Sheba husat i bin stap laip moa long 2,000 krismas i go pinis.

Ol i wokim bikpelanesenel seremoni long planim bodi bilong em, stat wantaim misa lotu long bikmoning long dispela wik Mande.
Empera Selassie i bin dai taim nupela gavman i bin tekova long 1974 na ol i rausim gavman bilong em.
Royel famili bilong em na ol Rastafarien memba husat i bilip olsem Selassie em i God i bin joinim planti tausen pipel bilong Ethiopia long givim luksave long man husat i bin bosim kantri long 44 krismas bipo ol bin rausim emmlong sia bilong gavman long 1974. Long 1975 em bin dai na ol lain

husat i bin kalabusim em i planim nating bodi bilong em klostu lojg wanpela tolilet.
Bihain long gavman we i rausim em i lusim sia, ol i bin kisim ol bun bilong em long ples we ol i planim pastaim na putim wantaim ol arapela royel famili memba.
Tasol nau ol i bihainim laik bilong em yet na ol i palnim em long insait long matmat long Ethiopia Otodoks Triniti Katitrel.
Selassie i bin wanpela strongpela Otodoks sios memba na ol i bilip strong olsem em i het long Ethiopia Otodoks sios.

Ol naispela Piksa long Japan



• Ston steti long ol Jizo santu klostu long Wara Daiya na ples Kanmankatuchi, Japan:

Tupela gutpela hap long ol turis i raun lukim long Japan em long Nikko long Tochigi Prifeksa na Maunten Nantai o Maun Futura.
Maun Futura em i wanpela olupela maunten paia we i save go antap long 2,484 mita. Long planti handret krismas i go pinis, ol i save lukim Maun Futura olsem ples bilong ol God. Long 8ht senseri, ol pipel i bin save go lotu long wanpela santu man ol i kolim long Shado Shonin long en.
Nikko i gat gutpela risot na ol naispela ples klostu na tu em i gat ol sampela bilding i gat nem na histri long en. Long dispela yia ol bai tokaut long Nikko olsem wol heritej eria bihainim luksave ol i gat long en.



• Ol diwai kaving long Tonshio-gu Shrain husat i no save lukim samtng, i no harim samtng na i no lukim samtng. Ol kaving ya i stap long fran bilong Yomet Gate.



I gat bikpela bilip!

• Ol olupela diwai seda na santu wara (spring) i stap long Futura-san srain. Bilip i stap olsem sapos yu dringim wara long dispela spring, bai yu gat longpela laip. Ol piksa i kam long Nipponia megesin.



Sir Mari Kapi bai harim kot long Fiji

OL
HAP HAP
nius

• Nesenel Kot Jas bilong Papua Niugini Deputi Sief Jastis Jas Sir Mari Kapi bai sindaun wantaim tupela ovasis jas long harim bikpela kot long Fiji. Dispela em kot we ol ami i bin traim long brukim mama lo na rausim gavman bilong pipel.

Jas Sir Mari Kapi i bin sindaun bipo long wanpela bikpela kot long Fiji na tu long Is Timor, wanpela kantri we i stap hapsait long Indonesia. Dispela em namba tu singaut gen long Jas Sir Mari Kapi long go bek long Fiji long harim dispela bikpela kot namel long ol ami na Gavman. Na dispela em wanpela bikpela nius bilong Papua Niugini long lukim wanpela Jas bilong em i kisim bikpela luksave long ol narapela kantri long go harim kot bilong ol.


• Helikopta balus bilong plis fos ol i kolim Eye In The Sky i stap nau long bus bilong Morobe provins em long Wau eria. Dispela em bihain long planti bikpela raskol pasin bilong hensapim ol balus na stilim ol kago long en. Long Wau na Bulolo taun tu em planti bikpela raskol pasin i save kamap na dispela helikopta inap helpim tru long holim na mekimsave long sampela ol stilman olsem long dispela hap.

Dispela tu em namba wan taim bilong plis helikopta ya long go long Morobe provins long helpim wantaim wok bilong lo na oda insait long

provins. Ol lain long Wau i amamas tru long dispela na i tok em bai mekim wok bilong plis i isi tru long holim na sasim ol raskol husat i save mekim planti trabel na stil tumas long komyuniti.

• Ol bikman bilong Wol Beng na IMF i bung wantaim Praim Minista Sir Mekere Morauta na ol Gavman opisa bilong em long Mande dispela wik na tokaut long plen bilong ol long saptim Papua Niugini yet wantaim mani long ol hevi kantri i stap long en tude.

Wol Beng opisel i tok ol i amamas long ol plen na program Gavman bilong PNG i mekim long traim stretim rot bilong ol wok bisnis na developmen i ken kamap bihainim. Na dispela i kirapim amamas long Wol Beng long putim mani bilong helpim kantri long kain gutpela rot olsem. Dispela mun em taim bilong Gavman long mekim baset bilong kantri. Na em i gutpela nius tu long harim olsem Wol Beng i kamap na stap klostu wantaim Gavman long dispela taim.



• Sir Mekere Morauta



Mekere soim bel isi pasin

OL lain i bin salensim Praim Minista Sir Mekere Morauta i go bek gen long em. Ol Yunaitet Pati na Pangu pati memba i bin sanap ples kila tru long salensim Gavman long wanpela mosen bilong surukim palamen bung i go long neks ya. Dispela i soim tru olsem sans bilong Gavman long kamapim nupela lo bilong Intagrity Bilong Politikel Pati na Kendidet bai i no inap kamap na tu bai bikpela baset bilong kantri bai i no inap kamap long dispela ya. Tasol laki tru long namba bilong ol i no inap long pasim dispela mosen. Ol i gat tasol 32 namba na Praim Minista i holim yet 62 namba. Tasol dispela eksen bilong Pangu, Yunaitet Pati na PPP i mekim Gavman i kirap nogut bikos ol dispela lain pati em ol Gavman memba yet. Na ol i mekim Praim Minista i kirap nogut.

Taim ol i kam aut, ol i stap ausait long Gavman na Praim Minista yet i tok em i rausim ol lain ya long Gavman.

Tasol long Fraide las wik, Praim Minista i givim wok Minista long lida bilong Pangu Pati Chris Halveta na lida bilong Yunaitet Pati Gabia Gagarimabu.

Ating Praim Minista i mas wanpela gutpela bel isi man tru long lusim sin bilong ol man i birua o mekim nogut long em. Olsem na em i lusim belhat bilong em na mekim wanbel gen wantaim Chris Halveta na Gabia Gagarimabu.

Yunaitet Pati i olsem wanpela liklik pati we i nogat namba olsem na em i save stap aninit long lukaut bilong PDM inap dispela ya we em i gat namba na em i kisim luksave long Spika olsem Yunaitet Pati i ken sanap olsem wanpela pati bilong em yet.

Oposisen lain bilong Bill Skate i bin amamas tru long lukim dispela senis o salens i kamap bikos nau ol lain bilong PPP, Pangu na Yunaitet Pati i brukim banis bilong Gavman na i kam long hapsait. Tasol ating Oposisen bai paul olgeta gen long wanem as tru na Pangu wantaim Yunaitet i go bek gen long Sir Mekere.

PPP lida Michael Nail bai kisim bikpela tingting nogut tru bikos ol lain ya i bin sanap na saptim em long kamapim dispela mosen egensim Gavman long las wik Tunde. Tasol nau tupela i go bek long Gavman, na PPP i stap bek long Oposisen. Ating lida Michael Nail bai paul olgeta long wanem Pangu na Yunaitet Pati i pasim tok wantaim em long salensim Gavman na taim ol i mekim samting i kamap pinis, tupela lusim em na go bek. Nogut ol i laik tromol Michael Nail i go aut olsem na ol i giaman soim dispela kain halt sapot tasol.

Olsem wanem long ol memba bilong tupela pati ya, ol i ting wanem long eksen bilong lida bilong tupela long pulim ol i go kam olsem. Ating em i wanpela samting we lo bilong Intagrity long Politikel Pati na Kendidet i mas lukim na skelim tu.

Gavman i mas gat moa long 70 memba long pasim vot bilong mekim kamap lo bilong Intagrity long Politikel Pati na Kendidet. Dispela em i bikpela lo na i mas gat moa long 70 vot. Olsem na ating Praim Minista i tingim dispela na i bel kol gen na kisim bek ol lain husat i bin salensim em pastaim. Maus bilong Praim Minista yet, em i tok ol dispela lain i bin salensim em ol i no moa stap long Gavman. Em i no inap raitim pas long tokim ol tasol ol i ken lukim ol toktok bilong em tasol.

Olsem yumi i save tok, Papua Niugini em ples bilong kain kain samting i save kamap long laik. Yu i no inap save tasol em bai kamap tasol na yu bai kirap nogut. Em stret olgeta bikos ol lain bilong yumi long palamen i mekim ol kain kain kirap nogut samting na yumi i paul tasol em wei bilong Papua Niugini ya.

Is Nu Briten holim woksop long kamapim gutpela kaaku na kopra

WALTER DARIUS i raitim

PNG KAKAU na Kokonas Rises Institut (PNGCCRI) long Is Nu Briten i wok long karimaut ol wok long kaniapim gut ol kakau na kokonas prodak.

Na PNGCCRI i wok long karimaut ol trening long skruim save bilong ol manmeri long rot bilong lukautim na kamapim ol gutpela kakau na kokonas prodak.

Sikspela meri Bogenvil wantaim eitpela man i kam long ol Niugini Ailan provins na wanpela bilong Is Sepik i bin stap insait long wanpela wik trening kos we Institut i bin holim long Keravat stesen yet. Dispela trening kos i bin kamap bihain tasol long open fil de we Institut i bin holim klostu long Keravat na i bin pulim moa long 2,000 fama ina ol memba

bilong ol Lokol Level Gavman long olgeta hap bilong Is Nu Briten na Ailans rijen long en.

As tingting bilong holim dispela open fil de bilong ol visita em long givim sans long ol fama long lainim na save mao long wok we PNGCCRI i mwkim na wanem wok em i ken mekim long kamapim gutpela gutpela kwaliti kakau, kokonas na planti arapela agrikalsa krop we kantri i save kisim mani long en na we rises stesen i karimaut ol tes long ol.

Ol bin holim dispela kos long givim ol lain husat i wok wantaim PNGCCI na Kakau na Kokonas Ekstensen Ejensi (CCEA) we i gat ol opisa long olgetaNGI provins long lainim moa samting long ol nupela rot we ol kamapim bilong planim na lukautim ol kakau na kokonas.

Yunaitet Nesens Developmen Program i bin fandim dispela kos.

RAMU
SUGAR



The Sweetest Thin



Aitape soka statim nokaut fainel resis

SOKA RIPOT

AITAPE Soka Asosiesen (ASA) i holim tupela raun tasol long dispela soka sisen bilong em.

Olsem na nau ASA bai statim nokaut we bai kamap namel long ol top faiv tim tasol. Ol tim nau i stap olsem bihainim ol poin leda.

Wimems divisen:

1. Pes Vokesenel, 2. Wantoks, 3. PCS, 4. Guria, 5. Mayiem Yunaited.

Pes divisen:

1. Wantoks, 2. Rowel, 3. Badis, 4. Maltik, 5. Mayiem Yunaited.

Primia:

1. Raihu, 2. Maltiks, 3. Badis, 4. Sen Josep, 5. Wantoks.

Pes wiken bilong Novemba i lukim ASA kik op long nokaut na ol ripot bilong gems i sanap olsem.

Long Sarere gem bilong wimems divisen namel long Guria na Mayiem i bin tait tru.

Dispela gem i lukim gutpela difens wok i kam long ol beklain bilong tupela sait wantaim wea i givim hat taim long fowat bilong tupela sait wantaim.

Ol fowat i bin i gat sampela sans long straikim gol tasol beklain bilong tupela wantaim i gat stail bilong ol tu na i nogat kiau i bruk inap long ful taim.

Tupela i go insait gen long narapela 10 minit tasol strong bilong tupela i wankain yet na i nogat wanpela i sutim gol. Sans nau i kamap long faiv penalti sut-aut. Tupela i traime go na sans tru bilong Guria i kamap taim kepten na swipa bilong Guria, Francesca Smith, i stailim liklik na i swipim bol i aburisim goli i go insait long rausim Mayiem Yunaited long nokaut raun. Guria i win 1-0.

Long pes divisen Mayiem Yunaited i autim Maltiks 4-3, primia divisen Sen Josep na Wantoks i no bin pilai. Taim i sot na gem bilong ol bai kamap gen long dispela wiken.

Ol gem long Sande i kamap we Grasruts Hom Bos Multiks i nilim ol taun boi Badis 3-0 Ol Badis i ting ol bai i mekim save ol Maltiks, tasol ol i kirap nogut tru.

Peter Texan bilong Badis i tok, "Mi no bilip long mipela i lus long tri-nil. Mipela go insait wantaim wanpela tingting olsem bai mipela i win. Mipela i no bilip long 3-nil sko long pes hap."

Mista Texan i tok bikpela asua bilong Badis em bol distribusen long senta fowads i no gutpela tumas, na planti sinia pilaia i bin dringim strongpela dring pinis tasol ol i bin fildim ol bikos ol i sot long pilaia.

Em i tok dispela pasin i no gutpela na ol i no ken mekim gen long bihain.

Thomas Aven, wanpela goli bilong Badis, husat i bin sik na i no pilai i tok tri-nil bai i no inap kamap sapos sinia pilaia bilong Badis i no bin dring.

Nokaut gems bilong dispela wiken we ol tim i lus namel long seken na led plesing bai i

pleim ol wina bilong las wik. Dro i sanap olsem.

Sarere 11

Wimem divisen

Wantoks vs Pes Vokesenel

Pes divisen

Rowela vs Wantoks

Primia divisen

Maltiks vs Raihu.

Sande 12

Womens divisen

Guria/FCS,

Pes divisen

Badis/Mayiem Yunaited

Primia divisen

Badis bai i pleim wina bilong wiken Sarere 4 gem namel long Sen Josep na Wantoks em tupela i no bin pleim.

Tupela bai i pleim dispela gem insait long ol gem bilong wiken Sarere 11.

Presiden bilong ASA, Peter Texan, i givim bikpela amamas na tenkyu i go long wanem ol tim i go aut nau long nokaut raun.

Numapo tok amamas long PNG Kumuls

WOL KAP RIPOT

SIAMAN bilong Papua Niugini Ragbi Futbol Lig John Numapo i salim bikpela tok amamas i go long PNG Gas Kumul long gutpela win bilong ol egensim Tonga long Tunde moning. Dispela win nau i surikim PNG Kumuls i go long kwata fainel bilong Lincoln Financial Group Wol kap resis.

PNG Gas Kumul i stapim las minit salens bilong Tonga long winim ol 30-22. Win bilong Kumul i mekim ol i winim olgeta tripela pul gem, na dispela em wanpela nupela rekot bilong PNG long wol tonamen.

PNG i winim tripela kantri France 23-20, Saut Afrika 16-0 na Tonga long Tunde moning 30-22.

Numapo i tok olsem Kumul i amamas bikos ol i wokim samting stret long bihainim tingting bilong ol. Bipo long Wol Kap gems, ol Kumul i tok ol i laik pilai long kwata fainel na i gutpela long lukim dispela skoa.

"Mi amamas long yupela olgeta kosa Bob Bennett na kosing staf na tu ol sinia tim memba olsem Adrian Lam, Marcus Bai na Stanley Gene.

PNG bai bungim Wels husat i pinis namba tu long Grup Tu. Na France bai salensim Nu Silan Kiwis husat i pinim namba wan long sem grup bilong Wels.

Brothers lus long Wollom kompetisen

RAGBI LIG RIPOT

SIHERENA Brothers i no pilai gut long traime wanpela spot insait long top faiv long Wollom op-sisen ragbi lig kompetisen long Bomana las wiken.

Ol 5Mile-Spiders i bagarapim sans bilong ol wantaim gutpela win 12-4 insait long namba foa raun bilong kompetisen.

Brothers i go pas long skoa 4-0 long haptaim. Tasol long namba tu hap, ol i pairim hat tru long traime holim yet dispela skoa na Spiders i win.

Brothers i gat sampela ol gutpela fowat olsem Paul Abba, Gret Bulage, Brom Supa, John Mondo na Rocky Kuri husat i pilai stront tasol ol i no kisim gutpela sapot long ol arapela memba bilong tim.

Manai Ovia husat i pilai long senta i no toktok gut wantaim Aringe Peter na tu Wabu Sabi long saplaim bal i go long beklain long traime putim trai.

Kosa bilong Spiders John Kume i tok em i amamas long tim bilong em i win. Em i tok tim bilong em i no pilai gut long namba wan hap, tasol, insait long namba tu hap, ol i kamapim wanpela strongpela

gem stret.

Ol Spiders i yusim gut bal na setim bikpela fowat bilong Solomon Hui. Hui i yusim eksperiens bilong em long Pot Mosbi Vipers na Brothers tim long helpim tru Spiders long win.

Hui i skorim tupela trai. Tupela trai i kamap taim em i givim gutpela sapot pilai long fowat na putim ya.

Olgeta konvesen bilong trai bilong Hui em Timothy Tenai i kikim.

Brothers i skorim wanpela trai tasol i kam long Andrew Kina. Arapela trai em referi Vincent Kera i tok fowat ya.

Skoa bilong arapela gem i sanap olsem 7 Mile Jets winim Wild Life Phytos 18-10, Vanuatu Raiders dro wantaim 8 Mile na Erima Bulls autim Hebou Tigers 4-2.

Long Sande, K'Fans nekim Police College 12-8, Kera autim Makana 16-12, Wild Duck wilwilim 9 Mile Crushers 12-0 na Soweto Storms autim Keregou Knights 6-4.

Poin lata nau i sanap olsem: 7 Mile Jets 8, Wild Duck 8, Bulls 8, Spiders 7, K'Fans 6, Crushers 4, Raiders 4, Phytos 3, 8 Mile 3, Storms 3, Knights 2, Eels 0, Tigers 0 na Police College 0.




□ Lok fowat bilong Difens Aaron Mai i laik traime kism bal long pilai bilong Harlequins long gren fainel bilong ragbi union long Pot Mosbi. Defence i lus 3-18 long difending sempion.



IKEN WOKIM GUTPELA SAMTING LONG YU



• Biknem pilaia bilong Pot Mosbi Vipers Peter Sterlo i saptim ol wantok bilong em Blu Spiders long yunivesiti studen ragbi lig A gred gren fainel. *Oi Poto: HENRY MORABANG.*





• Oi pilaia bilong Tigers i harim toktok bilongn kosa Francis Diap long bikpela A gret gem bilong mens sofbal long Pot Mosbi.



(hansut) • Pilaia bilong Elcom i holim bal egensim IPA long Pablik Sevan tas kompetisen long Murray Bareks insait long Pot NMosbi las wiken. Dispela kain stail i wok long kukim ol ples bilong pilai graun insait long dispela pablik sevans resis olgeta wiken.

• (Hankais) Mona Lisa-Leka bilong All Stars i kaikaim tang stret long gem egensim Norths las wiken long Pot Mosbi Wimens sofbal.



• Dokta Gideon Kendino (aiglas) sekim Leroy Muriki husat i bam na kism bagarap long nus. Tarito ya i no bagarap tumas.



• Fulbek bilong Harlequins Joe Kantu i giaman setim fowat bilong em long gren fainel egensim Defence long Pot Mosbi. Harlequins win 18-3.



IKEN WOKIM GUTPELA SAMTING LONG YU

Praivet Netbal kompetisen i no stat

NETBAL RIPOT

BIKPELA op-sisen netbal resis, Praivet Kampani netbal kompetisen, i no stat bikos long hevi bilong pilai graun.

Ol ekseyutiv i tok dispela kompetisen i save kamap namel long Oktoba na Mas i no kamap bikos long hevi bilong fi. As bilong em

dispela em ol ekseyutiv bilong Praivet Kampani netbal i no inap stretim askim bilong Pot Mosbi netbal asosiesen husat i papa bilong ol pilaia graun.

Pot Mosbi netbal asosiesen i askim Praivet Kampani long baim K24,000 sapos ol laik pilai long kot o sapos nogat ol i mas afiliet na ol i ken baim

tasol hap pe, K12,000 long yusim ol fil.

Ol ekseyutiv i tok astingting bilong kamapim dispela kompetisen em long stretim na promotim dispela netbal namel long ol wokman bilong ol kampani insait long Pot Mosbi siti.

Em i tok olsem dispela tingting bilong baim

K24,000 i no gutpela tru. Na i nogat gutpela risen bilong wanem ol i ken tromoi dispela bikpela mani.

Ol ekseyutiv bilong Praivet Kampani netbal i sori tru olsem dispela kompetisen i no stat long taim. Em i askim olgeta netbal tim long stap isi na ol ekseyutiv i painim nupela netbal kot.

Harlies winim namba 5 taitel



• Joe Kautu bilong Harlequins i laik trikim pilaia bilong Defence Leroy Muribi long gren fainel bilong POM yunion. Harlies i win 18-3. Foto: HENRY MORABANG.

RAGBI YUNION RIPOT

DIFENDING sempjon tim Harlequins i winim Defence 18-3 long winim namba faiv taitel bilong ol insait long ragbi yunion gren fainel long Pot Mosbi.

Defence husat i kamap olsem namba wan feveret long winim gem i no kamapim gutpela gem tumas. Tasol ol lain Harlequins husat i laik bekim dinau bilong tupela lus long sisen propa i mekim save stret long ol.

Na long skoa bilong arapela divisen gem, Defence i winim Royals 7-5 long Anda 19, Yunivesiti autim difens 15-7 long Anda 21, na long B gret, Defence i autim wanwok bilong ol long 1RPIR Taurama 10-5.

Olsem planti man i tingting long em, gem namel long Harlequins na Defence long primia divisen ya i strong tru. Ol fowat bilong tupela tim wantaim i strongim sait bilong ol.

Wanpela pilaia husat i kisim ai bilong olgeta sapota em Jonathan Kairu. Em i poromanim gut biknem fowat lan Liveras na

pamim ensin rum bilong Harlequins long skorim trai.

Na long sait bilong Defence em Aaron Miai husat i wok long kamapim gutpela gem tu long lok posisen. Dispela tupela pilaia i wok long kamapim strongpela gem tru insait long Pot Mosbi ragbi yunion kompetisen.

Kairu na Miai i save pilai wantaim long Harlequins tasol nau Miai joinim difens na Kairu i stap yet long Harlequins.

Ian Leklek i kamapim gutpela gem long namba 8 jesi. Em i save brukim skram na tu long brekdaun.

Arapela ol pilaia bilong Harlequins husat i kamapim gutpela gem em Kevin Rooney, George Wartovo, Carl Hoot, Liveras, Maina Wikina na Willie Petalie.

Na yangpela skram hap Julius Taunau i save lukautim trefik bilong Harlies na em i salensim biknem Pukpuk pilaia bilong Defence Nathan Chang.

Ol fowat bilong Defence olsem Albert Kulume, Silas Pomat,

James Pomat, Arjay Sabumei na Miaia i wok long pilim strong tru pawa bilong ol lain fowat bilong Harlequins.

Ol Defence i mekim bikpela rong tru long lusim namba wan winga Andy Vele long riserv bens na tu muvim John Larry i kam long fowat. Yangpela Orea Boino i bin go insait long las minit long Defence tasol dispela i helpim ol liklik bikos taim i wok long sot nau.

Robert Doko na Billy Rapilla i yusim gut eksperiens bilong ol long strongim beklain bilong Harlequins.

Ol arapela pilaia long beklain em Volu Rova, Jessie Mono, Winter Mongai and Joe Kautu. Mongai i skorim namba wan trai bilong Harlequins bihain long sampela gutpela sapot pilai long fowat.

Arapela trai bilong Harlequins em Joe Kautu i skorim. Yangpela Kautu em wanpela top soka pilaia tu. Em i bin pilai liklik taim wantaim Cosmos soka klab na bihain em i go fultaim long ragbi lig.

Hammerheads ino laki long Singapo Sevens

RAGBI YUNION RIPOT

LAE Hammerhead ragby yunion tim i bin pilai long Singapo Sevens tasol i no laki long go insait long fainel bilong Plet long las wiken. Dispela Singapore Sevens em wanpela kompetisen i save kamap olgeta ya na i save pulim ol tim bilong ol ovasis kantri.

Hammerhead i statim gut kempen bilong ol wantaim gutpela win egensim North Sydney tim 19-17, na bihain dro egensim Kenya 12-12. Na long Sande ol i winim Brunei Wanderers 35-20 na bihain Swedish Vikings 12-7.

Dispela win na lus bilong ol i larim ol i go pilai insait long Plet divisen tasol ol i no strong tumas we nesenen tim bilong Hong Kong i nekim ol 12-7.

Ol habpek Eddie Passingan na Sam Koi i kamapim gutpela kem na ol pilaia long fowat husat i kamap gut tru em John Milba, John Karukaru na Albert Kaupa.

Lae Hammerheads i bungim ol lain bilong ol long Singapore Cricket Graun. Dispela em i namba foa taim ol lain long Morobe i go stap long dispela tonamen.

Yalu i kisim nupela yunifom

BASKETBALL RIPOT

RIBACK Stevedoring kampani long Lae i givim 2-pela set yunifom long wanpela basketbal tim bilong ol Ahi papagraun bilong Lae siti.

Yalu Basketbal tim i bin kisi dispela ol yunifom long wik i go pinis long redim ol long pilaia insait long Morobe Country basketbal tonamen em bai kamap long Lae klostu nau. Ol meri long Yalu i bin winim dispela basketbal resis las ya.

Long nupela sisen bilong taun basketbal long ya antap (2001), Yalu i tingting long putim tupela tim.

Stat long las ya, Riback Stevedores (Ltd) i bin save putim K6,000 long helpim sikkela Ahi ples long Lae em long Sipaia, Wagang, Butibam, Kamkumung, Yalu na yanga long wok bilong spot. Wanwan ples i save kisim K1000.

Kampani i luk save long wanwan spot man na meri o ol tim bilong dispela ol viles.

Operesen menesa bilong Riback George

Gware i tok kampani bilong ol i laik helpim ol yangpela manmeri long ples long pilai spots na dispela rol tu i ken mekim bai ol i kamap gutpela manmeri long ol komyuniti bilong ol

Presiden bilong Yalu Basketbal Asoisesen Aquila Adam na tupela pilaia long tim bilong meri, Nancy Selese na Magaret Saing i bin kamap long opis bilong Riback long kisim sek mani bilong ol

Ol Ahi papagraun i gat 41sia long Riback Stevedore kampani.

Op-sisen spot i kamap bikpela long NCD

SPOT RIPOT

SPOT sisen bilong 2000 insait long kantri i wok long pinis nau. Sampela i pinis na ol i malolo na wetim tasol nupela sisen.

Long Nesanel Kapitel District (NCD) ol man husat i save pilai ol spot i wok long kamapim op-sisen bilong ol dispela spot. Op-sisen spot ya i kamap olsem wanpela laip bilong ol pipel insait long sisen.

Sapos yu raun long liklik eria na setelmen insait long siti, wanwan eria i gat ol op-sisen spot olsem ragbi lig, tas ragbi, volibal, netbal na tu bowling.

Na yu lukluk raun, dispela op-sisen i nogat mak o tambu. Ol lapun, yangpela na ol pikinini tu i save stap long dispela resis. Em i kamap olsem samting bilong ol wanwan famili o wanpinis.

Peter Drau na Freddy Mary em tupela sapota husat i kamap long lukim volibal kompetisen bilong Sen Mary Catholic Sios long Waigani. Tupela i tok tupela i amamas long kam na bungim ol lain na pilai.

Op-sisen em wanpela kompetisen we planti ol lain i save soim stail bilong ol. Na planti ol biknem pilaia i kamapim nem taim ol i kamap long op-sisen lig na i go insait long taun kompetisen.

Sampela ol biknem pilaia olsem Stanley Gene, Marcus Bai na David Buko i stat pilai op-sisen na bihain ol i joinim ol klab long Goroka na kamapim nem long pilai ragbi lig.

Tupela nau i stap pilai long Australia na Ingran. Bai em wanpela pilaia em ol i painim taim Bialla Brothers i save holim wanpela salens i kamap namel long ol na Paga Panthers bilong Pot Mosbi.

Taim Stanis Bai, brata bilong Marcus i stretim rot bilong dispela tupela tim long salens, Marcus i makim Bialla na kam salensim Paga Panthers long op-sisen ragbi lig salens.

Dispela taim nau Stanis i holim bek Marcus em i pilai wantaim Paga Panthers. Bihain long dispela em i go stap insait long Pot Mosbi Vipers na wantaim tru em i go long PNG Kumul tim.

Bihain long 1995 Wol Kap, em i stat long winim kontrak long Ingran, na bihain em i go long Gold Coast long Australia. Na taim Melbourne Storms i stat, Marcus Bai em wanpela bilong ol namba wan pilaia i sain wantaim dispela klab.

Nau ol gavman dipatmen, praivet kampani na publik sevans tu i wok long statim kompetisen bilong ol. Dispela em taim bilong ol long serim save bilong ol wantaim ol arapela pilaia.



IKEN WOKIM GUTPELA SAMTING LONG YU

PNGFA makim pilaia bilong Lae long anda 17

NESENEL anda 17 soka kosa Ludwick Peka i makim maus bilong PNGFA long tokaut long ol pilaia bilong Lae husat bai stap long nesenel tim.

Dispela tim ol i makim bihain program bilong PNGFA yut komiti long painim na makim ol yangpela husat bai makim kantri long bihain taim.

Peka i tok ol i makim 60 pilaia olgeta. Tasol bihain long tripela mun trening, em i makim 15 pilaia tasol long stap insait long skwat wantaim ol arapela pilaia long Pot Mosbi. Nem bilong ol pilaia em Armstrong Peka, Clement Peka, Wayne Aaron, Michael Foster Erison Kolai, Ludwick Marika, Jacob Pandu, Spaing Basinu, Ikomo Soronane, Jets Kasadami, Lenox Song, Jack Gawas, Paul Amek, Clement Obi na Teapol Orasis

Armstrong Peka i makim pinis kantri long pilai las yia long Nu Silan. Em bai go pas long tim bilong Lae wantaim liklik braks bilong em, Clement.

Peka husat i kisim wok olsem Anda 17 kosa long Me 31 long dispela yia i tok olsem em i

amamas long dispela skwat we i karim nem bilong Lae. Ol bai bung wantaim ol pilaia long Pot Mosbi long kamapim wanpela strongpela tim long lukim strongpela tim i makim kantri.

Ol pilaia long Pot Mosbi i hatim trening i stap aninit long lukaut bilong Joe Turia na Kisakiu Posman. PNG bai join im 5-pela arapela kantri long resis insait long Osenia kwali-faing tonamen long Apia, Samoa.

Insait long arapela soka stori, ol selekta bilong Momase i makim pinis tupela skwat long makim rijen long Hailens na Momase Soka salens we bai kamap long Novemba 24-25.

Siaman bilong ol selekta, Peka i tok em i amamas long tupela skwat ya. Wanpela skwat em bilong ol man na arapela bilong ol meri.

Skwat bilong ol man em: Godfried Banina, John Panu (v/capt), Sam Awele, George Wambre (Madang 1), Jeffrey Steven, Nelson Baduk, Betuel Lapan, Martin Margaret, Jeffrey Sali (Umi), Masi Ngaiya (capt), Rupert Peka, Ken Gule, Mauri

Wasi (LFA), Hans Fred, John Kaling (Lahi), Oscar Paul (KDSA), Xavier Zui (Morobe), Robin Malwok (Karkar), Willie John (Sumgilbar) and Sisu Terence (Madang 2)

Ol opisel em Bob Morris - kosa, Koita Ponga- asisten kosa, Peter Manau menesa and asisten menesa James Gahano.

Skwat bilong ol meri em: Stella Inais, Summy Daniel, Monista Sami, Xena Kens, Vivian Zemo (Lahi), Aiva Tamate, Andriolo Pokauta, Geane Fuawe, Tracy Kig (Madang 1), Giam Martin, Rosa Anton (KDSA), WAting Yangum, Sophie Anioa, Saking Gani, Edna Thomas, Monica Howi (LFA), Aka Kusunan (Wau), Mary Timon (Ramu), Sherly Moriarty na Susan Kossie (Madang 2)

Kosa em Oti Atu (LFA), asisten kosa em Paul Kig (Madang), tim menesa em Bryan Ross (LFA) and asisten menesa em Roslyn Maiya (Madang).

Nupela soka resis bai kukim Pot Mosbi

SOKA RIPOT

NUPELA soka resis bilong Papua Niugini Futbol Asosiesen (PNGFA), Orogen tonamen ov Ekselens bai stat long dispela wiken long Bisini soka graun.

Pot Mosbi Soka Asosiesen i kisim tok orait long go pas long ranim dispela tonamen long traim kamapim na strongim stendad bilong soka. Dispela tonamen i olsem wanpela op-sisen bilong ol top tim insait long Pot Mosbi.

Ol tim bai stap insait long dispela resis em (primia divisen) IBS United, Rapatona, Univesity, LBC Defence, SP Brewery, Yut Tim 1 na Yut Tim 2. Na long divisen bilong ol meri em: Telikom, Cosmos, LBC Defence, WMI, Guria, Yut Tim 1 na Yut Tim 2.

Ol ogenaia i tok olgeta gem bai ran inap 40 minit long wanpela we. Wanwan tim i ken kisim 5-pela autsait pilaia long sapotim ol.

Ol ogenaia tu i askim ol PMSA referi na tu ol voluntia long kam na lukautim ol soka gem ya.

As tingting bilong dispela kompetisen em long givim sans long ol top pilaia i salensim ol yet. Na tu ol yut tim i ken traim skelim save na strong

bilong ol wantaim ol sinia pilaia long taun kompetisen.

PNGFA i kamapim dispela kompetisen long helpim yut tim na tu ol top pilai long stap long fom na sapos wanem ovasis tonamen i kamap long op-sisen, em bai i no inap painim hevi.

Wanpela gutpela piksa em Melanesian Kap i save kamap long op-sisen we planti ol pilaia bilong PNG i no save fit long pilai. Skoa bilong ol las gem long Vanuatu i soim stret olsem ol pilaia long PNG i nogat mets fitnes.

Long Sarere, gutpela gem tru bai kamap namel long IBS United na Defence long belo bek (12.30pm). Na long apinun, Yut Tim 2 bai salensim SP Brewery.

Na long gem bilong ol meri, Defence bai bungim WMI na long bikpela gem bilong meri em Telikom bai salensim Yut Tim 1. Yut tim 1 bai bungim Telikom husat i sempion tim bilong kantri na Pot Mosbi.

Na long Sande, Yut 1 bai salensim ANZ Yunivesiti, na Rapatona bai bungim Cosmos. Na long gem bilong ol meri, Cosmos bai bungim Guria, na ANZ Yuni bai skelim strong bilong ol yangpela meri ya, Yut Tim 2.



CONSTITUTIONAL DEVELOPMENT COMMISSION

Office of the Director
ADVERTISEMENT



Seminar on proposed Organic Law on Integrity of Political Parties and candidates

The Constitutional Development Commission will host a Seminar on Friday 10th of November, 2000 at the Park Royal Hotel for one (1) full day.

Members of Parliament, Political Party Leaders and Political Parties who have expressed reservations on this proposed law will be invited to present change that they want to see made to the proposed law.

The Constitutional Development Commission, the proposer of the Organic Law will endeavour to present any changes agreed at the Seminar to the National Executive Council.

Members of the Community who wish to attend the Seminar must contact the CDC Office and Register their intent.

Even though the Seminar will be open to the public, the number will be limited if space does not permit.

All our program will be published in the next few days.

Contact Mr Anthony Sali on telephone: 323 0655 or fax: 323 1134.

RUSSEL IKOSI - Acting Director

SEMINAR

Theme: Proposed Organic Law on the Integrity of Political Parties and Candidates Bill.
November 10th 2000 - Park Royal Hotel

Morning Session Chairman - Sir Rabbie Namaliu, Kt MP

9:00am Opening Address: Hon. Yauwe Riyong, MP, Chairman of the Constitutional Development Commission.

9:15am Overview of the Integrity of Political Parties and Candidates Bill by Professor John Nonggorr - Consultant of the Constitutional Development Commission.

Recommendations for changes to the proposed Organic Law.

Panelists:

9:30am 1. Hon. Bill Skate, MP, Opposition Leader and Leader of PNC.

9:45am 2. Hon. Chris Haiveta, MP and Leader of Pangu Party.

10:00am MORNING TEA

10:15am 3. Hon. Paul Pora, MP and Leader of National Party.

10:30am Discussions and summations

11:30am-13:00pm LUNCH

Afternoon Session Chairman - Sir Anthony Siaguru Kt, Chairman of the Transparency International PNG.

Recommendations for changes to the proposed Organic Law.

Panelists:

1:30pm 1. Hon. Gabia Gagarimabu, MP and Leader of PRP

1:45pm 2. Hon. Michael Nali, MP and leader of PPP

2:00 AFTERNOON TEA

2:15pm 3. Hon. Ted Diro, MP and Leader of PAP

2:30pm Discussions and summations

3:30pm Closing Remarks - Sir Mekere Morauta, Kt, MP, Prime Minister and Leader of PDM.


"In framing a system which we wish to last for ages, we should not lose sight of the changes which ages will produce".

James Madison, 1787

This Seminar is sponsored by CDC.



IKEN WOKIM GUTPELA SAMTING LONG YU




• Naringel viles long Los Nigros Ailan long Manus i welkam long Ledi Roslyn Morauta. Poto: PMs Media Unit.

• Memba bilong Goroka Henry Smith i givim ol kopi masin na masin bilong katim timba long ol pipel bilong em. Poto: SAPE METTA.




• Praim Minista Sir Mekere Morauta i sekim ol woda long bikpela de bilong independens.

• Ol meri grup long Manus i amamas bung wantaim meri bilong Praim Minista, Ledi Roslyn Morauta. Poto: PMs Media Unit.



• Raithan: Oposisen lidà Bill Skate i opim haus bilong tisa long Kranget long Madang. Memba Jacob Wama i givim mani.

• Lephon: Pasin bilong lukautim na laikim tumas pik em bun stret bilong ol hailens. Tasol noken ting ol hailens tasol i gat nem long lukautim ol pik. Liklik Mona-Lisa husat igat tupela krismas i save lukautim pik tu. Na em i no bilong hailens. Em bilong Galp provins, tasol mama i karim em long Goroka, Isten Hailens olsem na em i laik traim tasol pasin bilong ol hailens long lukautim pik. Poto: SAPE METTA.



LAIPSTAIL

PEKU PILIMBO i raitim

"Mi save kisim K400 o K500 long wanwan de. Dispela em taim ol manmeri i bisi stret," Yombi i tok.

"Ol opis wok manmeri save wetim tupela wik long kisim dispela kain mani.

"Mi save kisim dispela kain long wanwan de na bihain long wan wik, mi save kisim K7000 o K7500," Yombi i tok.

Yombi Ombowa em wanpela man bilong raun na salim smok brus insait long kantri. Mitupela sindaun stori stap na em i tokim mi olsem em kam long Kelakalol Kembo viles long lalibu distrik insait long Sauten Hailns provins.

Em bin lusim ples taim em yangpela yet na go wok long kopra plentesen long Bogenvil long ples olsemBuka, Buin, Trputz na Kieta. Bihain em lusim Buka na kamapim bes bilong em long Markham insait long Morobe province.

Em i maritim wanpela meri Markham na gat tripela pikinini. Krismas bilong Yombi i olsem 38 krismas.

Yombi i save raun long olgeta hap bilong kantri. Em i tokim mi olsem em i save go long Wes na Is Nu Briten, Nu Ailan na Lahir, Popondetta, Tabubil long Westen provins na olgeta hailans provins.

Em i tok dispela em nambawan taim bilong em long kam long Pot Mosbi tasol ol opisal long Gordons maket i bin kisim olgeta brus bek bilong em na em i painim hat long baim balus tiket long go bek long Lae na kisim nupela saplai.

Yombi i tok em i no save stap longpela taim long wanpela ples tasol nau em i stap 10-pela wik olgeta long Mosbi.

"Brus i no save kamapim wanpela rabis insait long maket. Mi ting i tambu long salim ol stua kaikai long maket.

"Brus i kam stret long gaden, i no long wanpela fektori tasol ol man i kam na kisim i go na i no kam givim bek," Yombi i stori long pasin ol sekuriti gad long Gordons maket i bin mekim long em.

"Mi bin kisim tu na hav bek brus i kam. Long dispela inap mi kisim K5000 samting tasol nau mi painim ples i stap," em i tok.

"Sekuriti gad i i kam tasol na pulim ol dispela brus bilong mi. Ol i kisim i go. Mi ting ol bai givim bek long mi tasol mi no kisim sampela," em i tok.

Ol narapela hap ples i orait. Ol i no save mekim olsem. Kisim samting bilong ol man nating," em i tok.

"Sampela manmeri save stap tasol na baim sekonhan samting na mekim propit i stap. Dispela em ol les lain stret, mipela sampela save planim ol samting long gaden stret na kam salim.

"Pipia pasin stret. Mi wantaim famili bilong mi gat wanpela blok mipela planim smok brus.

"Mipela pikim, putim long san na drain pinis. Skelim ol lip long sais bilong ol na pasim gut tru na putim long ol 50kg bek.

"Mi save olsem taim mipela putim fopela o faivpela bek, dispela i min mipela i gat K7000 o K8000 pinis," Yombi i stori.

"Mi save putim ol dispela bek antap long bas, kisim i kam long Lae. Sampela taim mi save kalap long balus long Nadzab ples balus. Sampela taim mi save kisim sip.

"Mi save laik long salim brus

Brus ken givim mani



long Tabubil bikos ol manmeri bai kam longwe tru long baim brus," em i tok.

Mista Yombi i tok em i no save salim lus. Em save pasim olgeta lip long sais na salim ol dispela karamap long K2, K3 o K5.

"Ol manmeri save kam baim long mi na salim gen bilong mekim profit. Sapos ol i baim tupela K5 karamap, dispela i gat K10 o K15 profit bilong ol," em i tok.

Em i tok em save salim olsem wolsel na kisim mani pinis, em save go bek long ples long kisim nupela brus bek. Taim em i go salim long ol narapela ples, ol famili long ples i save painim na stretim ol smok bai em i ken go kisim tasol, givim olpela sels mani long ol na go aut gen.

Ol famili i save stretim olgeta samting na em savego kisim, kalap long bas, balus o sip na go salim gen.

Em i tok olsem taim em salim na kisim inap mani, em save salim long pos opis go long ples na mama save kam kisim.

Em i tok planti stil pasin i kamap na nogut ol man i paitim o kilim em na em save mekim dispela.

"Mi go traim salim raun long ol hailans provins pinis. Ol Hagen bai kam tainim ol smok, lukluk gut tru na tok 'Em smok bilong nambis ya, maski' na lusim.

"Wanwan nambis mani o hailans man husat save smokim brus bilong nambis save baim na mi save kisim longpela taim long salim ol smok," em i tok.

Mista Yombi i tok Goroka maket i orait bikos ol manmeri i save baim brus. Wanwan de em i save mekim K300 o K400 nabaut. Em tok sapos em karim faivpela bek i go, em ken salim ol dispela bek insait long wan wik na kam bek gen long Markham bilong kisim nupela

sapalai.

Em i tok em i save baim ol brus long ol narapela man insait long Markham yet. Em i save bungim olgeta ol dispela brus na kisim i go salim long ol narapela ples. Ol i save pasim 10-pela o 2-pela lip brus na salim long ol long K2, K1 o 50t. Long ol dispela, em save putim narapela K1 0 50t bilong em yet antap olsem profit na salim.

"Ol manmeri husat i save baim long mi na salim lus o wanwan lip brus i save mekim bikpela mani moa long mi," em i tok.

Em i tok wanem hap em i go stap, em save spendim K10 wanwan de long baim kaikai na taim smok pinis em save kisim ol mani bilong brus na go bek long ples.

Bipo long em i kamdaun, em i bin kam lusim faivpela 50Kg bek-brus wantaim wanpela wantok long Higaturu oil pam long Oro provins. Em i tok ol i bin salim tok i kam olsem wantok ya i salim smok pinis na mani i redi i stap. Em mas kam kisim bipo long em go long Lae.

"Mi laik go kisim dispela mani tasol mi nogat mani bilong baim tiket. Wantok nogat telepon, inap mi tokim em long salim mani long pos opis na mi go bek long Morobe," Yombi i tok.

"Sapos i gat ka rot, em mi go pinis olsem long Popodeta, Bulolo, Wau na kamap pinis long ples.

"Mi tingting long wokabaut olsem long Kokoda Treil tasol mi pret long ol stilman. Mi pipia tru tasol nogut ol i ting mi gat sampela mani na ol paitim o kilim mi.

"Mi harim long sampela man olsem ol papa bilong rot i laikim sampela kain kompensesen na wok long stil na bagarapim planti manmeri husat i wokabaut long dispela rot," Yombi i tok.

Yombi i wanpela man bilong wok

hat stret. Em i plen long salim olgeta pikinini bilong em i go long skul.

Em i tok gavman i hapim skul fibilong olgeta skul pikinini na plani papamama husat i ting gavman bai wokim olgeta samting i painim aut olsem nau ol yet bai peim fi.

Nambawan pikinini man bilong Yombi i stap nau long gret 7 na em i save peim skul fi, baim klos na ol narapela samting bai pikinini i ken skul gut.

Mi nogat skul bilong mi. Mi no save long rit na rait na save painim hat taim stret," Yombi i tok.

Em i stori olsem nambawan taim em lusim ples na kamap lon gkopra plentesen long Buka, em bin go insait long haus bilong wanpela waitman. Long dua ol i bin raitim 'Dok nogut i stap. Lukaut.' Em i bin givim siksti i go insait long haus na dok i bin kalap antap long em na kaikaim em nogut tru. Bihan waitmani kam na askim em "yu save long rit na rait tu o? Notis tok dok i stap ya yu lukim o wanem?" Em i tok dispela tingting i mekim na em laik lukim olgeta pikinini bilong em ken go long skul.

"Mi laik amamas long lukim pikinini bilong mi rit na rait. I no olsem mi bai ol i no save olsem dok i stap na dok i kaikaim ol."

"Mi bin sem nogut tru taim waitman i kam mekim ol dispela toktok. Dok bilong em i kaikaim mi na bihain em kirap krosim mi olsem," Yombi i tok.

Em i tok planti manmeri i save sindaun long ples na ting olsem ol wok manmeri bilong kampani na gavman i kisim planti mani. Em tok taim bilong potnait long ples olsem Hagen, Kundiawa, Goroka na Mendi bai yu lukim planti manmeri pulap long Fraide pe de. Em i tok ol dispela lain i save tingting olsem wokman long opis i gat planti mani na ol i save les na sindaun nating long ples.

"Ol i no mekim gaden na planim sampela samting bilong salim long maket. Sindaun nating na mekim ol yet luk pipia stret taim ol i kam raun long taun.

Mi save sem na sori long lukim ol dispela kain les manmeri. Mi tu wan kain olsem ol tasol mi save gat inap mani bilong mi yet.

"Mi save lukim ol wokman na mi sori long ol bikos kainkain hevi bilong ol lain long ples i save pundaun antap long ol," Yombi i tok.

"Taim bilong stretim sampela hevi olsem marit seremoni, kompensesen, skul fi na wanem liklik samting ol manmeri long ples inap mekim sapos ol yusim tingting bilong ol.

"Ol save sindaun nating na ting ol wokmanmeri bilong taun bai helpim ol wantaim dispela ol hevi," Yombi tok.

Em i tok planti taim em save sori long lukim ol wok manmeri i kisim kainkain hevi na i no save kaikai o silip gut. Em i tok me yet i no bin go long skul tasol em amamamas olsem em i yusim liklik save God i givim em long mekim sampela mani bilong famili.

"Mi laik tokim olgeta manmeri long ples olsem noken sindaun nating na ting ol wok manmeri tasol i gat mani. Sapos yu wok na kamapoim sampela samting bai yu lukim mani," Yombi i tok.

Yombi nau yet i stap long 5 Mile tasol em i salim tok i go pinis long meri bilong em. Insait long wan wik o tu wik samting bai em i kalap long wanpela balus, go bek long ples bilong kisim moa brus.

Em i tok sapos Mosbi i olsem kain, em bai traim i go salim brus bilong em long sampela narapela hap long PNG. Em i tok ol narapela manmeri i mas mekim wan kain pasin em mekim na noken sindaun raun nating.

Stail na kala bilong pasin tumbuna i no moa i stap

SAPE METTA i raitim

I GAT bikpela wari nau i wok long kamap na planti ol lapun i pilim bikpela sori tru long lukim olsem kalsa na tredisen o pasin tumbuna bilong yumi ol Papua Niugini i wok long dai aut isi isi. Na i no long taim bihain bai olgeta dispela pasin tumbuna bai i ken stap na pinis olgeta.

Wanpela long ol dispela lapun husat i gat bikpela wari tru long pasin tumbuna em Samuel Fanifa bilong Usireka viles. Yagama long sait bilong Okapa distrik insait long Isten Hailians.

Mista Fenifa em i go pas olsem wanpela viles komyuniti lida o sif na tu em i wanpela olpela provin-sal gavman politisen bilong isten Hailians.


Em i gat samting olsem 78 kris-mas na long haphap tok pisin na tok ples Okapa (brukim tok pisin na tokples) em i tok long ol yia i go pinis long taim bilong ol tumbuna i kam antap long 1980, kalsa na tredisen bilong PNG em yumi save holim pos strong tru.

Tasol bihain long 20-pela kris-mas stat long 1980 i kam antap long yia 2000 dispela ol gutpela stail na kala bilong kalsa na tredisen i no moa kamap gut olsem bipo.

"We i stap ol dispela naispela kala na stail bilong pasin tumbuna bilong yumi ol pipel bilong PNG?" Mista Fenifa i askim.

Em i tok long planti yia i go pinis em i wanpeal man husat i save laikim tumas long lukim na patisipet long Goroka So long wnem ol kainkain gutpela stail na kala bilong so i save kamap gut tru long ol dispel yia i go pinis.

"I tru olsem Goroka So i go het yet tasol planti ol gutpela pasin tumbuna i go hait pinis na i no long



• **Dispela tupela piksa (antap na hansut) i soim wanpela yangpela meri Goroka i amamas na bilas tumbuna long Goroka So dispela yia. Wanwan yangpela nau i amamas na holim yet pasin tumbuna tasol planti i go pas moa long pasin bilong waitman na lus tingting long kastom na pasin tumbuna bilong yumi yet. Bihain long 10 o 20 yia, bai yumi no moa lukim pasin tumbuna insait long kantri. I gutpela long lainim ol yangpela pasin tumbuna nau.** Foto: SAPE METTA.

taim olgeta kalsa na tredisen bilong yumi bai i go hait olgeta," Mista Fenifa i tok.

Em i tok nau yet taim ol lapun o ol tumbuna i wok long dai, i luk olsem ol i wok long karim ol pasin

tumbuna i go wantaim ol.

"na narapela samting em mi laik-sutum tok long en em pasim bilong ol waitman i kamap bikpela tru na i daunim stret ol tumbuna pasim bilong yumi ol PNG.

"Mi i ken tok olsem kalsa na tredisen bilong ol waitman o westen kantri i wok long kamap strong tru na ol yangpela bilong yumi tude i go pas na holim strong tru ol dispela westenais kalsa na tredisen.

Long dispela as ol i no moa tingim kalsa na tredisen bilong ol yet," Mista Fenifa i tok.

Em i tok nau em i rait taim we yumi ol lain manmeri na pikinini bilong PNG i mas kamapim sampela gutpela rot na kamapim sampela kain skul long kisim bek save

bilong ol dispela pasim tumbuna bilong yumi we i go hait pinis.

Mista Fenifa i tok sapos yumi no hap long mekim sampela samting long bringim bek na holim pos bilong ol pasim tumbuna, kalsa na tredisen bilong yumi, sori tumas luk olsem bihain long narapela 10 o 20 pela yia olgeta dispela kalsa na tredisen bilong yumi bai i go hait na lus olgeta na ol pikinini na ol tumbuna bilong yumi long ol yia antap long 2010 na i go bai i no inap save long pasin tumbuna.



Pamuk bisnis i kamap bikos i nogat mani

YAKAM KELO i raitim

PASIN bilong salim skin o bodi long mekim mani i wok long kamap bikpela insait long ol bikpela taun na siti olsem Mosbi na Lae. Na dispela i save kamap long ol ples olsem hotel na klap we ol meri i save bungim ol man na pasim tok wantaim ol long wanem kain prais ol bai kisim long wanpela nait. Sampela taim ol man i save pasim tok wantaim ol meri long ples bilong wok.

Insait long wanpela bikpela bung we i kamap long Mosbi long las mun, ol dispela meri husat i save salim skin bilong ol long mekim mani i tokaut olsem ol i mekim olsem bikos ol i ken painim mani long dispela rot. Planti i tok ol i mas mekim mani long lukautim na sapotim famili bilong ol bikos man bilong ol i lusim ol o ol i nogat sans long painim wok long ol opis. Wanpela yangpela meri i tok em i save mekim dispela wok bikos kandre meri bilong em i bin sutim tok long em olsem em i save hait na slip wantaim man bilong em. Olsem na em i belhat na mekim dispela pasin.

Ol meri ya i gat planti kain kain toktok bilong ol yet long tokaut long wanem as ol i go insait long dispela kain bisnis wok.

Tasol ol dispela pamuk meri i tok tu olsem lain bilong ol ino planti. Tasol i gat planti man husat i laik baim ol meri na slip wantaim ol. Dispela i soim olsem sapos i gat planti man, em i isi long wanpela meri i ken mekim planti mani long

wanpela nait o insait long wanpela wik. Ol meri i tok ol i save mekim olsem K300 long wanpela wik. Dispela i min olsem long wanpela potnait wanpela meri i mekim K600 we i nogat takis long en.

I tru olsem dispela em i no pasin bilong mipela long Papua Niugini. Em i pasin bilong ol waitmanmeri long ovasis tasol bikos kantri bilong mipela i wok long bihainim lek bilong ol bikpela ovasis kantri long wok na bisnis, skul na ol save, mipela i wok long kisim pasin na stail bilong ol tu.

Long taun, sapos yu nogat mani, yu i no inap sindaun gut na slip gut. Bai hangre i bagarapim yu na famili bilong yu na yupela i mas painim sampela kain rot long painim mani long baim kaikai na ol samting. Sapos nogat, yu mas stil o mekim arapela wok long painim mani bilong stretim bel. Dispela i no stail bilong ples bikos sapos yu hangre, yu inap go long gaden na kisim kaikai i kam kukim long paia na kaikai isi tasol.

Planti manmeri na Nesenel Kaunsil ov Wimens (NCW) i bin autim strongpela tingting egensim tru dispela pasin ol meri i mekim long kisim mani long bodi bilong ol. Ol i tok dispela i bagarapim tru nem bilong ol meri long Papua Niugini. Bikpela toktok bilong ol em ol i meri i mas go bek long ples bai famili i ken lukautim ol gut na sapotim ol long ples bilong ol stret.

Sait bilong lotu tu, ol lotu lain i egensim tru dispela pasin bikos ol i tok em i bikpela sin tru long mekim dispela kain pasin.

Tasol long sait bilong Gavman,

ol i no mekim wanpela stretpela toktok yet long dispela samting. Gavana bilong Morobe Luther Wenge i tok em i laikim Gavman i mekim pasin pamuk i kamap olsem lo bai ol manmeri i ken mekim pamuk stret long stretpela ples na hap we i ken bihainim rot we i kiin na ol sik nogut olsem gonoria o sik AIDS i noken kalap nabaut. Tasol dispela toktok bilong Gavana Wenge i kisim bikpela toktok salens i kam long olgeta kona bilong Papua Niugini na tu long palamen haus yet. Tasol em i tokaut olsem dispela astingting bilong kamapim lo bilong oraitim pasin pamuk em long traim daunim hevi bilong sik AIDS i noken kamap bikpela na bagarapim planti gutpela manmeri bilong Papua Niugini. Ol pamuk lain i ken go het long pamuk bisnis bilong ol na i noken pulim ol gutpela lain i go insait, Mista Wenge i tok.

Sampela ol saveman na save-meri i tok dispela pasin bilong pamuk bisnis i kamap bikos hevi bilong mani na prais bilong baim ol kaikai na ol samting i go antap we ol planti manmeri i painim hat long mani. Ol i tok sapos Gavman yet i ken go pas long kamapim ol gutpela na stretpela polisi o rot bilong wok bisnis na developmen bilong kantri i ken go bihainim em bai orait. Dispela inapim kamapim planti wok bilong ol meri na tu givim bikpela sans long ol meri i ken kisim planti trening long kamap ol wokmeri long lukautim laip na sindaun bilong ol wantaim famili bilong ol.

Wanpela televisen program

bilong Australia i bin kamap long 60 Minutes long Sande i soim pasin pamuk long Tailan. Planti meri i save go salim skin bilong ol long ol waitman long kisim mani bikos planti i nogat wok na ol i save painim hat long mekim mani long ples bilong ol.

Maski Gavman bilong Tailan i gat strongpela lo i tambuim pamuk bisnis, i hat liklik long stapim bikos namba bilong ol meri i wok long go planti insait long dispela bisnis. Na planti waitman long ovasis i wok long go long Tailan long stap holide na amamasim skin bilong ol long dispela pamuk bisnis.

Wanpela waitman i tokaut long dispela program olsem em i bin slip wantaim ol meri mak olsem 100. Narapela i tok em i no save amaspela meri olgeta bikos planti tumas na em i no inap save long namba. Ol i toktok na laip wantaim bikos ol i tok dispela em laip na laik bilong wanwan long painim wanem kain amamas bilong ol yet. Sapos yumi skelim dispela, ol dispela waitman i ting ol meri em liklik samting tasol long kisim na i no hat long ol. Ol meri bai ron i kam long ol olgeta taim bikos ol i gat mani long pulim ol meri i kam. Ol dispela meri Tailan i kam long komyuniti na sosati wankain olsem PNG. Ol i kam long asples na setelmen we laip i hat long mani na planti bilong ol em ol turangu lain we i sot long mani na kaikai olsem na ol i mas mekim pasin pamuk. Yumi ken egensim hia long PNG, tasol lukim ol Tailan i gat wankain hevi olsem mipela na ol i mekim dispela. Olsem na bikpela wok o salens

bilong mipela em long daunim hevi bilong mani na kaikai insait long komyuniti na ol setelmen long kantri.

Wanpela mausmeri bilong NWC i tok wanpela rot em long Gavman i mas kamapim lo bilong tambuim ol manmeri i raun na stap nating long ol taun na siti na nogat wok. Gavman i mas strongim dispela lo long stretim dispela pamuk bisnis sapos mipela i ting em i no gutpela pasin long ai bilong mipela olgeta. Dispela pasin i kamap bikos long hevi tru tru we yumi save bungim olgeta taim long laip na sindaun bilong yumi. Em nogat inap kaikai na nogat mani.

Planti hevi we i pas long dispela pasin bilong pamuk bisnis em;

- planti marit laip bai bruk na ol pikinini bai kisim taim,

- ol sik nogut olsem AIDS bai kamap planti tru long kantri,

- Planti manmeri bai dai long sik AIDS,

- ol dispela meri bai i nogat gutpela marit laip long bihain,

- planti man bai paitim ol o bagarapim ol sapos ol i no givim gutpela o stretpela sevis long man husat i baim em,

- papamama na brata susa na olgeta famili bai sem na rausim ol dispela meri long noken kam bek long famili bilong ol gen na arapela hevi moa.

Tasol i gat sampela gutpela samting tu em:

- ol i gat mani long lukautim ol long baim kaikai na ol samting,

- ol i ken helpim famili bilong ol long mani na arapela moa helpim.

Tevel laik kilim Poro tru



Nem: Felix K Pale
Krismas: 20 (man)
Adres: Kero Praimeri Skul, P O Box 33, lalibu, SHP.
Save laikim: Tok pilai, raitim pas na lukim narapela ples.

Nem: Mista Daga Saing
Krismas: 19 (man)
Adres: Papindo, Wewak, P.O. Box 1236, East Sepik Province.
Save laikim: Pilai ragbi tas, i go long lotu long Sarere na harim gospel musik tasol.

Nem: Phlomina Tobias
Krismas: 17 (meri)
Adres: St. Marys Tech School, P.O. Box 71, Kundiawa, Simbu Province.
Save laikim: Laikim pen-pals from within PNG na ovasis.

Nem: Roemary Pamundi
Krismas: 21 (meri)
Adres: St. Marys Tech School, P.O. Box 71, Migendi, Kundiawa, Simbu Province
Save laikim: Laikim pen-pals from within PNG na ovasis.

Nem: Richard M. Talap
Krismas: 20 (man)
Adres: Ulau Community School, P.O. Box 89, Aitape, ESP.
Save laikim: Go lotu, pilai spots, harim gospel musik, raitim pas, mekim prensip wantaim brata na susa na bai bekim olgeta pas mi kisim.

Nem: Hay Daiye
Krismas: 16 (man)
Adres: Kiripia Primary School, P.O. Box 1207, Mt Hagen, WHP.
Save laikim: Pilai tas, volibal na go lotu.

Nem: David Wape
Krismas: 16 (man)
Adres: Kagua High School, P.O. Box 393, Mendi, SHP.
Save laikim: Ritim baibel, singim gospol singsing na go long skul.

Nem: Roslyn Rexdyn
Krismas: 24 (meri)
Adres: Boikin Catholic Mission, P.O. Box 107, Karashu Island, Wewak, ESP.
Save laikim: Pilai spot, tok pilai harim musik na raitim pas long ol penpren.

Nem: Alice Nozilah
Krismas: 19 (meri)
Adres: Boikin Catholic Mission, P.O. Box 107, Karashu Island, Wewak, ESP.
Save laikim: Gospol musik, danis, pilai volibal, raitim pas long penpren.

Nem: Angella Gzmah
Krismas: 15 (meri)
Adres: Boikin Catholic Mission, P.O. Box 107, Karashu Island, Wewak, ESP.
Save laikim: Harim gospol musik, tok stori, pilai softbal, go lotu long Sande na raitim as long penpren.

Nem: Ngiey Kitoyia
Krismas: 18 (man)
Adres: Kimbe Priting, P.O. Box 161, Kimbe, West New Britain Province.
Save laikim: Pilai basketbal, pilai volibal, ritim book, lukim TV harim 96 FM go aut long piknik, mekim pren wantaim narapela provins.



LONG bipo tru long ples Bimberini long hap bilong Not Kos bilong Madang i bin gat tupela poro i stap. Nem bilong tupela em Kaim na Kasik.

Tupela i bes poro stret. Nogat wanpela taim tupela bai kros na paif o lusim ol yet. Nogat tru. Tupela save kaikai wantaim, tok pilai wantaim, go long bus, raun na painim abus wantaim na narapela ol samting em tupela save wokim wantaim. Tupela i mekim olsem i go na long wanpela dei poro bilong Kaim i kisim bikpela sik tru na em dai. Dispela em klostu long apinun samting.

Em nau long nait tewel bilong Kaim i go long haus bilong poro bilong em na singaut. "Hai poro, poro yu stap ah! Mi kam pinis. Man, longpela taim nau yumi no raun long bus liklik na mi bagarap stret long kaikai kapul ya."

Orait Kasik i bekim: "O! Poro em tru yet ya. Mi tu ya wankain olsem yu tok. Nau bai yumi slip long bus na kilim yumi yet long kaikai abus. Olgeta taim yumi no kaikaim abus i stap na mi less pinis. Yu wetim mi liklik taim."

Man kwik taim stret Kasik i redim olgeta bunara na supsup bilong em na kam ausait. Taim em i kam ausait tewel poro tu i redi pinis na

i stap, tasol trangu husat bai tokim em. Em i no save olsem tewel bilong poro bilong em i giamanim em na kisim em i go na kilim em. "Orait poro, yumi go, kuan yu go pas." Tewel poro kirap tokim poro tru.

"Ah Poro nogat, yu go pas na mi bai bihainim yu!"

Tupela taitim toktok i go i kam. Nau tewel poro i strong olgeta na Kasik i go pas. Taim tupela wokabout i go longwe liklik, tewel poro ya wok long hariapim poro tru bilong em long go hariap.

"Poro yumi mas i go hariap. Nogat em tulait na yumi no painim planti abus."

Tupela i go brukim baret i go kalapim maunten na i go yet. Nau kaim kirap tokim tewel poro ya.

"Hey poro, ating yumi kam long we tumas yumi. Yumi stap long hia na painim kapul. Ah...hh poro?"

"Olsem wanem? Dispela hap i no gutpela tumas. Yumi go liklik pastaim." Tewel i tok. Taim tupela toktok i stap, Kaim i tok: "Ah, poro yu wait pastaim." Tupela sanapim na putim yau. "Pung! Pung! Pung! Pung! Pung! Pung! Pung! Pung! Pung!"

"Oh poro yu harim tu i mas i gat hevi long ples. Em garamut bilong man idai stret! Yu save i gat sampela lain long ples i sik na i stap? Kaim i askim

Na tewel i tok: "Oh! poro nogat. nogat tru. Yumi go. Em ol giaman ya." Taim tupela wokabout go liklik tupela i harim garamut pairap namba tu taim gen. Kaim kirap tokim tewel ya: "Poro mi tok wanem, em tru tru sampela lain long ples mas idai. Maski yumi go bek, em garamut bilong man i dai stret ol wok long singautim yumi ya. Yu harim tu?"

Tewel kirap tokim Kaim: "Poro em nogat ya. Ol manki giaman nabaut i stap. Yu go bek long ples bai ol kilim abus na givim yu ah?"

Na tewel i wok long mekim kainkain tok bilas long poro bilong em long sutim bel em long tupela mas i go yet. Orait tupela i go na i no long taim namba (3) Garamut long ples i kraji gen. Em wankain tasol. Nau Kaim i kisim tingting. Em wanem man tru o tewel mi tupela raun i stap. Taim em i wokabout i go yet em i wok long tarim na spai na skelim poro bilong em taim tewel i no lukim em. Kaim i lukim olsem skin na olgeta samting long bodi bilong em wok long senis senis. Yu save man bilong bipo ya. Em tingim, em mas tewel bilong Kasik ya. Em wok long giamanim mi raun i stap. Nau Kaim i tingim. "Mi mas trikim dispela tewel na go bek long ples hariap. Nogat bai mi abus bilong em. Taim em i go liklik Kaim tokim tewel ya: "Poro yu wait long hia stap. Mi go pekpek pastaim."

Na em i go insait long bus tasol tewel poro tu i go insait long bus na sanap beksait long em.

"Hey. poro olsem wanem, pinis ah" tewel askim.

"Poro nogat ya, bel bilong wok long pen tasol na mi sindaun i stap." Kaim i tok. Na tupela kam ausait gen. Kaim i wok long giamanim tewel na tupela wok long tarim na kam bek long ples. Olgeta kain trik Kaim i tingim long mekim em tewel i no lusim em na wok long bihainim yet. Tupela i kam klostu liklik long ples nau Kaim i kirap tokim tewel. "Oh poro.. trangu longpela rot em yumi kam pinis. Malolo pastaim na yumi go." Em nau tupela sindaun tasol Kaim i tingim wanpela aigla pinis na em laik trikim tewel.

"Hey poro yu lukim tu? Antap long het bilong maunten ya wanpela samting?" Tewel i ting tru na wok long bisi painim. Hariap tru em rausim rop bilong bunara na pasim hian bilong tewel

Kaim i kirap na givim siksti i go long ples na tewel i taitim bun

long rausim bunara rop. Kaim i pinisim olgeta spit bilong em tasol twel i rausim rop hariap na kamap klostu long em pinis na singaut long Kaim: "Wanem kain pasin ya. Yumi kam wantaim na nau yu laik lusim mi hna go. Yu wetim mi pastaim na yumi go wantaim."

Tasol Kaim i no givim sans, em givim siksti yet na kamap long wanpela liklik ples we olgeta manmeri i no stap. Spt pulap long maus, nus na ai raun wantaim Kaim i go pundaun namel long ples.

Wanpela lapun man tasol i stap. Em harim nois Kaim i mekim na em i kam ausait na em guria stret long lukim pes bilong Kaim i pulap long spet nabaut na hariap tru em save pinis, yu save lapun bilong bipo ya, em set long olgeta samting.

Hariap tru em i kisim Kawar na wel Gorgor na spetim antap long skin bilong Kaim na rausim tewel long skin bilong em. Nau em sindaun klostu long Kaim na was long em i stap inap Kaim i pilim orait na kirap. Nau lapun kirap askim em: "Olsem wanem, yu stori?"

"Nogat, tewel bilong poro (Kasik) long apinun yet em giamanim mi na kisim mi i go olsem long Gilagi na em laik kilim mi tasol mi trikim em na kam kamap klostu long Sigidang na mi putim bunara long het bilong em na mi ronawe i kam." Kaim stori. "Olgeta lain i go antap pinis long lukim dai bodi bilong Kasik olsem na mi wan i stap.

Em orait yu ken stap inap tumora moning na go. Nau Kaim i stap sampela dei wantaim lapun man ya na ol i wokim bikpela kaikai tru na bihain Kaim i lusim em na go bek long asples bilong em.

Rox Kulak (NCR) Madang

Painim hat tru long stap long wanpela ples



Dia LAIPLAIN,

Mi pinisim hai skul bilong mi na go bek long ples. Mi wet inap tripela mun tasol wanpela bekim i no kam bilong mi go skul moa. Mi go long taun na painim wanpela wok long wanpela opis. Mi ting bai mi stap long dispela wok longpela taim tasol mi no laikim wok.

Bihain long wanpela yia mi lusim wok na go long yunivesiti na stadi long kamap enjinia tasol mi lusim long kluostu long pinis bilong krismas bikos mi no pas long ol eksam.

Mi belhevi stret na ting olsem viles bilong em mas ples bai mi stap long em tasol mi painim aut olsem dispela i no tru.

Mi ting trru bai mi stap long ples tasol bihain long 9-pela mun mi painim aut olsem mi no fit long stap long viles. I hat tru long mekim ol manmeri bilong ples long luksave na harim wanem

samting mi laik tokim ol lomng en. Ol manmeri long poles i ting mipela manmeri husat i go long skul i isi long kisim ol samting.

Ol pipel i laikim mi long gro ol samting bilong gaden na kamapim bisnis tasol ol i no save olsem mipela mas gat sampela mani pastaim long mipela planin ol dispela samting na salim long maket.

Ol i tok mi saveman na mi mas painim sam,pele mani pastaim na bihain ol bai helpim wantaim sampela liklik mani. Ol i laik baim wnapela rao na statim wanpela fam bilong komyuniti.

Ol go askim ol lain long benk tasol oli tok mi nogat wanpela mani bilong mi yet long stat wantaim na ol bai i no inap helpim mi.

Nau mi kam bek long taun na painim wok i stap. Mi bin go toktok wantaim sampela lain long wok tasol dispela wok ol givim long narapela mangi olsem mi yet.

Inap yupela tokim mi wanem samting m,i mas mekim nau?

JOB SEARCH

Dia PREN,

Yu mas belhat na les pinis. Tasol i gat planti olsem yu tude long kantri. Dispela ol kain samting i kamap bikos long we edukesen sistem i wok na tu yumi paul namel long nupela na olpela pasin bilong stap.

Sampela yia i go pinis, taim wanpela i pinisim skul, olgeta i bin

kisim wok long opis o taun. Dispela i mekim na olgeta manmeri long ples i ting olgeta manmeri husat i pinis skul nau bai gat wok. Ol i no save olsem olgeta wok long taun na siti i pinis. Nogat moa wok bilong givim ol yangpela pinisim skul nau. I gutpela ol manmeri long ples i kila long dispela.

Dispela hevi bilong wok bai kamap bikpela long bihain. I luk olsem yu no laikim taun na viles laip wantaim bikos tupela i wankain. Nau yumi lukluk long taun laip bilong yu pastaim.

Taim yu kisim wok long opis tasol yu les na lusim? Bilong wanem yu no laikim? Yu bin les long wnem samting yu mekim? Em i hat o li no hat tumas? Yu no laikim ol manmeri yu wok wantaim o?

Smapela taim ol manmeri i no save laikim wok bikos ol i save lesles nating. Sampela i no save kisim toktok gut na i no mekim wok gut. Na sampela save laik bai yu mekim moa wok insait long liklik taim na yu painim hat.

Taim ol manm stati long wok, bos i save givim ol liklik wok o sampela we ol narapela long opis i no laik long mekim. Ating yu bin sisi, inap long yu painim aut olsem bihain inap long bos givim gutpela na moa wok long yu.

Lon opis wok, painim aut wanem samting tru yu laik mekim. Noken stap tasol na i no save long wanem samting yu mekim.

Yu wok na save gut lon gwanem samting yu mekim pstaim. Sapos yu stil i no laikim wok bilong yu orait i gupela long yu lusim na traim painim nupela wok. Tasol bipo long yu lusim wanpela wok, i gutpela sapos yu save ilong wanem sating yu bai mekim long nupela wok bilong yu pastaim long yu muv.

Yu tok yu kisim hevi taim ol i no kisim yu long wok. Hia em sampela samting yu ken mekim sapos yu aplai na laik kisim wnapela nupela wok.

Ritim edvetismen gut na aplia long we ol i aski., aplikesen mas gat krismas, skul, refens na wanem wok yu inap mekim. Noken aplai sapos yu no save long wanepla samting. Putim gutpela klos, was na go lukim ol man laik kisim yu long wok.

Yu mas bihainim olgeta toktok na mekim olsem ol i tok long edvetismen, noken putim sampela mauswara stori i go insait.

Toktok strong na noken surik. Noken tok yu inap mekim wanpela samting sapos yu no save long mekim dispela samting taim yu toktok wantaim

ol man husat laik givim wok long yu.

Dispela em sampela tingting bilong painim wok long taun. Neks wik bai mipela toktok lognsait bilon gyu long viles ol ples.

LAIPLAIN.

KANAGE



Lapun Kanage i bilong ples Kero insait long Imbongu distrik. Ples bilong ol Makai stret.

Wanpela taim lapun Kanage wantaim meri bilong em tupela i go long gaden. Taim tupela i kam kamap long gaden na tupela i pilai hait na painim. Pastaim tru Kanage i go hait na meri bilong em i painim em na Kanage i no win. Taim bilong meri bilong em, meri i putim pekpek long fran na em i go hait beksait long pekpek. Meri i singaut na Kanage hariap tasol em laik ron i go na painim em. Kanage kirap na tok, "ina moro, ya i na moro ya na moro," min mi stap long hia, o stap long ap. Em ras tru na em i no lukluk i go daun na lukluk i go antap tasol na wok long painim. Taim em kamap klostu long ples we i meri i stap. Em popaia na krungutim pekpek. Pekpek i wel na pekpek salim Kanage stret i susbim maus bilong em i go stret long liklik susa bilong meri bilong em. Meri kirap tokim Kanage, hey, olgeta nait yu save holim dispela samting na ating yu no inap na nau ya laik smelim stret. Kanage kirap i go holim pasim meri bilong em na tupela i taitim bun i stap long gras i go inap apinun.

Felix Kapi Pale
Walume Distrik, SHP.

Kanage em bilong Sepik na em i marit long Banz insait long Westen Hailans provins. Paps Kanage sanapim haus bilong i wokim arere long wara Mobol. Wanpela taim mama i kisim ol doti klos i go long wara long wasim. Paps sanap antap long haus na paitim brus bilong em i stap. Mama, trangu wasim samting na ben daun long ol klos na stap i no longtaim olpela boipren bilong mama i kam na wasim kruimba bilong em long beksait bilong mama i stap. Mama lukim olsem na singautim Kanage na tok ol manki i kam pilai pilai long long samting bilong yu na Kanage i no toktok. Na mama singaut gen na tok hei ol manki i kam pilai pilai long samting bilong yu ya. Na Kanage i no toktok. Namba tri taim mama singautim em na tok hei yu harim ol manki pilai long samting ya yet. Olsem na Kanage bekim mama olsem larim ol. Ol i nogat katres. Dispela taim olpela pren i mekim save long beksait bilong mama. Na mama i kros nogut tru long paps Kanage long wanem mama signaut planti taim pinis. Bihain mama pinis long wasim samting na kamap long haus na paps askim em. Yu singut long wanem. Ol i nogat katres bilong ol. Na mama tok yu maski, yu nogat sans bilong yu tunait. Mi inap pinis. Kanage i kirap na ting ol mangi pilai long hom meid gan em lusim long haus tasol em i no save olsem narapela man i lukim meri bilong em pinis arere long wara.

Kombuk Wine
Mt Hagen.

Kanage em bilong Kumbal maket long Simbu provins. Wanpela taim baga nogut i raun

smukim mariwana wantaim ol manki. Taim Kanage wantaim ol poro bilong em i pulim mariwana. Wanpela poro bilong em kirap na tokim em olsem: "Kanage mi aut pinis nau na mi laik go lukim vidio long haus. Olsem wanem long yu? Yu laik kisim sampela pilings long vidio tu o? Papa Kanage tok yes poro tasol mi nogat geit fi. Na poro bilong em tokim Kanage olsem. "Noken wari long geit. Em liklik samting bai mi baim geit. Taim Kanage wantaim poro bilong em lukim piksa i

stap. Wanpela baga nogut long piksa i ronawe long ol masalai man. Em i ron i go na kamap long wanpela raun wara. Baga long piksa i kisim res long wara na em waswas na dringim wara long raun wara ya. Na wan kain taim Kanage i testi long wara tu. Yu save taim yu pulim mariwana, bai yu testi long wara na tu tingting bilong yu bai paul. Olgeta wankain olsem i kisim Kanage tu. Paps Kange kirap lusim poro bilong em na wokabaut i go klostu long vidio skrin na tokim man insait long vidio olsem: "Papa Ae Doo! I am angry long river ya. Please can you give me only one cup of river?" Ol man-meri long haus piksa i bik maus long Kanage. Taim bilong skul ya raun long we. Pulim drag na bai yu kisim wan kap wara long em. Em piksa ya yu klia na mipela laik lukim pika ya. Yu klia. Paps Kanage i sem pipia na lus long haus piksa. Na pasin bilong Kanage i dai na em i no smukim maruwana moa.

Bobye Kuipa
Simbu

Lapun Kanage em bilong ples Pope insait long Taliabu, Sauten Hailans provins. Wanpela nait em i kisim bikpela het pen stret. Man papa ya i no kisim gutpela slip inap moning. Mara Junia i lukim olsem na lukim em long go long haus sik bai sik i orait. Yu save baga na yu i no save go long hausik long olgeta laip bilong em taim mama karim em i kam inap em i lapun. Dispela taim em i pas taim bilong em. Em i no waswas tu em i kirap tasol kisim tamiok lida em pasin wanpela bas rop strong tru long het bilong em na wokabaut isi isi i go long haus sik. Man, het bilong em i pen nogut tru na i mekim em olsem wanpela spak man stret. Taim em i kamap long haus sik em i lukim bikpela lain tru wet long kisim marasin tasol em i no bisi long joinim lain, em i go stret na askim sista ya. "Hey pikinni het bilong mi i pen nogut tru na klostu bai mi i pundaun long hia. Man, sista ya i no bin lukim em i kam. Em i bin stretim marasin i stap na taim Kanage i bikmaus olsem, em i kirap nogut tru na i tanim long lukim insait i tok-tok. Yu save long ras ya i dres ap olsem man bilong pait stret. Sista ya i pret nogut stret na wan tu tasol tokim em long sindaun na bai em i sekim em. Tasol long i go i no kik long sindaun na i sanap yet. Sista i kirap kisim liklik glas bilong sekim het bilong bodi na i putim aninit long pit bilong em. Em i putim pinis na i go insait long skelim marasin. Taim em i kam bek long kisim glas yu, man glas ya i no stap longwe em i bin putim long em. Em i sekim long narapela sait ken tu i no stap. Em i belhat na krap tokim lapun Kanage, "liklik stik mi bin putim aninit long han bilong yu ya we?" Lapun Kanage i kros nogut tru na i bekim olsem, "pikinini, taim bel bilong em i pen yu bin pilim sem semtaim tu? Mi no bin slip gut long nait i kam na taim yu bin holim pasim man bilong yu na slip gut. Mi no tok olsem han bilong mi i pen, mi tok bel bilong mi. Wankain taim tru em Kanage i ting olsem sista i

mas paul na putim marasin long han bilong em taim bel bilong em i pen. Olsem na taim sista i go insait em i kisim glas wara ya na putim long bel bilong em. Lapun Kanage isi tasol putim han i go i stap long het bilong em we em i bin pasim bus rop ya rausim dispela glas wara i kam. Man, sista ya i lukim dispela na i belhat nogut tru tasol semtaim lap i kilim em tu. Em i strongim pes bilas em tasol bikos dispela taim pes bilong Kanage i go ret olgeta na klostu bai em i lusim akis antap long het bilong sista ya. Olsem na isi tasol sista i kisim tupela aspirin marasin na givim Kanage wantaim wara. Lapun Kanage dring pinis, tanim na soim pinga long sista ya na ol lain sindaun na tekov i go long ples bilong em.

Mike MacKay Echaim
Sabama

Kanage na Julianna i pundaun pastaim tupela i stap long gret 7 na 8. Tupela stap long Kubui top skul long Madang distrik. Tasol Julianna wanpela i pas na go long Tusbab hai skul. Tripela ya long hai skul na groa bilong Julianna i kamap narapela kain. Na pes na bodi bilong Julianna i kamap stret. Mekim na Kanage i ting olsem nogut narapela mun i autim tiket bilong Julianna na em bai lus. Orait em ting lain bilong em na ol bungim pe. Wanpela mun bipo long Julianna i graduet, ol i dai pinis Julianna long de bilong greduesen. Kanage kisim ka i go long witnessim long skul. Wan klas bilong Julianna i amamasim greduesen. Kanage wantaim wanpela poro pilai drama. Drama i sut long pasin bilong pes long baim meri. Kanage kamap long skul na kirap nogut long lukim sampela lain i bilasim Julianna. Na singsing i go givim long mun. Long hapsait em lukim sampela lain i kisim pe i kam long baim Julianna. Kanage lukim olsem ol i laik salim Julianna long narapela man na kisim pe. Em i no klia yet olsem ol studen i mekim pilai drama tasol nogat. Bel i sut nating na em i no wet. Kwiktaim em ron i go stret namel long drama lain na singaut. You people are stupid. I wife it Julianna with 10 pig, two muruks plus 500 band. Na em i holim han bilong Julianna na pulim em i go aut na kisim long i go long ples. Mekim na ol manmeri i paul. Julianna tu i paul na i no kisim setifiket wantaim ol kago bilong em. Em i go nating long ples wantaim bilas bilong drama long skin.

Oliva Marun
Madang

Kanage i go raun long taun na putim ai long ol meri i stap na i no long taim wanpela meri Sepik i kam bungim em. Na tupela i raun i stap. Olgeta kona long taun i pinis nating. Tupela i laik bruk nau, Kanage i askim meri ya, "Yu bilong wanem hap stret ya?" Na meri ya kirap na tok, "Mi bilong Saut Pasifik. Na yu? Na Kanage kirap na tok, "Mi bilong Guam ya, ples bilong ol waitman." Samting tru em meri ya em Sepik ya na brata Kanage ya em bilong Buang insait long Mumeng, Morobe provins.

Anuaya Jembok
Lae

Smol Kanage em bilong Laiagam long Karam long Angoram. Long wanpela apinun em wantaim kasen bilong em wok ong pilai holim as. Na kasen bilong em winim em na holim as bilong em wansait stret, na smol Kanage i tok, "Mi no bisi, taim bilong kaikai hung stap long nait, bai mi lukim yu." Na mama bilong smol Kanage

singaut long ol long go kaikai. Kasen bilong smol Kanage em go pas pinis na kisim kona long haus we tudak na sindaun na kaikai hung stap. Smol Kanage kam antap long haus na lukim lapun papa bilong em sindaun taitim bun ong kaikai hung stap. Na smol Kanage ting olsem kasen bilong em na isi isi tru hait long taunam kam na holim as bilong papa bilong em na tok. "Yu kisim? Yu wokim wanem long apinun." Na wan tu mama bilong smol Kanage kirap na tok: "Ana nadi Kanage, hau yu wokim olsem long papa bilong yu." Smol Kanage pret na ronawe i go na i no kam long haus wan wik. Kasen bilong em i lap nogut tru long smol Kanage.

Benz Hem
Angoram

Kanage em bilong Sepik Wara long Angoram stret. Na em save sekyuriti long Angoram Helt Senta. Man em i no yangpela man, lapun ya tasol pes bilong tromoi tok pisin na kain ol eksen nogut long ol mama save kam kisim marasin. Em save eking olsem A.P.O stret taim ol i no stap, em save givim sut na marasin long ol sik meri. Ol man em save les. Na taim ol kros long em, em i no bisi pes tu bilong tromoim tokpisin na kolim belhat bilong ol man. Wanpela fotrait wik Fraide, em wok nait pinis na long Sarere moning em go long Angoram maket. Ai bilong em tu wok long slip na em tu em pes bilong kaikai tapiok mumu stret. Na em lukim wanpela pes bilong haiwe i salim tapiok mumu stap. Na em askim em. "Susa amamas long mumu tapiok bilong yu." Na em tok K1.00 tasol na Kanage tromoi han long poket long kisim K1.00. Tasol boi i kamautim mitnait kauboi (kondom) long poket na tromoi long kisim mumu tasol em lukim hariap na tok sori long susa ya na tok. "Em samting bilong was long hangre bilong mi long nait." Na nau biknem poro ya Kanage i paralais pinis na em save wok-abaut wantaim stik na em tru ya i no trik. Yu husat laik lukim em, kam long Angoram.

Bench Hem
Angoram

Kanage em manki Is Sepik provins. Kanage wanpela bikman bilong Hausing Komisn long Mosbi. Wanpela bik moning Kanage i ron i go na pekpek i kilim em stret. Kanage i pilim as bilong bel i hat nogut tru na boi siksti stret long toilet bilong em long opis. Taim Kanage i kamap long opis. Trangu baga ya i no laik isi na go antap em hariap hariap na hai i su bilong em i wel na boi i kapsait antap na kamdaun. Taim em i kam daun bos bilong em i stap tambilo em i harim olsem wanpela drai kokonas i pundaun. Taim bos i spai long windo em i lukim baga ya ai bilong em i kamap wait pinis na pekpek wantaim i sut. Bos i pasim windo na ringim ambulens na kisim Kanage. Taim em i go long haus sik Kanage i kamap gutpela na ol i stori long taim em-dai na pekpekim trausis. Na Kanage i askim ol husat i lukim em. Na ol tokim em bos bilong yu i lukim yu. Taim Kanage harim dispela hap tok olsem boi i no wanbel tru long bos bilong em. Kanage i kalap long bas na go long opis na tokim bos bilong em yu noken kolim mi nat. Pikinini bilong man ya i no kokonas i karim mi. Mi kamap long man ya. Neks taim don't say that! Na Kanage tekov.

Kero Kansol
Gordons

Kanage i kamap lapun na em i

save hat hat nating. Wanpela moning em i go long gaden bilong em na i lukim olsem, suga ken, em i save laikim, i no moa stap. Ol man i katim olgeta pinis. Em i bel kaskas na i kam bek na hatim wanpela lapun. Em gaden bilong em i stap klostu long bilong Kanage. 'San op a blis, yu kat mai feveret, watpo? Lapun man ya i no surik long Kanage na i bekim 'feveret wat' na Kanage i tok 'suka ken.' Saspek o sans, I don't care.' Kanage i belhat nogut tru. 'Yu kolim ol pikinini bilong mi raskol yah.' Lapun man ya i les pinis tu long toktok. Kanage yu go pinis nogut mi kam paitim yu. Na Kanage i bekim sori mai dia. Bipo yet mi stap nogat man i paitim mi.

Mango Klab
Is Boroko

Kanage bilong ples Puet-Tek insait long Bogia. Wanpela taim danis kamap long ples Tobenam na Kanage i gat bikpela laik tru long go danis. Tasol trangu em nogat su. Em go long haus painim su nogat em lukim hap gambut na hap sendol i stap long kona bilong haus. Baga man ya kisim tasol 2-pela hap miks su tasol na painim su ken long werim wantaim miks su bilong em. Kanage tingting nogat em katim tasol 2-pela hap han bilong kot siot bilong em na samapim long string bilong hukum pis. Em nau Kanage werim su ken pinis putim miks su bilong em na boi, em askim man long geit 'hamas long geit' man ya tok K1.00 tasol taim em peim geit pinis na go insait man em lukim olgeta man kisim ol meri na danis wantaim. Tasol wanpela girile meri tasol putim hat na smuk na sanap arere long pawa ban i stap. Kanage 'isi tasol silitim long arere na go askim long em na 2-pela kirapim das. Kanage ting olsem wanpela kumul stret ya em kisim na 2-pela kirapim das klostu tulait nau 2-pela laik holim pas na wokim hula hula danis. Man Kanage pilim olsem sanpepa sutim, sutim em. Na meri tu lukluk i go daun long lek bilong em na lukim miks su. Em nau 2-pela bruk isi isi na go longwe long 2-pela yet. Kanage pilim wari tru na krai wantaim na tok. Sanpepa o wainis mi kisim yu go nau. Ha! Ha! Ha-a-a-a! Leva o leva sweet heart of my heart.

John Dee Waunada
Bogia

Kanage bilong Menoks em save aigris long wanpela meri PS bilong Kobaria. Planti taim em save kaikai gut na wanpela taim em pinis wok na kam long haus em lukim PS i no sindaun stret na Kanage askim em. Susa inap yu givim spes long gaden bilong yu na mi planim pinat bilong mi na PS askim em bras mi i no klinim bilong planim pinat mi klinim bilong planim yam mame bilong PS yet. Mi laik givim yu spes tasol yupela i no save malolo long planim pinat. Nogut yu planim, planim na bagarapim gaden bilong yam mame. Nau Kanage askim em susa inap mi planim long olgeta man nau PS askim em kain bilong yupela, yupela lukim gaden nau bai yu daunim spet. Na sigarap long planim, planim olgeta de na nait. Nau Menoks lap wantaim na em lus nating.

Savayaka Asiki
Lae

Kanage em bilong Sital 15c long Yangkok, Sandaun provins. Em kam wok long Vanimo taun, na tu em i gat gaden long bus bilong Rawo, em long Vanimo, Is Sepik provins. Long wanpela Sarere moning Kanage wantaim meri

KANAGE



idai stret long gaden.

Alphonse Guri Vanimo

Kanage em bilong Westerian na nau em stap wantaim wanpela wantok long Kiunga. Poroman Kanage em i no save olgeta hap kona long Kiunga taun. Tasol em save long las kona ples we em i stap na wanpela em Michael Kona. Wanpela taim Kanage em go raun long Michael Kona long 4 kilok. Em go raun long Monfot Komyuniti Skul fil na em lukim wanpela kona meri wok-about kam long Jung Jundo Trening ples na meri ya em holim bikipela kap tu na kam. Na trangu Kanage i kirap na askim meri ya olsem, meri yu kam longwe na meri ya i bekim em olsem mi kam long dispela trening ples na Kanage i kirap na tokim Maria ya olsem yu westim taim bilong yu long wanem. Tasol mi wanpela nambawan faita bilong wol olsem na mi ken lainim yu. Na meri ya i amamas nogut tru long em na em pren wantaim em. Na Kanage i kirap na tokim meri ya olsem sapos yu no bilip tumas long mi yu ken tromoi kap long testa bilong mi na meri ya i tokim em olsem nogut mi kilim yu. Tasol Kanage i fosim em na meri ya i giamanim em long toromoi tasol Kanage em i no blokim wanpela samting em putim han bilong em fri. Na bihain meri ya em toromoi kap stret long testa bilong em na Kanage em dai nating antap long mat. Na em kisim bikipela kat na blut i olsem wara. Dispela taim tasol Kanage i givap long stap long Kiunga na em go olgeta long ples.

Elias Katop Kiunga

Kanage bilong ples Endipi. Kanage i wanpela hetman we olgeta Sande em i save autim tok long ol manmeri i harim. Wanpela Sande Kanage i autim tok na em i lukim wanpela naispela na yanpela meri tru sindaun long kona bilong haus lotu. Kanage i bin gat tingting long dispela yanpela meri. Na taim lotu pinis olgeta manmeri i go ausait. Kanage i giaman long lewa bilong em i pen. Kanage i tokim meri ya olsem kisim wara na givim mi. Lewa bilong mi i bin trangu yanpela meri ya i sori long Kanage i pilim pen wantaim lewa bilong em. Na em i go kisim wara i kam givim Kanage. Long dispela taim Kanage i autim wanem tingting em i gat long en, meri ya i tok em i gutpela tingting bilong yu. Tasol mi pret papamama bilong mi bai kros long mi tupela pren Kanage i tok hey. Yu harim it's our like and we friend don't talk if out stay for you and stay for me. Meri ya harim olsem na kilim long lap na das i go ausait.

Robert Les Endipi

Kanage bilong Maprik long Is Sepik provins. Wanpela taim Kanage ekting bik sot. Kanage i save mekim long ol man, pikinini bilong em i no save gutpela. Kanage i pekpek na rabim as long pos bilong smol haus na hariapim meri, pikinini long wasim long han. Ol i save lain ap rausim long hol. Ol i no save husat bilong ol i mekim. Wanpela taim pikinini boi bilong em i go hait na lukluk i stap na em i lukim Kanage lukluk nambaut i ron i go long smol haus. Em

em peks pinis na kam go long haus, pikinini lukim olsem na em i go kisim grinpela Lambo i go na rabim long ples em i save rabim as. Long apinun Kanage go peks pinis em rabim grin lambo long as bilong em na putim trausis baksait kam long floa na go han lambo i hat i no winim paia. Em i wok long sindaun saitsait na singaut. Yu tok ret o green, ol tok ret ya, pen tu na em singaut strong na tok em grin, winim paia em boil, ol kilim lap na mekim em tu hat i mekim em i waswas olsem wara. Na em i dai long hap tasol.

Todds Eksee Ambunti

Kanage bilong ples Paraka insait long Westen Hailens provins. Kanage em wanpela dokta bilong Bukpena Helt Senta. Wanpela Fraide moning Kanage i go wok i stap na wanpela meri i kam nok wok long dua i stap. Kanage em wanpela konman tu ya isi tasol em kam opim dua. Meri ya askim Kanage olsem wanem paps bikipela sik i kisim mi na inap yu givim mi wanpela sut. Kanage tokim meri ya olsem go wetim mi long opis bilong mi. Meri ya go weit i stap na Kanage isi tasol bihainim meri ya long opis bilong em. Kanage askim meri ya olsem wanem kain sik i pampim yu. Meri ya tok skin i hat na het i pen. Kanage bekim i hat na het i paul na wara ron tu o nogat. Meri ya tok het na skin tasol i pen. Kanage i sori na holim em na meri ya tok nogat na Kanage kisim sem na tekov long ples Paraka.

Anis Moia Mt Hagen

Kanage em bilong Tambul insait long Westen Hailans provins. Em wanpela kain man ol i save karim pikinini klostu klostu. Taim Kanage yanpela man em bin marit na stat kik op long karim pikinini. Taim pikinini i wanpela krismas em wok long wokim nupela neseri long narapela long kamap gen. Mekim i go na em gat planti pikinini we i nogat tit. Bihain Kanage em i go lapun tasol em i no wari olsem em lapun. Em tok lapun tasol enjin on na bai mi wip yet. Long mak bilong lapun meri bilong em i gat bel gen. Klostu em laik karim bebi na Kanage na brata bilong em kisim meri bilong Kanage i go long Tambul haus sik. Taim ol go long haus sik, lapun Kanage sindaun ausait long gras na pilim san i stap. Brata bilong Kanage karim meri bilong Kanage i go long rum we ol meri save kisim bebi. Lapun Kanage i tingting planti olsem meri bilong em bai dai o em bai stap laip olsem na em wari tumas. Bihain liklik em lukim brata bilong em i kamaut long rum bilong ol meri save karim bebi. Kanage kirap askim em na tok, "ol tok wanem? Brata bilong em kirap na tokim Kanage olsem, "brata, ol dokta tok yu save sigirap tru long karim pikinini klostu klostu olsem na ol tok bai ol rausim tupela kiau bilong yu na tromoi i go. Man Kanage harim olsem na tewel bilong em i sut pinis na em pret nogut tru. Isi tasol lapun Kanage saitim na lus nating long hap. Em i no tingim meri pikinini em lus nating. Samting tru em brata bilong Kanage em i no save laikim Kanage i karim pikinini klostu klostu olsem na em giamanim em tasol lapun Kanage em tekov pinis.

Jerry James Lae



KANAGE EM LAPUN NAU NA STAP LONG PLES...



EM SINDAUN I STAP NA TUMBUNA KANDERE I BIN KAM LONG MOSBI I KARIM WANPELA TOKSAVE I KAM...



KANAGE EM HAMANAS TRU... EM TING PIKININI LONG MOSBI I SALIM BOKS PRESENT BLONG EM IKAM...



TUPELA DE EM KETIM BOKS INO KAM NA EM GO STRET LONG HAUS BILONG TUMBUNA KANDERE...



YU OKEI, OZ EM SALIM TOK HALOU TASOL I KAM LONG YU! INO SALIM BOKS HALOU!



Noken autim tok long Inglis

Dia Edita,

YES mi wanpela manki mi save istap long Sandaun Camp long Madang Newtown, Jomba. Yes inap yupela givim mi wanpela taim long autim sampela wari bilong mi long Wantok niuspepa. Yes wari bilong mi i go olsem.

Planti taim mi save lukim long ai bilong mi na harim long ia bilong mi na mi save toktok long em. Yes mi no save wanbel wantaim ol pasto i save autim tok long taun maket long Madang. Ol i no save autim tok long tok pisin.

Ol i save autim tok long Inglis tasol na ritim baibel long Inglis tasol.

Olsem wanem, yupela ol pikinini bilong waitman a. Yupela

i mas save yumi ol Papua Niugini na tok Pisin bilong yu i stap long we?

Yumi ol sampela i no save long Inglis na ol lapun ol lain bilong ples na hau ol bai save long tok Inglis.

Brata sapos yu autim tok bilong bikpela long ol manmeri em yu win man na yu i mas autim gut tok bilong God long gutpela tok Pisin we mama i karim yu long em na lainim yu long em na bai yu ken kisim ol manmeri i kam long bikpela.

Brata na susa Pastor sapos yu i laik autim tok bilong Papa God plis yupela i mas autim tok long Pisin.

Yes mitupela i no i stap long Australia na tu waitman i no

karim yumi em kantri bilong mitupela PNG na yu i mas tok Pisin long autim tok bilong Papa God. Noken sanapim na singaut long Inglis i stap. Sapos yupela laik toktok long Inglis, i moabeta yupela i go sanap long strit bilong Australia o Amerika we ol lapun manmeri na ol pipel bilong ples tru i save long tok Inglis.

Em bikpela hat na taim yupela westim nating bikos nogat wanpela man i kisim ol gutpela oktok yupela autim long tok Inglis. Mi ting i gutpela sapos yupela autim tok long tok ples o Pisin na bai olgeta manmeri i ken harim.

Em tasol.

**Hapeli P. Lucas
Madang**

Manus nogat bikpela haus kalabus

Dia Edita,

Mi wanpela manki Manus na mi stap kalabus long Kavieng haus man. Mi laik autim bel hevi na wari bilong mi i go long rijinel memba o Gavana bilong Manus, Mista Steven Pokawin na dipatmen bilong Correctional Services long nesenel gavman. Em hia sampela poin long autim.

I go bek long 1987 mipela ol kalabus man bilong Manus husat i kalabus longpela taim, i save salim i kam long Kavieng banis. Na dispela sistem i stat long 1987 na i kam inap nau 2000.

As em i olsem, banis kalabus bilong Manus i liklik na inap long 16 manki tasol na i no moa than 16. Tude banis kalabus long Manus i nidim 50 mangi.

Wanem taim bai nesenel gavman o minista bilong CIS i bringim dispela hevi i go long flo bilong nesenel palamen na stretim dispela hevi.

Namba tu as em olsem, Dipatmen bilong CIS o provinsel gavman bilong Manus i westim bikpela mani long salim ol mangi i go long Kavieng haus kalabus. Tingim olsem long

taim bipo o long 80s i kam long 90s, value bilong kina i stap antap. Na yumi i gat planti mani long westim. Tasol nau yumi bungim hevi bilong mani, gavman i mas tingting gut.

Namba tri as em i olsem, ol mangi Manus long Kavieng haus kalabus i sevim longpela taim, taim ol i pinis, trabel i save painim ol na go bek long kalabus. Bilong wanem? Bikos ol i wet longpela taim long CIS i salim ol i go bek long Manus.

Plis ol lida traime hariap na stretim dispela hevi. Yumi kamap pinis long nupela sentri na i mas gat sans. Sapos yu kalabus long wanpela haus kalabus i pulap na yu bungim hat laip na bihain CIS i salim y go long narapela haus kalabus we yu no moa lukim pes bilong famili bilong yu, bai yu hamamas o? Yu yet bai skelim.

Yu husat man o meri lukim na sapot long dispela, plis yu rait tasol i kam long Wantok niuspepa na bai mi ken lukim. Em tasol wari bilong mi. Tenkyu tru.

**David Chamlou Pokas
Kavieng Jail**

Noken daunim wanpela provins long musik

Dia Edita,

Mi wanpela mangi Madang olgeta taim mi save baim Wantok niuspepa na save ritim ol pas. Mi bilong ples Amele long Madang provins.

Na wanpela taim mi baim Wantok niuspepa na mi ritim ol pas.

Na mi ritim wanpela pas olsem wanpela mangi Morobe i raitim na bagarapim nem bilong ol. Wali Jon-s yu bilong Morobe tasol yu noken daunim nem bilong ol arapela provins.

Mi tokim yu stret Madang em bai kamap wanpela hot provins stret long sait bilong musik.

Sori tru Wali Jon mi nogat kros tasol. Wali ating yu i no bilong Morobe. Ating yu wanpela mangi Toiri

olsem na yu mekim kain toktok.

Sapos tru yu bilong Morobe yu no inap mekim kain toktok olsem. Na tu yu no save long pilai musik. I no olgeta Morobe ating yu tasol bai kam na kamap kau boi bilong ol Madang.

Olsem na Wali Jon i noken mekim kain tok olsem i no pasin nogut. Wanem ben em pilai na singsing long stail bilong em.

Yu save Madang em naispela provins olsem na yu mas (J) liklik, so Wali noken mekim kain toktok olsem o daunim nem bilong arapela. Tenkyu.

**Tom Fulin
Madang**

Alois Kiangua i dai long eksiden

Dia Edita,

INAP yu givim mi liklik spes long Wantok niuspepa long mi bekim pas bilong brata John Opotio na Michael Kouna long Wantok no. 1361 na 1364.

Tupela brata ya John Opotio na Michael Kouna wantaim i tok olsem Gavana Jim Kas i bin kilim dai Alois Kiangua em bisnis man i bin i dai long ka eksiden em Gavana Jim Kas i bin draivim.

Yes brata John na mausman Michael, mi laik tokim yutupela olsem, Jim Kas i no bin kilim Alois Kiangua, Alois i bin dai long ka eksiden em Jim Kas i bin draivim.

John Opotio yu wanpela save-man i wok long gutpela wok na Michael yu wanpela mausman bilong Mosbi siti na i no long ples Bundi.

Yutupela i no sekim baksait bilong yutupela na pointim pinga long Jim Kas kilim Alois Kiangua. Jim Kas i nogat birua long brata Alois.

I gutpela long yutupela sekim plis ripot na kisim stori long bodi gat bilong brata Alois pastaim na bihain yutupela sutim tok nating.

Yutupela mas yusim het bilong yutupela na bihain sutim tok nating long ol narapela brata. Dispela kain karangi toktok i

save kamapim bel pen namel long ol brata.

Olsem na plis noken pulapim gutpela spes bilong Wantok niuspepa wantaim ol toktok i nogat gutpela painim aut yupela mas save olsem i gat lo i tok tambu long bagarapim narapela man. Dispela lo em planti komyuniti lida na mausman i save. I luk olsem yutupela mausman nating na i no save long dispela lo ya.

Em tasol na yu husat welkam long bekim pas bilong mi.

**Kalau Niskoi
Kimbe**

Alfred Pogo em giaman memba

Dia Edita,

Mi wanpela manki Kandeland mi laik autim bel hevi bilong mi i go long memba bilong Finschaffan na Woks Minista Alfred Pogo.

Mi bin ritim Wantok niuspepa bilong mun Julai 26, 2000, na mi bin kandim stori bilong Minista i givim sampela mani bilong rot projek i go long ol lain bilong Is Sepik na Sandaun.

Mi no komplem long ol, tasol dispela em yu wokim wok bilong yu olsem nesenel Woks Minista.

Tasol tok mi laik wokim long memba em olsem, wanem taim bai yu wokim Pogo haiwe long Lae i go long Finschaffan? Na ambulans bilong ol haus lain long Finschaffan? Planti ol bus eria bilong Toboo Burum Dedua Merikio Zafrio nogat radio bilong kontek long ol plis na haus sik long taim bilong hevi, na bilong mekim samting i go nogut em poin antap mi autim ya.

Em rot, rot bilong mipela long Finschaffan em tu wankain olsem bilong ol lain long Is Sepik na Sandaun na planti ol arere distrik bilong Morobe i bagarap, tasol yu kisim nem minista na yu givim baksait long ol vota.

Na ol kain miting bilong PDM, em yu stap wantaim long pulumapim kaikai long traipela

bel bilong yu.

Na Finschaffan mipela stap baksait na krai yet long developmen. Inap yu opim ai bilong yu na lukim memba bilong Kabwum Hon. Ginson Saunu o nogat?

Sapos yu no save long bringim ol sevis i go long pipel, kisim MAF go daun long Teptep na wokim banis pik bilong Ginson Saunu stap na em bai skulim yu, yu kirap nating tru nogat save long givim sevis long ol pipel.

Ol lain long Sepik givim yu blesing bilong God, tasol mipela lain bilong Finschaffan putim yu long hol wara bilong Bombongara na neks ileksen bai em daunim yu.

Taim bilong yu klostu ya mipela ol lain vota les long lukim yu wokabaut long Kempen. Kisim ka long Lae kam olgeta long Nomaneneg na kempen go long Qozolong na go olgeta long Zafrio, Abrus long en bai yu ron.

Ol lain Hube ol les tru long yu krungutim Hube na lukaut long dispela. Wanem hap bilong Lae yu save stap ol mangi save pinis, wankain long Mosbi tu olsem na wokim samting stret.

Yu go rauri na stretim sindaun bilong ol narapela lain tasol yu no tingim mipela ol pipel husat i putim yu long ples we yu stap

nau. Mipela ting bai i gat sampela tenis long sait bilong mipela tasol luk olsem nogat. Taim i kam klostu pinis na dispela taim, mi les long lukim pes bilong yu long taim bilong kempen. Nogut yu kam rauri na kapsaitim mauswara bilong u ken. Mipela ol pipel inap long ol bulshit bilong yu.

Noken tin mi kros, mi mekim ol stretim toktok mi lukim i no stret long ai bilong mi. I no mi tasol. I gat palnti narapela manmeri husat i gat wan kain tingting na ol yet bai rait na autim tingting bilong ol tu na yumi lukim.

Yu husat mangi kande o lain sapota bilong memba ya laik egensim o sapatim rait tasol Wantok niuspepa na bai mi lukim.

**Dange Soko
Amblat, Kumbit**

Sapos yu laik salim ol pas bilong yu i kam long dispela niuspepa. Salim i kam long dispela adres:

THE EDITOR
WANTOK NEWSPAPER
PO BOX 1982. BOROKO.
NCD.

"Kas na Alok bai i stap yet"

Dia Edita,

INAP givim mi spes long mi bekim pas bilong brata John Opotio i save i stap long tupela ples na vot long tupela rijinol memba i bin kamap long Wantok niuspepa 1361 na 1364.

Het tok bilong brata John Opotio i tok "Jim Kas mas go" na long Wantok nius no. 1364 i tok "Kas na Alok mas go".

Brata John mi laik askim yu dispela askim. Sapos Jim Kas wantaim Clant Alok i bilong narapela provins, kantri o wol yu ken tok tupela mas i go na tupela i ken i go. Na tupela pikinini Madang stret na yu laik salim tupela i go we. Jim Kas bai redi long pinis wok olsem gavana na rejinol memba long 2002 taim ballot pepa i tok orait long em wokabaut. Na Clant Alok bai redi long pinis wok olsem provinsel administrata long 2003 taim tri yia kontrak bilong em i pinis na i no long namel taim olsem yu bin tok.

Jim Kas em pipel bilong Madang i tokim em long holim dispela namba tru long ballot pepa long 5-pela yia na em holim na Clant Alok em ol pipel bilong Madang tru long PEC i bin tokim em long holim bek wok bilong em. Na tupela wantaim bai pinis wok taim kontrak bilong tupela i expaia na i no long namel taim olsem yu makim long laik bilong yu.

Nau yet yu wanpela yet laikim tupela pinis long wok bilong tupela taim olgeta turangu pipel bilong bus ples hangre long sevis i stap na i no wokim tok politik long tupela.

Taim Kas wantaim Alok laik bringim sevis i go long pipel, wan wan kaunsel presiden husat i hangre long kisim wok siaman wantaim ol politikel birua bilong Kas i go sutim bel bilong ol eksekutiv bilong publik employis asosiesen na publik sevens long Madang i pilai politik na i no wok.

Na taim planti kain man olsem yu putim ol toktok bilong yupela long radio na niuspepa long kamapim biknem, yupela i bagarapim Kas na Alok, tasol long narapela sait yupela bagarapim Madang provinsel administrasen tu.

Brata John Opotio mi laik tokim yu olsem Kas, Alok na Madang provinsel administrasen i no bagarap. Yu wantaim ol lain yupela hangre long wok politik tasol kamapim piksa nogut.

Brata John mi laik tokim yu olsem, sapos mi resos ona olsem yu husat bai benefit long Krumbukare main olsem wanpela len ona, bai mi i no inap wokim wanpela krangi toktok long Kas na Alok bikos maski tupela kisim hatpela taim long politik bilong Madang, long gutpela wok bung

bilong tupela wantaim HPL na nesenel gavman na nau klostu main long Krubukari bai kamap na benefit bilong main bai pasim bikpela maus bilong yu na liklik bel bai solap. Sapos yu glasim gut politik bilong Madang bai yu save na i no opim maus bilong yu long kisim biknem.

Sapos yu laik save moa brata John mi laik toksave long yu olsem ol projek olsem Josephstual timba, Ulingan timba, ZZZ fishing na Raikost Simen Fektri i no kamap bikos i bin i gat planti politik na nogat politikel na edministrativ bek ap.

Sapos yu bilong Madang na i stap long narapela provins na laik wokim politik bilong Madang i moa gutpela yu kam i stap long Madang na wokim gutpela rises long tupela sait na bai yu wokim gutpela stia toktok bai i ken helpim i go het bilong dispela provins. Na i no long harim wanpela sait stori na pairapim maus nating nating.

Brata John yu bin tok olsem yu bin votim Jim Kas long 1997 taim yu bin i stap long ples Magiai. Tasol mi save olsem yu bin i stap long 6 Mail na votim Bill Skate. Na ating tevel bilong yu i bin i kam votim Jim Kas long ples Magiai. Long tok klia long yu as bilong Jim Kas kisim planti nem nogut long radio na niuspepa bai yu mas save olsem. I gat 5-pela as long Jim Kas kisim nem nogut long radio na niuspepa.

1. Em long ol politikel birua bilong Jim Kas

2. Em long ol politikel birua bilong Jim Kas yusim sampela ol kaunsel presiden na ol pablik seven long pilai politik long Jim Kas na kamapim politike! instabiiliti.

3. Em long ol kaunsel presiden i no kisim wok siaman long PEC i wok long kamapim politikel instabiiliti.

4. Em long ol 4-pela nesenel memba bilong Madang i nogat wok bung wantaim Jim Kas.

5. Bikos Jim Kas bilong maunten na las ples na ol nambis i gat pasin bilong jeles wankain olsem bipo Anton Yagama i bin kamap provinsel administrata long Madang long 1994 na ol nambis pablik seven i bin protes na petisenim nesenel gavman na gavman i bin harim krai bilong ol na senisim wantaim Wep Kanawi.

Olsem na gutpela long yu save long politik bilong Madang na bihain yu bagarapim Jim Kas. Husat laik bekim em welkam tasol long bekim tasol i mas gat gutpela research pastaim na bekim na noken mekim pipia long Wantok niuspepa.

**Henry Ye
Madang**

Immanuel Luteran Sios lida pilai politiks

Dia Edita,

INAP yupela lusim hap liklik spes long mi, long sapotim toktok bilong susa Misis Naiwe i bin kamap long Wantok niuspepa long 10/8/2000.

Mi sapotim tru toktok bilong Misis Naiwe, bikos mi bin wanpela memba bilong Immanuel Kongregesen long 1990 kam inap long namel long 1997. Mi bin lusim Immanuel Luteran Sios na go lotu long M. Memorial Lutren Sios na Trangau Lutren Sios. Mi bin lusim Immanuel Lutren Sios bikos mi lukim olsem sios lida bilong mipela i save pilai politiks tumas insait long sios. Pasin bilong laikim arapela na karim hevi bing arapela em i no save gutpela tumas. Lida, kongregesen na yuth bilong ol yet. Pasin bilong wok bung wantaim ino save kamap gut. Pasin bilong stretim hevi long gutpela pasin na kamapim wanbel ino save kamap gut. Insted long kamapim wanbel, ol i save givim bel hevi long

arapela. Pasin bilong sutim pinga i go long arapela, arapela tu i save kamap.

Na pasin bilong tok baksait long arapela tu i save kamap namel long ol wokman bilong sios. Long dispela as planti memba i wok long lusim Immanuel Sios na go lotu long arapela Luteran haus sios.

Mi laik tok olsem long ol lida bilong Immanuel Lutren sios, 'plis, traim na sensim ol dispela kain pasin na kamap olsem ol lida bilong bipo.

Na bringim bek olupela gutpela pasin bilong Immanuel Luteran sios, wantaim ful kongregesen i pulapim hau lotu.

Yu husat kristen brata, susa i laik egensim o sapotim, em welkam tasol.

**Waizeai Gaira
Madang**

PNG no kristen kantri

Dia Edita,

YES mi wanpela man mi save i stap long Sandaun kemp long Madang Newtown Jomba Madang provins.

Yes inap yupela givim mi sampela liklik ha taim long mi long autim sampela wari bilong mi. Yes wari bilong mi i go olsem.

Mi save harim long radio lukim long TV na lukim long ai bilong mi yet i go inap amaspela yia i go pinis na bai kam yet. Yes mi nau yet mi laik tok olsem yumi PNG i noken tru kolim mipela kristen kantri bikos yumi aut long lo bilong kristen pinis.

Wai na yumi i noken tok kristen kantri. Yes mi laikim gavman i mas sensim sampela lo o kamapim tru tru pasin bilong kristen kantri bilong yumi PNG

na stopim ol pasin bilong man em bikpela samting long ai bilong God Papa bikos yumi birua bilong em.

Yes mi no inap sutim wanpela tok i go long ol raskol we ol i save kilim ol man. Bilong wanem na mi tok olsem long ol raskol. Yes bikos gavman i tingting long mani tasol na em i no tingting strongim lo na oda long kantri.

Gavman i mas sindaun na lukluk long laip bilong man em bikpela samting bikos man i stap kantri i stap mani olgeta samting i stap. Yes mi nau mi apil long gavman i mas lukluk long strongim lo bilong kilim man rep em bikpela samting na gavman i mas lukluk long dispela samting.

Yumi tok yumi kristen i luk olsem yumi PNG nau yumi na

gavma tu i aut long lo. Bikos pasin nogut i kamap bikpela pinis long kantri. Pasin pamuk i stap ples klia kilim man i stap klostu klostu pasin bikos ol klab ba na kainkain pasin i stap pinis long PNG.

Gavman i mas stopim o painim sampela we o lo long stopim dispela ol samting bipo bai yumi tok yumi kristen kantri.

Em tasol wari bilong mi, sapos yu husat yu laik sapotim em orait na yu husat yu i laik egensim em orait mi welkam tasol na bai mi lukim bekim bilong yu.

Tenkyu na God bai blesim yupela olgeta.

**Bitaineme Bunnoh
Madang**

Wari long Muslim lotu i kam long PNG

Dia Edita,

YES ol brata na susa long Wantok niuspepa inap yupela givim mi wanpela sans long autim wari bilong mi.

Yes wari bilong mi i go olsem. Gavman i no tingting long ol pipel bilong em long tumora. Yes, gavman nau i tingting long em yet na mani long poket bilong em yet na i no glasim wanem samting bai kam long pipel na kantri bilong yumi.

Yes mi nau i askim olgeta Kristen long wanem kain lotu Katolik, Luteran na Pentikostel lotu na olgeta sios long PNG i

mas sanap wantaim na egensim gavman na rausim Muslem i go bek long kantri bilong ol.

Yes Muslem i birua bilong ol kristen na tu ol i bin pait na kilim planti kristen pinis long sampela hap long wol pinis.

Yes, gavman bilong PNG i save long ol dispela hevi ol arapela kristen i karim pen i stap tasol stil em i opim dua bilong ol Muslem i kam insait long kantri.

Yes, nau yet mi apil long olgeta Kristen bilong PNG i mas egensim gavman na rausim ol i go bek long kantri bilong ol. Yes, sapos gavman i no laik long

harim krai bilong mipela na wari bilong mipela ol pipel bilong em, PNG, em orait. Hevi bai gavman yet bai kisim yumi yet i sutim ol na gavman bai kisim hevi, kilim ol Muslem.

Save i stap long gavman bilong luksave long dispela. Sapos yu wanem kristen i egensim yu i kain helpim o sapotim mi, amamas tasol long lukim tingting bilong yu long Wantok niuspepa. Tenkyu na God bai blesim yu.

**Lucas Hapeli
Sandaun province**

Sepik na Simbu tasol i no saveman

Dia Edita,

Mi wanpela mangi asples Madang tasol nau mi stap long Kimbe, Wes Niu Briten provins.

Mi laik bekim pas bilong brata Gaidu i bin kamap long mun Julai 13, 2000. Em tok olsem yu asples Madang i nogat saveman long wok.

Sepik na Simbu stap na Madang taun kamap gut. Yupela painim pipia kam stap long Madang. Planti stil na raskol pasin em yupela Simbu na Sepik i kamapim na i no mipela Madang. Noken mekim ol pipia tok.

Brata mi ken tokim yu stret, save i no stap long yu Sepik tasol. Olgeta provins em manmeri inap long save

na stap, tasol nogat wok. I no olsem yu Sepik painim wok long olgeta hap, Madang asples em bai lukautim taun bilong em na bai stap.

Yu Sepik painim mani na inapim olgeta provins.

Na tu yu tok olsem yu stap long Kimbe na yu bilong wanem hap? Na yu stap long Wes Niu Briten provins yu no laik stap long Sepik long ples bilong yu.

Em tasol. Husat brata o susa laik sapotim o egensim mi yu ken rait tasol kam long Wantok niuspepa.

**Yauar Angro
Kimbe**

Gavman mas helpim ol woa lain

Dia Edita,

PLIS givim mi spes long Wantok niuspepa na mi laik autim komplem bilong mipela ol manmeri bilong Papua Niugini we papamama na tumbuna bilong yumi we i kisim birua na taim nogut long han bilong Japan soldia. Em long wol woa 2.

Yes mi laik askim olsem wanem na gavman bilong yumi i no laik helpim yumi tu olsem ol narapela kantri olsem Amerika em presiden bilong ol i toktok strong long Jemeni na Jemeni i baim kompensesen long Amerika mak olsem K3.2 bilien na yumi PNG olsem wanem? Inap Praim Minista bilong yumi tu i ken helpim yumi tu olsem narapela ol kantri.

Planti bilong mipela lusim ol tum-

buna, ples, kainkain kastom na narapela ol samting. Ol Jepen repim na bagarapim meri pikinini na stilim ol samting nabaut. Inap Gavman bilong yumi stretim toktok wantaim gavman bilong Jepen bai Jepen i ken mekim wankain kompensesen long mipela.

Olsem wanem? Mipela bai kisim bagarap nating. I no wa bilong mipela. Ol narapela man i kam pait long graun bilong mipela na ol i bagarapim planti samting. Nau dispela em wankain olsem stil pasin. Ol i mas baim yumi long yusim yumi.

Em tasol na husat i laik sapotim mi o egensim mi em i orait, rait tasol long Wantok bai mi lukim.

**James Waima
Rabaul**

Simeon Wai na Joseph Wamil i givim baksait long Gumine pipel

Dia Edita,

Mi wanpela mangi Yuri insait long Gumine distrik tasol na mi stap long Kimbe taun. Mi laik autim wari bilong mi long memba bilong Gumine open insait long Kundiawa-Simbu provins.

Plis klostu 2001 nau na yu i nogat luksave stret long mipela ol pipel bilong Gumine olsem yu i no luksave long ol vot bilong mipela. Rot em i bagarap pinis. Stat long Kundiawa i go long Omile. Hap i go long Genabona na i go daun long Karilmaril sab-distrik na go mit long Gaima. Tamblo rot em i kam bung long

Aima na go olget long Gumine na ausait.

Hap i kam antap. Stat long Dirima i go olgeta long Dia rot i bagarapim tru.

Olgeta 3-pela LLG rot bilong ol bagarap em insait long Gumine na olgeta Saut Simbu rot bilong ol i bagarap. Olsem wanem long memba?

Wanem kain bel hevi yupela i gat long ol pipel bilong Gumine na Saut Simbu. Pipel i gat bel hevi stret long i nogat wanpela helpim bilong yupela i kam inap nau. Ka i no inap go kam na raurim PMV. Pipel bilong Gumine

na Saut Simbu i bagarap stret. Nau, plis inap yupela givim wanpela gutpela sevis nau olsem, salim masin i go na mas winim ol dispela rot. Pipel ken kisim sevis long en.

Sapos yu i gat bel isi na mari-mari bilong god i stap wantaim yu.

Sapos yu i gat sori long ol pipel i gat bel hevi pinis.

Yu husat mangi Yuri, Gumine o Saut Simbu i laik egensim o sapotim welkam tasol.

**Paul Sine
Kimbe**

Ol Luteran Sios lida long Madang kisim salens long senis

Dia Edita,

Mi laik autim tingting bilong mi long toktok bilong Misis K Naiwe i bin kamap long Wantok niuspepa long mun Ogas 10, 2000.

Na mi laik sapotim toktok bilong em olsem. Em toktok long presiden mas skelim gut Pastor na salim ol i go aut long kongregesen.

Mi laik tok olsem, Papua Niugini em demokretik na kristen kantri. Na em i gat fridom long toktok. Nogat samting rong long en. Em i no bagarapim nem bilong God.

Ating em i mekim stia toktok, na yupela bin politik long dispela. I nogat gutpela as tingting long dispela yupela bin mekim olsem na mi tok yupela i bin laik haitim felia bilong yupela.

Olsem na yu sios lida lukim kain pas olsem bihain yu noken bel hat long en. Yu mas ekseptim na sensim pasin bilong wok long gutpela Luteran memba bilong ELC Madang distrik. Noken kirap nogut, ol pipel na God yet bai skelim wok bilong yu. Noken skelim yu yet na tok mi rait olgeta taim.

Tenkyu em sapot pas bilong mi.

**Roni Dowabina Poyo
Madang**

Distrik edministreta bilong Bulolo em kenidet bilong Ambunti Drekkir long 2002

Dia Edita,

Mi wanpela man bilong ples Kuaka insait long Ambunti distrik. Tasol nau mi stap long Lae, Morobe provins.

Insait long dispela pas bilong mi, mi laik soim olgeta pipel bilong Ambunti Drekkir long wanpela nupela kenideit bai i resis long nesenel ileksen long 2002, em Bart Ipambonj distrik edministreta bilong Wau Bulolo.

Mi sapotim tru Mista Bart Ipambonj, bikos em i wokim bikpela wok insait long Wau Bulolo na ol arapela 6-pela distrik i stap aninit long lukaut bilong em. Em i lukautim 8-pela distrik olsem wanpela papa i save lukautim 8-pela pikinini bilong em.

Mi gat bikpeal bilip na trast olsem Mista Ipambonj bai tainim Ambunti Drekkir long 5-pela yia tasol. Bilong wanem na mi tok olsem? Bikos long

tupela blakpela ai bilong mi yet, mi bin lukim ol wok em i mekim nau long Wau Bulolo na ol arapela distrik i stap aninit long lukaut bilong em.

Mi nau askim ol narapela kenideit long step daun na givim spes na sapot bilong yupela i go long Mista Bart Ipambonj.

Na tu mi givim bikpela wok i kam long ol pipel bilong Kuanga 1 na Kuanga 2 long sapotim dispela man Mista Bart Ipambonj, bikos yupela na mipela ol pipel bilong Ambunti i stap long bus, we i nogat haiwe na gutpela maket bilong salim ol kopi na ol gaden kaikai bilong yumi. Dispela man em bilong yumi yet long bus. Nogat haiwe. Yumi pasim pasim na givim olgeta namba yumi gat long ol man bilong yumi yet bai inap karim rot, bris, hausik, na wanem narapela gavman sevis i go inqait long wanwan

viles bilong yu. Nogut ol lain long haiwe kisim na lus tingting long yumi olsem ol i mekim nau.

Mi laik tokim Mista John M Waime bilong ples Dina, nau i stap long Namatanai, Niu Ailan long go bek na toktok long ol pipel bilong yu, na Kuanga 1na Kuanga 2 long sapotim na strongim olsem Mista Ipambonj bai i stap memba bilong Ambunti Drekkir.

Sapos yu no inap long go, orait yu rait na tokim ol pipel bilong yu long votim busman na i no haiwe man. Busman i krai long sevis.

Mi save, brata John yu laikim man olsem; 1. Herman Messimbor, 2. Andrew Sapuko, E. Joseph Sukwianomb. I gutpela ol i gat save, tasol planti ol saveman ol i yusim save bilong ol long pairap nating olsem klaut i pairap na i nogat wok kamap.

Planti bilong ol dispela kain man nau i stap long palamen tude.

Dispela ol 3-pela man i traim resis na ol i lus pinis. Yumi traim nupela man na sapos em i win, em i ken wok wantaim ol dispela 3-pela man na kirapim ilektoret bilong yumi long Ambunti Drekkir. Mipela i laikim eksen lida. Mauswara nating, mipela inap pinis.

Yu husat brata o susa long Wau Bulolo, Minyama, Watut na ol arapela distrik i stap insait long lukaut bilong distrik edministreta bilong yumi Bart Ipambonj, yu ken sapotim o egensim na bai ol pipel bilong Ambunti Drekkir i ken save long em i wanem kain man. Mi bai amamas tu long lukim. Tenk yu.

Em tasol.

**Lucas Apinur
Lae**



National Heart Foundation of Papua New Guinea Inc.

!!SAPOS YU NO SAVE MEKIM OL EKSASAIS
BAI YU KISIM OL PROBLEM LONG LEVA
BILONG YU!!

YUSIM SAVE BILONG YU NA NOKEN KAMAP
OLSEM DISPELA MAN.



P.O. Box 158
MOUNT HAGEN
Papua New Guinea

Telephone: 542 2199
Facsimile: 542 2384
Email: mount-hagen@guinnpkf-com.pg



Word Publishing has vacancies in the following positions:

EDITOR, PNG BUSINESS

Qualification: A Degree or Diploma in
Journalism with five years
experience in business
reporting.
Housing not provided.

EDITOR, SUPPLEMENTS

Qualification: Degree or Diploma in
Journalism with five years
experience as a journalist.
Housing not provided.

JOURNALIST, Lae Office

Qualification: Degree or Diploma in
Journalism. Five years
experience as a journalist.
Housing not provided.

JOURNALIST, Wantok Niuspepa

Qualification: Degree or Diploma in
Journalism. Five years
experience as a journalist.

SALES REP, Lae Office

Qualification: Diploma or Degree in
Marketing. Five years in
newspaper advertising sales.
Housing not provided.

LAYOUT & DESIGN - 2 positions.

Qualification: Degree or Diploma in
Arts/Design would be ideal.
Three years experience
in layout and design using
Quark XPress and Adobe
Photoshop.
Housing not provided.


Applications must be addressed to:
The General Manager,
Word Publishing,
P.O.Box 1982,
BOROKO, NCD.

Applications close on
Friday November 17, 2000.



DIPATMENT BILONG LENS NA FISIKO PLENING

SINGAUT LONG PEIMENT



MINISTA BILONG LENS NA FISIKOL PLENING I LAIK SALIM TOKTOK GEN I GO LONG OL STET LIS HOLDAS OLSEM OLGETA AUTSTENDING LEN RENTELS WANTAIM OL ARAPELA BILONG DISPELA YIA, 2000 I OVADIU PINIS. SAPOS YU NO BIN KISIM WANPELA RENT DIU NOTIS O TOKSAVE YU GAT KOMITMEN YET LONG BAIM RENTELS BILONG YU ANINIT LONG TEMS NA CONDISEN BILONG OL STET LIS. DIPATMENT BAI FOFITIM OL STET LIS SAPOS OL STET LIS HOLDA I NO BAIM OL RENTELS BILONG OL.

DISPATMEN BILONG LENDS NA FISIKOL PLENING I KEN GIVIM RENT DIU NOTIS O TOKSAVE I GO LONG OL STET LIS HOLDA WANTAIM RAIT POSTEL EDRES. I GAT SAMPELA STET HOLDAS HUSAT I NO BIN TOKSAVE LONG DIPATMEN LONG POSTEL EDRES BILONG OL. DISPELA TASOL NA SAMPELA RENT DIU NOTIS O TOKSAVE I BIN KAM BEK KEN LONG DIPATMEN BIKOS NAGAT MAN I BIN KLEIMIM.OL. OLGETA STET HOLDAS NA OL ARAPELA LAIN I MAS TOKIM DIPATMEN BILONG LENS NA FISIKOL PLENING SAPOS OL I SENISM POSTEL EDRES BILONG OL.

DISPELA WOK LONG KISIM BEK OL STET LIS LONG OL MAN HUSAT I NO BAIM RENT BILONG OL I WOK LONG GO HET. DIPATMEN BAI KISIM BEK PLANTI PROPATI BIHAIN LONG OL WIK I GO HET SAPOS OL STET HOLDAS I NO BAIM RENTELS BILONG OL HARIAP. OL DISPELA STET LISES HUSAT I NO BAIM YET BAI DIPATMENT I EDVETAISIM OL TOKSAVE LONG OL LONG BAIM HARIAP, TASOL DISPELA I NO MIN OLSEM DIPATMENT BAI PABLISIM OL NEM BIILONG OL STET HOLDAS BEIFO EM I FOFITIM OL PROPATI BILONG OL.

LONG PAINIM AUT MO LONG OL AUT STENDING RENTEL BILONG LIS BILONG YU, PLIS RINGIM KASTOMA SEVIS LONG TELEFON NAMBA 301 32 85 O 301 3277.

GUAO K. ZURENUOC, OBE
SECRETARY FOR LANDS AND PHYSICAL PLANNING

PNG bai holim RLIF miting

RAGBI LIG RIPOT

PAPUA Niugini (PNG) bai holim miting bilong Ragbi Lig Intanesenel Ragbi Futbol (RLIF) long Mas 9-11, 2001.

Insait long dispela miting bilong RLIF bai pulim ol hetman bilong ol ragbi lig kantri insait long wol long tokaut long intanesenel kalenda bilong neks 5-ya.

Siaman bilong Papua Niugini Ragbi Futbol Lig (PNGRFL) John Numapo i autim dispela toktok bihain long em i kambek long RLIF miting i kamap long London las wik.

Numapo i tok PNG i amamas tru long kism luksave bilong ol hetman bilong ragbi lig insait long wol.

Em i tok olsem kalenda i redi pinis taim ol i kibung long London tasol miting long mun Mas neks ya em long oraitim tasol.

"Mipela i amamas olsem RLIF i oraitim askim bilong mipela long holim neks miting we ol intanesenel kompetisen o salens bai stat gen long neks ya," Numapo tok.

Dispela wokabaut bilong ol ragbi lig tim long pilai long arapela kantri i bin stap bihain long kros namel long Supa Lig na ARL long husat bai lukautim gem. Dispela kros i stat long Australia na go long Inglan na tu kism PNG.



• Mikaili Aizure bilong PNG Gas Kumuls i pusim na rausim Justin Jennings bilong Saut Afrika long Wol Kap resis bilong ragbi lig we nau i wok long kamap long Yurop long dispela taim. Foto: The Weekend Australian niuspepa.

Ol bikpela gem bilong Tes i bin kamap long Australia, Nu Silan na Inglan, na PNG wantaim ol arapela kantri i no kism dispela kain helpim.

Frens husat i no bin stap insait long kain resis bilong intanesenel futbol salens bai kism namba wan sans long bungim PNG long Jun neks

ya. Ol bai kam pilai tupela Tes gem long Pot Mosbi na Lae. "Dispela ol program tasol na mipela bai redi tasol long miting we ol bai oraitim ful kalenda long mun Mas," siaman i tok.

Insait long draf kalenda, Australia bai salensim PNG

Kumuls long mun Oktoba neks ya. Na tu bai i gat Pasifik/Osenia Kap we bai givim sans long ol pilaia i no stap insait long Kumuls.

Dispela kompetisien ya bai pulim ol arapela biknem pilaia bilong Tonga, Samoa, Fiji, Cooks Island na Nu Silan Maori.

PNGFA i mas mekim save long trabel lain

SOKA RIPOT

HENRY MORABANG i raitim

PAPUA Niugini Futbol Asosiesen (PNGFA) i mas kirapim wanpela wok painimaut bilong wanem na IBS PS United i no pilai long fainel bilong PNGFA nesanel klab sempionsip long Independens wiken.

Wanpela strongpela sapota bilong soka Simon Koima i askim nesanel bodi long mekim wok painimaut sapos toktok bilong pretim ol pilaia bilong IBS PS United i tru o nogat.

Em yet i save olsem kain pasin bilong pretim ol arapela pilaia long nesanel sempionsip i no gutpela tru na i no inap helpim wok bilong soka insait long kantri.

Koima i tok olsem ol sapota bilong wanpela klab i pretim ol pilaia bilong IBS long noken pilai long fainel sapos ol i win. Ol i gat sans long pilai tasol dispela tok pret i mekim na ol i no pilai.

Em i askim PNGFA long mekim save long dispela klab long wanem ol lain sapot na pilaia i bagarapim gutnem bilong spot. Kain ol bikhem pasin i no inap helpim tru soka long kism gut nem sapos ol i askim long sponsasip.

Koima i tok em i save olsem tripela memba bilong ogenaising komiti bilong nesanel soka klab sempionsip i bungim pinis ol eksekutiv bilong PNGFA long mekim ripot bilong ol.

Wanpela pilaia sinia pilaia bilong PS United husat i no laik givim nem i tokaut olsem ol pilaia bilong em na opisel i larim gem bikos long sefti bilong ol.

Em i tok dispela hevi i kamap taim ol opisel i no gat gutpela rekot long ol tim i pilaia. Hevi i kamap taim Wantun tim bilong Kaiapit Distrik Soka Asosiesen (KDSA) i tokaut olsem ol i winim Elcom Wabag 6-1. Na dispela i no tru. Skoa 6-1 em Rapatona Kimbe i winim Blue Kumuls bilong Wabag.

Ol lain Wantun i apil bihain long tu hawa long hevi bilong ol tasol PNGFA i tok dispela i no tru. Orait PNGFA i givim gem i go long PS United long gol averes (planti gol) tasol ol Wantun i no amamas na laik kirapim pait.

Orait PS United i no laik kamapim planti hevi na larim Sobou bilong Lae i kam insait long fainel.

Mista Koima i tok sapos wanem klab i mekim dispela kain pasin, stapim ol long noken larim ol i pilai long arapela ol tonamen.

Tupela arapela tim, Rapatona bilong Kimbe i apil bikos em i ting ol i mas stap long fainel long namba bilong ol gol ol i skorim. Rapatona i mekim save stret long Blue Kumuls bilong Wabag 6-1.

Guria bilong Lahi i apil long PNGFA bikos ol i no kism gutpela malolo bipo ol i go insait long fainel. Aninit long lo bilong soka, ol pilaia i mas stap sampela hawa na malolo gut bipo long fainel.

Insait long arapela soka stori tripela soka bodi insait long kantri nau i tingting long kirapim opisen kompetisen long strongim soka long kantri.

Nesanel bodi, Papua Niugini Futbol Asosiesen (PNGFA), Pot Mosbi Soka Asosiesen (PMSA) na Pot Mosbi Skul Soka Asosiesen (POMSSA) i laik kirapim op-sisen kompetisen long helpim ol yangpela long salensim ol top pilaia.

Wantok Nius i painimaut olsem dispela kompetisen ya bai gat 8-pela tim long divisen bilong man na divisen bilong meri. Long dispela ol 8-pela tim, 6-pela em ol top primia tim na tupela em anda 17 and anda 20 yut tim.

Wankain tu long divisen bilong ol meri. Tasol tim bilong ol meri bai kam long divisen wan kompetisen tasol.

Bikpela astingting bilong dispela kompetisen givim sans long ol top pilaia long yut divisen long salenim ol primia tim. Na dispela tu em long larim ol primia tim i stap long fom bilong ol long op-sisen.

PNGFA bai yusim dispela op-sisen tonamen long traim redim tupela Anda 18 na Anda 20 tim bilong man na meri long ovasis kompetisen. Anda 17 tim bilong man bai pilai long Apia, Samoa, long Disemba 2-11 na bilong Anda 20 em long Januari 25 i go long Februari 2 long neks ya long Noumea, Nu Kaledonia.

Kik resis bilong ol Anda 18 meri bai kamap long Tonga long mun Epril.

PNGFA tu bai yusim ol top pilaia bilong em long stap fit sapos Melanesian Kap i laik kamap long ol ovasis kantri. Melanesian Kap i save kamap long op-sisen bilong soka olsem na PNG i salim tim i go, ol i save kism bikpela bagarap long han bilong ol brata long Vanuatu, Solomon Ailan, Nu Kaledonia na Fiji.

Siaman bilong PNGFA Teknikel Komiti Kisakui Posman i amamas tru long dispela tingting bilong tripela soka bodi. Em i tok dispela bai helpim ol yangpela pilaia long kism strong long salensim ol top primia pilaia.

Na bikpela samting tu em long larim ol pilaia i stap fit long op-sisen.

Yalu i kism nupela yunifom

BASKETBAL RIPOT

RIBACK Stevedoring kampani long Lae i givim 2-pela set yunifom long wanpela basketbal tim bilong ol Ahi papagraun bilong Lae siti.

Yalu Basketbal tim i bin kism dispela ol yunifom long wik i go pinis long redim ol long pilaia insait long Morobe Country basketbal tonamen em bai kamap long Lae klostu nau. Ol meri long Yalu i bin winim dispela basketbal resis las ya.

Long nupela sisen bilong taun basketbal long ya antap (2001), Yalu i tingting long putim tupela tim.

Stat long las ya, Riback Stevedores (Ltd) i bin save putim K6,000 long helpim sikipela Ahi ples long Lae em long Sipaia, Wagang, Butibam, Kamkumung, Yalu na yanga long wok bilong spot. Wanwan ples i save kism K1000.

Kampani i luk save long wanwan spot man na meri o ol tim bilong dispela ol viles.

Operesen menesa bilong Riback

George Gware i tok kampani bilong ol i laik helpim ol yangpela manmeri long ples long pilai spots na dispela rol tu i ken mekim bai ol i kamap gutpela manmeri long ol komuniti bilong ol

Presiden bilong Yalu Basketbal Asoiesen Aquila Adam na tupela pilaia long tim bilong meri, Nancy Selese na Magaret Saing i bin kamap long opis bilong Riback long kism sek mani bilong ol

Ol Ahi papagraun i gat 41sia long Riback Stevedore kampani.

Lukaut long giaman boksing asosiesen: Gibson Gigmai

BOKSING RIPOT

SAPE METTA i raitim

I GAT planti komplek i wok long kamap nau long Goroka long Isten Hailens bihain long kamap bilong wanpela nupela boksing asosiesen

Planti pait na kusai pasin i wok long kamap na i duanim tru gutnem bilong spot bilong boksing.

Olgeta toktok na komplek sut long olpela boksa bilong Goroka John Wayaki

Olpela biknem profesenel boksa Gibson Gigmai i mekim planti toktok bihain long planti samting Wayaki i mekim long nem bilong boksing i no stret.

Mista Gigmai i tok em i no amamas na wanbel long ol kusai na paul pasin em Mista Wayaki i wok long mekim.

"Na ol lain man na meri husat i wok long amamas na givim sapot i go long dispela man i mas tingting gut pastaim na mekim ol samting long sapotim dispela

man.


Nogut sapot bilong ol bai wara was na i no inap long karim wanpela gutpela kaikai long givim bek gutpela nem na promotim kampani o dipatmen bilong ol,"

Em i tok nau yet long Goroka i nogat wanpela boksing asosiesen i rejista na afiliat long nesanel bodi, Papua Niugini Boksing Yunion (PNGBU).

Na John Wayaki i nogat wanpela boksing asosiesen i afiliat wantaim PNGBU. Na em i wok long tromoi planti giaman toktok i go i kam na paulim planti lain long sapotim dispela giaman asosiesen bilong en.

Mista Gigmai i tok John Wayaki i wok long promotim nating na yusim kankain tok trik we em i wok long putim ap ol giaman toksave na posta long ol publik notis bod na tu em i wok long yusim nating nating gutpela nem bilong ol biknem paitman bilong PNG na ovasis tu long kism sapot.

Mi laik tok strong long ol lain man na meri husat i save givim sapot long John Wayaki long lukaut na noken yusim nem bilong boksing spot.



• Mista Gibson Gigmai i no wanbel long John Wayaki husat i wok long yusim gutpela nem bilong boksing spot long giaman na paulim ol lain man na meri long givim sapot long ranim asosiesen bilong em.

NCD PUBLIC SERVANTS SOCCER

PRE SEASON
(University oval near Botanical Gardens)
Saturday, November 11, 2000.

Ground One

8.00	M	Air Niugini v Transport
9.00	W	Transport v Air Niugini
10.00	M	Parliament v Elcom
11.00	W	Elcom v Parliament
12.00	M	Fisheries v IRC
1.00	W	IRC v Fisheries
2.00	W	Works v NBC
3.00	M	NBC v Works
4.00	M	NSO v NCC

Ground Two

8.00	M	Education v Defence
9.00	W	Defence v Education
10.00	M	Pangtel v Telikom
11.00	W	Telikom v Pangtel
12.00	M	NPF v Naqia
1.00	W	Naqia v NPF
2.00	W	Harbours v Police
3.00	M	Police v Harbours
4.00	M	Commerce v UPNG

Sunday, November 12, 2000.

Ground One

8.00	M	POSF v DCA
9.00	W	DCA v POSF
10.00	W	NCC v NSO
11.00	M	PostPNG v A/General
12.00	W	A/General v PostPNG
1.00	M	BPNG v Health
2.00	W	Transport/Air Niugini v Elcom/Parliament
3.00	M	Air Niugini/Transport v Parliament/Elcom
4.00	M	Fisheries/IRC v NBC/Works

Ground Two

8.00	M	Teachers v PNGBC
9.00	W	PNGBC v Teachers
10.00	W	UPNG v Commerce
11.00	M	1PIR Taurama v Cellnet
12.00	W	Health v BPNG
1.00	W	Cell v 1PIR Taurama
2.00	W	Defence/Education v Telikom/Pangtel
3.00	M	Education/Defence v Pangtel/Telikom
4.00	M	NPF/Naqia v Police/Harbours

PORT MORESBY MEN'S SOFTBALL ASSOCIATION

Sunday, November 12, 2000.

Game: 3 - Round 1

Diamond 1

08.15-10.00	A	Tigers v MSC
10.00-11.45	A	Gazelle v Elcom
11.45-13.30	A	Bears v T/Jets
13.30-15.15	A	Hawks v B/Eagles
15.15-17.00	A	NGI v Manolos

Diamond 2

08.15-10.00	B	Manolos v Bears
10.00-11.45	B	Kikopex v B/Eagles
11.45-13.30	B	Dolphins v Malangan
13.30-15.15	B	Elcom v MSC
15.15-17.00	B	Gazelle v Norths

Diamond 3

08.15-10.00	C	Dolphins v Norths
10.00-11.45	C	Manolos v Samurai
11.45-13.30	C	NGI v Tigers
13.30-15.15	C	Kikopex v T/Jets
15.15-17.00	C	Samurai v Tigers

PORT MORESBY WOMEN SOFTBALL ASSOCIATION

Saturday, November 11, 2000
Week 6

Diamond 3

09.00-10.15	Tarangau v Chebu	B
10.30-11.45	Admiralty v Mazda	A
12.00-13.15	Gazelle v All Stars	A
13.30-14.45	Norths v Wantoks	A
15.00-16.15	All Bears v Chebu	A

Diamond 2

09.00-10.15	Wantoks v All Stars	B
10.30-11.45	AB Bears v Norths	B
12.00-13.15	Dolphins v SP	C
13.30-14.45	Mazda v Manolos	C
15.00-16.15	SP v Gazelle	C

Diamond 1

15.00-16.15	NGI v Dolphins	C
-------------	----------------	---

Bye: Admiralty B
Tarangau C

PORT MORESBY SOCCER ASSOCIATION

Presents the Orogen Tournament
Excellence (Soccer)

Saturday, November 11, 2000.

Bisini Two

11.00	W	Defence v WM1
12.30	M	Defence v LBC
02.00	W	Telikom v Youth 1
03.30	M	Youth 2 v SP Brewery

Note: All games are played 40 mins each way.

• Gates K1.00.

• Prizes and Trophies will be announced soon by PNGFA.

Sunday, November 12, 2000.

Bisini Two

11.00	W	Cosmos v Guria
12.30	M	Rapatona v Cosmos
02.00	W	ANZ Uni v Youth 2
03.30	M	Youth 1 v ANZ Uni

• Only five guest players are allowed.

• The public are welcome.

• PMSA referees and any volunteers are asked to turn up.

LAHI SOCCER ASSOCIATION

2000 GRANDFINALS

Venue: Siks

Saturday, November 11, 2000

1000	Under 19-2	Asiawe v KA Midnorth
1130	Prem Div	Unitech v Gee Otton
1300	Under 19-1	Elcom v Bugandi
1430	Premier 1	Unitech v Sobou
Sun: 12/11/00		
1100	Women 2	KA Midnorth v Asiawe
1230	Division 1	Asiawe v Arnotts
1430	Women	Guria v Elcom

LAE SOFTBALL ASSOCIATION

Week 3 - Women's/men's
Saturday, November 11, 2000 -
Sunday, November 12, 2000.

Diamond 1 - A Grade

10.00-11.15	Hawks v Malangan
11.16-12.30	Sharks v Manolos
12.30-13.45	Post PNG YMCA v Admiralty Marlins
13.45-15.00	Coca-Cola Aviat vs Telikom
15.00-16.15	Karanas v NGI
16.15-17.30	BHP Eagles v Burma Raiders

Diamond 2 - B Grade

10.00-11.15	Coca-Cola Aviat v Telikom
11.15-12.30	Karanas v NGI
12.30-13.45	Island Hawks v Malangan
13.45-15.00	Eagles v Burma Raiders
15.00-16.15	Hero Sharks v Manolos
16.15-17.13	Post PNG YMCA v Admiral Marlins

WORLD CUP

Group One Standings

Country	P	W	D	L	F	A	Pts
Australia	3	3	0	0	198	14	6
England	3	2	0	1	144	36	4
Fiji	3	0	0	2	56	144	2
Russia	3	0	0	3	20	224	0

Group Two Standings

N/Zeland	3	3	0	0	206	26	6
Wales	3	2	0	1	80	86	4
Lebanon	3	0	0	2	44	110	2
C/Islands	3	0	1	2	38	144	1

Group Three Standings

PNG	3	3	0	0	69	42	6
France	3	2	0	1	104	37	4
Tonga	3	1	0	2	96	68	2
South Africa	3	0	0	3	24	138	0

Group Four Standings

Ireland	3	3	0	0	78	38	6
Samoa	3	2	0	1	57	58	4
NZ Maoris	3	1	0	2	49	67	2
Scotland	3	0	0	3	34	55	0

Remaining Fixtures

Quarter-Finals

Nov 11: Australia v Samoa - Watford

Ireland v England - Leeds

Nov 12: PNG v Wales - Castleford

NZ v France - Widnes

Semi-Finals

Nov 18: Winner-Watford v W-Castleford - Bolton

Nov 19: W-Leeds v Widnes - Huddersfield

Final

Nov 25: Old Trafford, Manchester



WANTOK SPOT



... redi long bungim Wels

Kumul pinis nambwan long pul



• Ol pilaia i bung wantaim long amamasim win bilong ol egensim Tonga long Tunde moning.

PAPUA Niugini Gas Kumuls i kamapim wanpela top risalt long Wol Kap kempen bilong em bihain long ol winim Tonga 30-22 long Perpignan, France, long Turde morning.

Dispela win bilong PNG Kumul nau i surikim ol i go long kwata fainel we ol bai bungim Wells long Auto Quest stadium long Widness, Ingran.

Stanley Gene i winim Man of the Match awot taim em i go pas long stiaim Kumuls long winim Tonga.

Gene na kepten bilong em Adrian Lam, em ol birua tim i wok long putim gut was long tupela ya. Kosa Bob Bennett i kamapim gutpela tingting tru long senisim em wantaim Tom O'Reilly bipo long stat bilong pilai.

Dispela senis long posisen i givim Gene bikpela sans tru long kamapim gutpela gem long atek na tu difens. O'Reilly i go helpim ol pilaia long beklain.

Gem ya i no gat bikpela samting i kamap. Tasol ol sapota i kamap long lukim strong bilong fowat bilong tupela sait wantaim.

Long stat bilong gem, PNG Kumul i laik winim gem, ol i mas strongim gutpela difens bilong ol. I no wankain olsem arapela tupela gem egensim France na Saut Afrika, namba wan hap ya i gutpela tru.

Strongpela difens i kirapim skin bilong ol pilaia bilong Kumuls we ol i givim planti penalti i go long Tonga. Dispela em wanpela bikpela wari tru kosa Bennett i tingting long mekim.

Referi bilong Ingran i givim planti penalti tru long tupela tim wan-

taim. PNG i putim namba wan skoa taim John Wilshere i kikim penalti. Penalti i kam taim wanpela pilaia bilong Tonga i holim pilaia long takol longpela taim tumas.

Michael Mondo i yusim strong bilong em long brukim difens long 19 minit na putim namba wan trai bilong Kumuls. Wilshere i kikim konvesen na skoa i go 8-6.

Insait long 22 minit, Gene i wokim liklik stail bilong pele na kikim bal na kisim gen na go skori mtrai long surikim skoa i go 12-6.

Na long 33 minit gen, Gene i wel insait long difens bilong Tonga na setim David Buko husat i go putim senta trai. Wilshere i kikim dispela konvesen na skoa i surik i go long 18-6.

Na long 38 minit, Kumul i larim Tonga i putim wanpela trai. Long haptaim PNG 18 na Tonga 12.

Tu minit i go insait long namba tu hap, Wilshere i kikim wanpela penalti. Raymond Karl i joinim gutpela fowat pilaia na em i go skorim trai. 24-12.

Na long 66 minit, Gene i kisim wanpela kik bilong Adrian Lam na skorim trai. Wilshere i kikim dispela trai na skoa i sanap 30-22

Long las 14 minit, PNG Kumuls i mekim strongpela difens na banisim gut ol pilaia bilong Tonga. Ol i holim lid i go inap ful taim na ol i amamas, kalap na holim ol poroman long amamasim win.

PNG i pini long namba wan ples bihain long em i winim olgeta gem en long pul tri. Ol lain i pilai gut long PNG tim em Buko, Gene, Mom, Mondo, Bruce Mamando na kepten yet Adrian Lam.

Boksing i kirapim paia long Goroka

JOHN SUPA i raitim

GOROKA long lsten Hallens bal holim namba wan boksen salens bilong ol long dispela wiken long YC Hall.

Dispela salens bal lukim ol novis boksa bal skelim strong bilong ol long junia na sinia divisen. Na tu, ol boksa meri bal traim soim kain stail long pait.

Moa long 100 boksa i kam long 5-pela lokel klab insait long Goroka taun yet na tu ol ples arere long taun.

Astingting bilong holim dispela sempionsip em makim wanpela trening skwat long redi long pilai insait long nesanel boksing sempionsip we bai kamap long bigin bilong yla 2001.

Developmen opisa bilong boksing long Nesanel Spots Institut, Clement Yariyari i tok ol 5-pela klab i holim pinis

wanpela de marathon kosing na trening kos, na olgeta klab i redi tasol long dispela wiken.

Em i tok dispela wan-de kosing kosa i bikpela samting long helpim ol boksa, opisal na kosa long save gut long ol lo bilong pait taim ol i go insait long ring.

Nem bilong ol 5-pela klab husat bal resis em Faniufa, Sio Eels, Nokondi, Boda na NSI. Ol bai long Faniufa i tren aninit long lukaut bilong Waivei Alewa, Sio Eels i kam aninit long Mathew Yawa, John Waiaki i lukautim Nokondi, Daniel Umba i kosim Boda klab bilong Asaro na Danny-Quinn Tau na Jeffrey Gideon i lukautim klab long NSI yet.

Presiden bilong Goroka Boksing Asosiesen (GBA) Frank Amoiha i tokaut olsem em i namba wan taim ol meri boksa bal soim stail bilong ol long boks. Pait bilong ol meri bai pulim planti man na meri long kam lukim ya.

"Dispela em i namba wan taim ol meri bai boksen, na mipela bai skelim sapos mipela i ken larim ol meri long pait gen o nogat," Amoiha.

Presiden i mekim bikpela tok amamas i go long yut insait long Goroka taun long givim gutpela sapot long spot. Em i tok em bai guria sapos Goroka i kamapim gen nem olsem bipo em i save mekim.

Nau yet, Mista Amoiha i singaut i go long olgeta boksing senta long salim nem bilong ol paitman na tu divisen i go long presiden Steven Tsiwele long Pot Mosbi. Em i laikim ol nem hariap we em i ken redim ol samting bilong haus, kaikai na trenspot.

Em i salim ol fom i go pinis long wanwan provinsal spot opis. Wanem ol senta i laik kamap long sempionsip i mas lukim spots opis o nogat ringim stret Steven Tsiwele o NSI long givim nem long pait.

Em i Gutpela Em i Tuna Em i bilong PNG stret...

PROUDLY



- ◆ Tuna kam long solwara bilong Papua Niugini Stret.
- ◆ 100% tuna mit stret, nogat bun na nogat skin.
- ◆ Planti mit istap long olgeta tin.
- ◆ Nambawan tru long kisim protein bilong buildim masol. Em i gat Vaitamen D. na Selenium bilong helpim yu long rausim na pait long sik kensa na ol sik bilong lewa.
- ◆ Prais inap tru long yu baim.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.